


元  
文  
類



和16  
966  
3







元文類卷十六

表

東昌路賀平宋表

徐世隆

聖人之兵仁而威無遠不服天下之勢離必合有險即平方期四海之會同豈許一江之限隔捷書屢至慶頌交馳欽惟皇帝陛下至德體元中華開統美化既東西之被兼愛豈南北之分初遣文臣播告方國昭示包荒之量絕無陵弱之心弗圖島夷輒拘使節誘納我叛將盜據我歷城雖就鯨鯢之誅尚遺蜂蠆之毒蠢爾三苗之弗率命予羣后之徂征一鼓而定荆襄再駕而降鄂岳斬黃面縛江池心歸鐵瓮之堅城已摧金陵之王氣何在楚地六千里不勞秦將之增兵錢塘十萬家坐見吳王之納土偽將悉朝於闕下幼君遐竄於海中方知恃險而亡應悔求和之晚茲雖天意實出聖籌歷觀往古混一之難未有今日飛渡之易臣某等叨居牧寄喜聽凱音矧曾充載筆之臣尤當述集勳之事駿奔效命正海



內一家之時虎拜揚休上天子萬年之壽

車駕班師賀表

中統元年九月為真定廉宣撫作

李冶

臣某等言伏為逆黨悉平車駕迴鑾者黃鉞耀威果凶徒之一掃翠華旋軫遽明詔之載頒率土皆臣普天同慶伏以周之熙朝而造管叔武庚之役漢之盛世而行淮南濟北之誅事豈樂為兵非得已屬者逆屬相煽狂童恣行潛包禍心構成內難惟聖人必欲去害肆天子所以有征爰興問罪之師庸示安民之勇靈旗順指醜類畢燬衣暫試於一戎月連飛於三捷春生秋殺玄化何私天動星迴鴻鈞自斡宗祧鞏固永孚無疆之休日月貞明定為羣目之用此蓋皇帝陛下運膺千載道貫九皇雄斷電馳廟謨洞徹既多算以勝小算況至仁而伐不仁是宜氛祲廓清車書混一大統會歸於中統太平今睹於開平凡在陶甄疇非鼓舞臣某等忝以守官於蕃翰不獲稱慶於闕庭想迎六尺之輿遙祝萬年之壽

賀平宋表

孟祺

臣伯顏等言國家之業大一統海岳必明主之歸帝王之兵出萬全蠻夷敢天威之抗始干戈之爰及迄文軌之會同區宇一清普天均慶欽惟皇帝陛下道光五葉統接千齡梯航日出之邦冠帶月支之國際丹崖而述職奄瀚海以為家獨此宋邦弗遵聲教謂江湖可以保逆命舟楫可以敵王師連兵負固踰四十年背德食言難一二計當聖主飛渡江南之日遣行人乞為城下之盟逮凱奏之言還輒姦謀之復肆拘囚我信使忘乾坤再造之恩招納我叛臣盜漣海二城之地我是以有六載襄陽之討彼居然無一介行李之來禍既出於自求怒致聞於斯赫臣肅將禁旅恭行天誅爰從襄漢之上流復出武昌之故渡藩屏一空於江表烽煙直接於錢塘尚無度德量力之心乃有般使毀書之事屬廟謨之親稟謂根本之宜先乃命阿剌罕取道於獨松董文炳進師於海渚臣與阿朮阿荅海等忝司中閫直指偽都犄角之勢既成水陸之師並進常州一破列郡傳檄而悉平臨安為期諸將連營而畢會彼



極窮蹙迭出哀鳴始則為稱姪納幣之祈次則有稱藩奉璽之請  
顧甘言何益於實事率銳旅直抵其近郊召來用事之大臣放散  
思歸之衛士崛起心在四郊之橫草都無飛走計窮一片之降幡  
始豎其宋國主率諸大臣已於二月初六日望闕拜伏歸附訖所  
有倉廩府庫封籍待命外臣奉揚寬大撫戢吏民九衢之市肆不  
移一代之繁華如故茲惟睿算卓冠前王視萬里為目前運天下  
於掌上致令臣等獲對明時歌七德以告成深切龍庭之想上萬  
年而為壽更陳虎拜之詞

進授時歷經議表

楊桓

協時正日國政之大端章往考來歷書之明驗一或失應眾所共  
瞻豈天運之靡常殆人為之未密昔稱作者初匪一家其始也莫  
不精微未幾則旋聞疏闊蓋由年拘積算日括周分不知闕測以  
考真率多傳會以求合必欲行於永久詎容失之毫釐幸當累洽  
之辰共仰同文之治事加詳覈法貴變通欽惟憲天述道仁文義

武大光孝皇帝陛下政順陰陽德齊穹壤燭消息盈虛之理得裁  
成輔相之宜爰命文臣若稽乾象晝則考求實晷夜則揆度中星  
察氣朔之後先定躔離之朮胸精思密索討本窮原革前人苟簡  
之規成盛代不刊之典其為要旨具載成書所有授時歷經三卷  
立成二卷轉神注式一十三卷歷議三卷已繕寫成二十一冊隨  
表上進干冒天威不勝惶懼震越之至謹錄奏聞伏候敕旨

進實錄表

王宗懌

典謨述堯舜之功令名顯著方冊布文武之政義聞宣昭粵自漢  
隋及夫唐宋咸有信史以貽後來況大業豐功震令耀古惟深善  
述首議丕揚洪惟世祖皇帝仁孝英明睿謀果斷爰從潛邸有志  
斯民植根幹而佐理皇綱聘耆德而講明治道始平大理再駕長  
江過化存神有征無戰迨其龍飛灤水鼎定上都革弊政以惟新  
擴同仁而一視規模宏遠朝野清明內則肇建宗祧創設臺省修  
舉政令登崇俊良外則整治師徒申嚴邊將布揚威德柔服蠻羌



加以聖無不通明靡不燭守之以勤儉樸素養之以慈惠雍和收攬權綱綜覈名實賞罰公而不濫號令出以惟行萬彙連茹羣雄入穀削平下土統正中邦慕義嚮風聲教實朔南之暨梯山航海職貢無遐邇之殊方且開學校而勸農桑考制度而興禮樂國號體乾坤之統書畫煥奎壁之文罄所有而疇戰功不待計而救民乏聽言擇善明德緩刑欽福錫民遇災知懼得洪範惟皇之理過周宣修政之勤以致時和歲豐民安吏職蓋帝德克周於廣運故至公均被以無方可謂文致太平武定亂略繼一祖四宗之志兼三皇五帝之功開天立極者三十五年立經陳紀者二萬餘事以謙讓弗違於備紀故纂修未至於成書欽遇皇帝陛下寅紹詒謀厲精圖治亟鑒觀於成憲思通駿於先聲深詔下臣俾為寶錄宅心宗祏凝孝羹墻開館局而增置官僚敕羣司而大紬圖籍編摩既富搜訪加詳采摭於時政之編參取於起居之注張皇初稟增未見於罕聞承奉綸音俾調繁而就簡俯殫管見仰體宸衷盡略

虛文一存實事其饗會征伐文物典章粲焉列三代之英蔚爾開萬世之業與夫才德孝廉之士忠良姦佞之臣版圖生齒之繁財賦畜牧之盛謹依條據粗致無遺今具所修成世祖皇帝實錄二百一十卷事目五十四卷聖訓六卷凡二百七十卷謹繕寫為二百七十帙用黃綾夾複封全隨表上進臣等忝備台司幸膺盛典顧惟載筆才何有於三長勉進蕪辭慮庶幾於一得冒瀆聖聽不勝驚惶

進三朝實錄表

皇慶元年十月進

程鉅夫

一人御極聿嚴金匱之藏三后在天實監玉堂之紀粵若稽古克底成書欽惟皇帝陛下孝友慈仁溫文睿哲統之垂業之創念昔繼承功以著德以彰在茲纂錄首崇筆削之任式宏龜鑑之圖臣等職忝禁林才非良史繫年繫月豈足盡於先朝作典作謨庶有徵於今日臣等以所編成順宗皇帝實錄一卷成宗皇帝實錄五十六卷事目十卷制詔錄七卷武宗皇帝實錄五十卷事目七卷



制詔錄三卷總計一百三十四卷繕寫已畢謹具進呈

翰林國史院陞從一品謝表

程鉅夫

天開文運治載睹於熙朝地切詞林恩比崇於極品羣情胥悅斯道增華欽惟皇帝陛下德與日新聖由天縱禮儒臣而加異相古所無進院秩以示優自今伊始親授銀章之重益為玉署之榮臣等學愧前修位隆往代典謨訓誥敢忘黼黻之勤元首股肱願效賡歌之盛

謝賜禮物表

吳澂

接地風雲際會親逢於明主麗天日月照臨遠及於老臣賜之以府庫之財衣之以筐篚之幣承恩過厚揆分何堪俯瀝愚衷仰塵睿聽伏念臣荆揚賤士樵牧孤蹤幼誦孔氏之遺書無繇見道長值朝家之興運有幸為民愧碌碌之謏才乏卓卓之奇節以言其文章則體格卑陋以言其學行則器識凡庸自甘晦迹於深山豈覲發身於昭代大鈞靡不覆燾小物亦預陶鑄惟成宗法至元首

賁丘園之隱歷武宗逮延祐游升館閣之華先帝擢之禁林今皇處以經幄講讀古訓對揚耿光誤蒙上聖之簡知得廁羣賢而布列然犬馬餘齒已非少壯之年而螻蟻微誠莫展驅馳之志外之弗能效勤勞於郡縣內之弗能禱謀議於廟堂糜廩粟費俸錢素餐甚矣辱高位速官謗清論凜然因負采薪之憂遂辭視草之職雖心同葵藿常戀闕庭奈景迫桑榆宜歸田里未嘗毫釐有補於國況又耄耄無用於時淵度涵容寵錫優渥茲茲欽遇皇帝陛下乾坤博施海宇皆春忍令散材汨沒於泥塗欲俾寸草沾濡於雨露閱憐周恤固君父惻隱之仁惻款控陳乃臣子辭讓之禮倘冒昧而拜貺實踧踖以懷慙敢致懇祈乞垂矜允收此九重之大惠全其介之小廉壹是歡榮等如祇受臣栖遲畎畝既難強筋力以輸忠教誨子孫誓當竭精神而報上所賜鈔定段疋除已嚮闕謝恩外未敢欽受謹奉表辭謝以聞

進實錄表

至治三年二月進

袁楠



十年御極聿修四繫之編億載揚休殊乏三長之筆祇成信史上  
徹宸旒洪惟仁宗聖文欽孝皇帝仁靜根心溫恭合德詩書造士  
闡學制以設科法律爲師嚴官規而限祿誼經作則稽古鑑今著  
龜定主鬯之公棫樸藹奉璋之眾宜登琬琰永祕縑緘欽惟繼天  
體道敬文仁武大昭孝皇帝陛下慕切羹牆令行金石率時昭考  
摭言行以無遺迪惟前人繼聖明而有造臣等尊聞傳信竭思纂  
題閱歷歲年已深慙於尸素經緯日月期不朽於汗青臣某等所  
編成仁宗皇帝實錄六十卷事目一十七卷制詔錄一十三卷總  
計九十卷繕寫已畢用黃羅袱封全謹具進呈

賀登極表

虞集

鴻業啟圖世守肇基之迹龍庭受賀躬膺大厯之歸欣戴云初謳  
歌爲盛欽以世祖紹統乾之運裕皇隆出震之名推一本之均齊  
累四朝之繼及於惟景命監至德之無私粵在大宗御禎符而有  
慶天心攸屬國勢以安欽惟陛下道合彌綸功存綏撫立長式遵  
於家法計宜允協於輿情車服旌旗皆我祖宗之舊星辰河嶽赫  
乎宇宙之新時開泰平人用寧壹臣等叨承重任適際昌期建皇  
極以敷言親揚彝訓坐明堂而布政永贊成能

經筵官進職謝恩表

虞集

聖作稽古知崇效天開筵肆講於前經當宁屢煩於明詔垂憲萬  
世一新經緯之文有臣十人並拜便蕃之賜獨興睿斷創始明時  
伏惟昔者明王不以天縱而自聖本之先哲式資道揆以開人故  
伏羲則畫於河圖神禹錫疇於洪範凡將圖治慎在求聞蓋帝王  
傳授之精布乎方冊而古今治亂之迹可以鑑觀爰咨博洽之材  
用廣聰明之職然守職業者特見諸政事之著惟事啟沃者先端  
其心術之微故茲曠典之行實重眞儒之寄必經業可以發聖賢  
之蘊必器能可以相禮樂之成必養德之全素蒙孚信必至誠之  
積可致感通苟非其人不稱茲選而臣等性本固陋學尤迂踈守  
其師說之遺僅不忘其章句及轉國人之譯粗可達其性情所謂



材有限而道無窮心欲言而口不逮猶重昔人之歎況乎臣等之愚是故設醴上尊敷藺廣厦既極詢諮於累歲茂聞補報之微功敢謂能自得師坐而進道更錫官聯之重俾專誦說之司雖竊恩榮愈增憂責茲蓋伏遇皇帝陛下以乾坤之德為德以堯舜之心為心無一念不在於民生無一事不遵於祖憲遐方畢服猶虞水旱之為灾羣賢在朝尚恐俊良之攸伏必合二帝三王之至盛以登四方萬國之太平下收瓊末於芻蕘俾益涓埃於山海臣等敢不力循古訓各盡微衷非先王之法不敢言冀必由於正路雖末世之事不敢避庶有戒於前車尚勸九歌用稱萬壽

進實錄表

至順元年五月進

謝端

瑤圖啟運新元會之重熙金匱紬書述先朝之顯烈素慚載筆今幸成編洪惟英宗睿聖文孝皇帝德洽堪輿恩覃動植制禮作樂粲乎宗廟之儀登明選公秩若朝廷之紀四年無前之盛治兆民至今而永懷惟刪定之公乃可稱於信史固纂修之久將有俟於

明時欽惟皇帝陛下遙駿有聲粵若稽古謂文武之道必方冊而後傳而堯舜之心在典謨而可舉彰繼述之善志大揚厲之洪休蓋尊所聞莫匪爾極臣等事徵四繫學愧三長煥乎文章無能名其為大寫之琬琰庶有補於將來臣等所編成英宗皇帝實錄四十卷事目八卷制誥錄二卷總計五十卷繕寫已畢謹具進呈

進經世大典表

至順二年三月進

歐陽玄

堯舜之道載諸典謨文武之政布在方冊道雖形於上下政無閒於精粗特於紀錄之閒足見彌綸之具是以秦漢有掌故之職唐宋有會要之書于以著當代之設施于以備將來之考索我國家受命龍朔繼休鴻基發政施仁行葦之忠厚世積制禮作樂關睢之風化日興紀綱具舉於朝廷統會未歸於簡牘欽惟欽天統聖至德誠功大文孝皇帝陛下總攬羣策躬親萬幾思祖宗創業之艱難與天地同功於經緯必有鋪張以揭曠日必有述作以藏名山爰命文臣體會要之遺意徧勅官寺發掌故之舊章倣周禮之



六官作皇朝之大典臣某叨承旨喻俾綜纂修物有象而事有原  
質為本而文為輔百數十年之治蹟固大略之僅存千萬億世之  
宏規在鴻儒之繼作謹繕寫皇朝經世大典八百八十卷目錄十  
二卷公牘一卷纂修通議一卷裝潢成帙隨表以聞伏取進止

元文類卷十六

元文類卷十七

表

賀正旦表

劉敏中

歷頒夏正大春秋一統之書禮謹漢儀受圖貢四方之賀歡均朝  
野慶洽天人中賀剛健體元寬仁育物董官常而敷聖訓炳如日  
月之臨恤民隱而降德音翕叶地天之泰至和斯應景福維新臣  
等夙被寵榮忝司端揆無尺寸效仰裨財成輔相之功願億萬年  
永享伴奭優游之樂

賀冊后表

楊文郁

聖德日新端齊家以身之本坤元位正備臨軒發冊之儀慶溢九  
重歡騰四表中賀受天成命遵祖詒謀謂王教攸基莫若人倫之  
重然治道之至庶資內治之勤昭法象於軒星崇聲明於椒掖以  
贊嚴宸之孝理以協太母之徽音臣等服在近司顛觀盛際道符  
義易占順承載物之亨願擬堯封申富壽多男之祝



賀元旦表

姚登孫

寶曆晨開恩誕敷於朔紀瑤池春滿愛先輯於東朝日月清華神  
民闔憚中賀道符範統躬啟皇圖懿範難名備聖人之全德仁規  
妙運濟天下於太甯壽並兩儀福延萬世臣等班聯文石職忝膠  
庠仰測卦爻喜三陽之通泰俯陳歌頌奉億載之怡愉

賀建儲表

姚登孫

坤元居上挾皇統於中天震器有歸衍孫謀於奕世神人闔憚河  
岳清甯中賀聖德難名德音夙著心游太極兩儀妙玄範之功身  
佑三朝九鼎重宗磐之勢適春宮之肇建知景命之永延臣等嘉  
與諸儒欣逢盛典日月啟重光之運幸囿照臨華嵩開萬壽之期  
惟屢歌頌中賀

賀聖節表

李之紹

寶曆建元協重華之嘉運瑤光貫月開上聖之貞符盛德在秋昊  
天有命中賀聰明稽古孝友根心不顯文謨端拱巖廊之上達觀

新邑式均道理之中揆震夙之昌辰卜豐穰於今歲璇璣肇紀玉  
斗儲祥臣等肅謹班聯遙瞻粹穆宣昭鴻業載賡七月之詩耆定  
武功願繼萬年之雅

賀聖節表

鄧文原

天開景運篤有道之曾孫電繞神樞受介福於王母觚稜瑞靄閭  
闔臚傳中賀誕紹鴻圖不承駿命至仁育物得秋而萬寶成盛德  
在躬居所而眾星拱當立經陳紀之始為施仁發政之規郊廟肇  
禮朝野胥樂臣等名叨玉署目極璇霄廣文王有聲之詩載歌律  
呂衍殷宗無逸之壽虔祝華嵩

賀正旦表

盧亘

瑤圖星拱禮盛三元璇宇天臨懽同九有煥采文於懿範洽聖孝  
於英猷中賀迪詰徽柔濬幾淵靖崇勳廟社消羣慝而佑顯謨決  
策宮闈定神器而凝景命妙用夙諧於坤載大明參懋於乾剛臣  
等久玷中書肅承內治儀新鴻號深仁昭被於綿區嘉錫隆禧慈



訓永光於汗簡

賀親祀太廟表

延祐七年

九重御極太平端拱於中天萬舞奏庭盛禮告成於清廟羣方胥贊百辟交孚中賀剛健日新聰明時憲祖有功宗有德衍歷服之無疆車同軌書同文底烝民之作又袞冕華昭於日月笙鏞和協於神人崇億載之洪基舉累朝之曠典臣等忝司政府肅侍齊宮

寶歷在躬祗服祖宗之訓太宮修祀於昭禮樂之文海宇均安神

天曆元年

虞集

人交暢中賀德崇恭讓道積寬仁艱難具察於民勞後戴密繇於天授卿雲就日護璽綬以來歸瑞雪宜年洗干戈而載戢圭衮會龍章之盛簫韶致鳳羽之儀臣等備位台衡依光宸極羣工述職贊文治之成功萬壽膺符受明禮之純嘏

賀聖節表

虞集

春回正月律和舞鳳之庭日浹芳甸瑞紀流虹之渚縉儀存舉治象更新中賀盛德在躬至仁育物紫微華蓋煥乎經緯之為章朱草醴泉妙與生成而合化天開壽域人樂熙辰臣等弱翰無功清光有赫對揚休命絲綸緝繡黻之文歌頌永年簡冊載衣裳之治

賀正旦表

虞集

陽春發育明新若日之方中正朔會同溥博如天之為大顯承盛化協慶昕庭中賀神武成功至文備德綜萬機而益裕達四聰而弗遺禮樂從容建用維皇之極圖書宣朗緝熙於穆之純假郊廟以受釐率臣民而錫福臣等叨陪鼎鉉式贊鈞陶時和歲豐願保無疆之祚風淳俗美永歌有道之朝

賀正旦表

宋本

泰元神筴天開六甲之端北斗帝車星直三朝之旦立政伊始與時皆新中賀睿知有臨明哲作則萬機初振熙鴻號於紀年九廟載安被龍光於宗黨誕啟用材之路式推澤物之仁臣等身際昌



辰首班著位風行雷動廣歌殊愧於古初日升月恆善頌惟先於壽考

賀親祀南郊表 至順元年

謝端

四方于理事天致恭已之誠三年而郊卜日叶用辛之吉功成治定禮備樂和 中賀 端拱無為純一不二肇舉明禋之典載嚴升配之文大呂黃鍾音協雲門之奏鎮圭纁籍輝聯蒼璧之華祥風和氣之與游景星慶雲之疊見穹元集貺宗社蒙休臣等叨佐清朝欣觀熙事列園壇之八陛幸陪漢時以侍祠陳泰階之六符願舉兕觥而上壽

賀正旦牋

夾谷之奇

位拱少陽仗簇黃麾之曉氣暄太簇祥開青禁之春邦本益隆興情胥慶 中賀 仰遵聖訓參決政機執中傳精一之心作貳毓元良之望重明繼照陰邪常遏於未形九四在淵陽德克潛於已著茲

履端之云始宜介福之孔多某等素乏長材叨居端尹星輝海潤莫酬沾被之恩月恆日升第祝綿延之算

賀千秋牋

楊文郁

陽常居於大夏方收養毓之功震一索為長男載啟亨嘉之會慶鍾甲觀歡溢寰區 中賀 克哲克明允文允武春坊翊善茂隆邦本之貞曉寢問安長奉天顏之喜茲臨彌月之節宜膺百順之祥臣等竊備詞官進趨庭賀幸聞樂府奉重暉重潤之章請合輿情上俾熾俾昌之壽

賀千秋牋

袁桷

心依宸極前星耀於明堂卯為春門大電環於甲觀盛德集福至和儲祥 中賀 體仁法元師古合道溫恭事帝密輔相以生成問學積躬益緝熙而光大疇咨黃髮之彥庸佐青閭之規茂對誕辰宜膺純嘏某等肅瞻儲禁忝職詞林鶴駕陳儀喜承顏於兩殿鴻圖衍慶願介壽於千秋



賀正旦牋

虞集

玉燭調元播陽春於萬物  
禕衣乘翟奉景福於一人  
權溢宮闈慶延宗社中賀  
柔嘉維則博厚無疆  
帝業中興五色鍊補天之石女  
功內治七襄成報日之章  
膺瑤冊之禮華衍金支之奕  
葉茂迎蒼厯益介洪禧某等  
備位外廷稱觴前殿二南風  
化歌關雎正始之音萬年  
室家樂既醉太平之運

箴

綱齋箴

鄧文原

元坦使君以綱名齋屬巴西  
鄧文原敷繹其義乃作箴曰  
維古哲人德美內植揚休  
弗矜反躬藏密在易坤厚  
含章可貞明夷莅眾用晦  
而明善欲淵潛志無銜飾  
辟諸謁襲身章之則彼夸  
毗者內視欲如迺崇澆偽  
以眩羣愚鼓鍾有聞屋漏  
滋愧爾車甚澤而人斯瘁  
繫南郭子尚綱是遵匪曰  
隱几式企書紳慎獨箴  
安熙

可尊者德可畏者天無處不有無時不然念慮之發必有其幾勿  
隱其隱勿微乎微從事於斯是曰慎獨自此精之萬物並育毫髮  
有開天理弗存利欲紛拏厥心則昏於乎戒哉敬作此箴書諸座  
隅以警某心

銘

簡儀銘

姚燧

舊儀昆侖六合包外經緯從橫天常衰帶三辰內循黃赤道交其  
中四遊頻仰鈞籥凡今改爲皆析而異繇能疏明無窒於視四遊  
兩軸二極是當南軸攸杳下乃天常維北欹傾取軸架應鏤以百  
刻及時初正赤道載周列經星三百六十五度奇贏地平安加  
立運所履錯勒于隅若十二子五環三旋四衡挈焉兩綴闕距隨  
振留遷欲知出地究茲立運去極幾何卽遊是問赤道重衡四弦  
未張上結北軸移景相望測日用一推星兼二定距入宿兩候齊  
視巍巍其高莫莫其遙蕩蕩其大赫赫其昭步仞之間肆所躋攷



明乎制器運掌有道濼簡而中用密不窮歷校古陳未與侔功猗  
歟皇元發帝之蘊昇厥義和萬世其訓

仰儀銘

姚燧

不可形體莫天大也無競維人仰釜載也六尺為深廣自倍也兼  
深廣倍挈釜兌也振漑不洩繚以澮也正位辨方日子卦也橫縮  
度中平斜再也斜起南極平釜斂也小大必用入地畫也始周浸  
斷浸極外也極入地深四十太也北九十一赤道斷也列刻五十  
六時配也衡竿加卦巽坤內也以負縮竿子午對也末旋機杖窾  
納芥也上下懸直與斂會也視日漏光何度在也暘谷朝賓夕餞  
昧也寒暑發斂驗進退也薄蝕終起鑿生殺也以避赫曦奪目害  
也南北之偏亦可槩也極淺十七林邑界也深五十二鐵勒塞也  
淺赤道高人所載也夏短冬永猶少差也深故赤平冬晝晦也夏  
則不沒永短最也二天之書曰渾蓋也一儀即揆何不悖也以指  
為告無煩喙也闔資以明疑者沛也智者是之膠者怪也過者巧

歷不億輩也非讓不為思不逮也將窺天朕造物愛也其有俟然  
昭聖代也泰山礪兮河如帶也黃金不磨悠久賴也鬼神禁訶庶  
勿壞也

漏刻鐘銘

姚燧

靈臺設簾窺以尊元開大呂非其弔摯曠善鼓手自煩宮商良諧  
等釜盆請無以聲以功論一日之中兩所昏一鳴一刻有度存九  
圍一圃折柳樊黔首時作時饗殫日月如是相告敦三辰聽命循  
軌垣四序不忒迭寒暄萬物生翕盈乾坤何獨治歷道此源凝熙  
帝績高義軒積世而運會而元吉金之舌慎莫捫輟響誰其代天  
言

渾象銘

楊桓

於昭聖皇德惟天希密察乾坤動符化幾乃命太史考順求違制  
器象天具體而微度數棋布星次珠輝道分黃赤擬議玄規兩極  
低昂中主璇璣置方象地極樞以維地本天函術取外圍反而觀



之其趣同歸體雖至約用足明  
天外觀天之裏  
合象之背日月交錯五行進退造化無窮不出戶內始終參求簡  
儀是配於昭聖皇夙夜睿思先天天合後天奉時先後惟天聖皇  
無為

玲瓏儀銘

楊 桓

天體圓穹三辰在中星雖紀度天實無窮天度之數環周三百六  
十五度四分度一因星而步推日而得月次十二往來盈虧五星  
參差進退有期判為寒暑分為四時太史司天咸用周知制諸法  
象各有攸施萃於用者玲瓏其儀十萬餘目經緯均布與天同體  
協規應矩徧體虛明中外宣露玄象森羅莫計其數宿離有次去  
極有度人由中闕目即而喻先哲實繁茲制猶未逮我皇元其作  
始備實因於理匪鑿于智于萬斯年寶之無墜

高表銘

楊 桓

聖人修政唯農是本農之所見時則為準過與不及民安究之勳

措由中聖人授之時在於天術何以得制器求之乃見天則日月  
周運閏餘歲成盈虛消息在表斯微分至既辨氣序乃會朔晦一  
定弦望由對爰演斯厯用詔民時百工充治庶績用熙表中以正  
圭平以直不言而論與時偕極天德芒芒參以明焉民生皞皞振  
以興焉惟昔八尺景促分密為用雖可每艱辨析聖皇御極百度  
惟新乃五其昔其用益神表高之法先哲匪憚其顛景虛取的是  
患表梁上陳景符下依符竅得梁景辰精微揆月有方闕几是映  
几限容光圭表交應器術之密推步之精厯古于今斯畢其能上  
天之載無聲無臭聖皇儀刑在其左右仁民育物以對天祐眉壽  
萬年寶茲悠久

太史院銘

楊 桓

天厭下土之亂眷求聖哲以作民主太祖聖武皇帝應運挺生以  
神武勦除禍難遂定皇元之寶命累聖肖德增功續烈逮今憲天  
述道仁文義武大光孝皇帝稟資聖神自潛藩邸躬率師旅有征



無戰天心人心攸屬攸係及位中國大建都邑任賢使能分設百官政教既行乃制禮作樂廟享祖宗仍遣將帥四征未臣始統一六合周臨天際端居無爲飛潛動植仁惠溥露民旣無事唯夫耕女織工器商貨自勞衣食聖慮周悉凡厚民生者無不爲之以農事爲四民衣食之本旣設有司以董其勤又思爲振舉之務乃立太史院以講明天道敬授民時焉至元十三年上以循用大明歷久而失當欲覈其制以太子贊善臣王恂業精算術凡日月盈縮遲疾五星進退見伏昏曉中星以應四時者悉付其推演尋遷太史令以都水監臣郭守敬穎悟天運妙於制度凡儀象表漏考日時步星躔者悉付規矩之尋授同知太史事歷成遷太史令以前中書左丞臣許衡爲命世之賢凡研究天道斟酌損益者悉付教領之輔以集賢學士臣楊恭愷其提挈綱維始終弼成者實前中書左丞轉大司農臣張文謙尋以昭文館大學士領太史院事凡工役土木金石悉付行工部尙書兼少府監臣段貞以經度之凡

儀象表漏文飾匠制之美者悉付大司徒臣阿你哥十六年春擇美地得都邑東墉下始治役垣縱二百布武橫減四之一中起靈臺餘七丈爲層三下皆周以廡其下面日中室爲官府以總聽院政長曰令次同知院事次僉院事以宰輔之重領於上者無定員其屬有主事有令譯史有幹事有庫局之司左右旁室以會司屬議凡推測星歷諸生七十人葢以三局一曰推算其官有五官正有保章正有副有掌曆分集於朝室二曰測驗其官有靈臺郎有監候有副三曰漏刻其官有挈壺正有司辰郎分集於夕室凡器用出納於陰室中層離室以列景曜巽室以措水運渾天壺漏坤室以措渾天象蓋天圖震兌二室以圖南北異方渾天蓋天之隱見坎室以位太歲乾室以貯天文測驗書艮室以貯古今推算歷法臺顛設簡仰二儀正方案敷簡儀下靈臺之左別爲小臺際葇周廡以華四外上指玲瓏渾儀靈臺之右立高表表前爲堂表北奠石圭圭面刻度景丈尺寸分圭旁夾以連葇可圭上露天日



為度景計靈臺之前東西隅置印歷工作局次南神厨算學設位  
 如上初改歷之議既行即遣官四遠測景以相參驗若高麗瓊崖  
 成都和林蓋擬義和仲叔之命又自上都南五千里中若東平陽  
 城鄂吉等州各遣官測驗以求遠近之數十七年冬至以新歷進  
 遷官賞賚有差十八年頒行之十九年以祕書少監臣趙秉溫遷  
 昭文館學士知太史院事明年啟皇太子旨以諭德臣李謙撰歷  
 議二十一年以左侍儀奉御臣阿刺渾薩理遷集賢學士尋遷大  
 學士並兼太史院事遂以二十三年春同進歷經屬共二十一卷  
 仍以餘書未成者奏以臣桓與其議若歷經歷式等序若表漏儀  
 象等銘臣桓既冒言矣又拜手稽首原立院之初序而銘曰  
 天鑑下民亂靡有定孰能一之聖哲受命太祖神武始開乾坤  
 業垂法以貽後昆繼緒紹功剷除妖昏逮今聖皇天錫勇智內修  
 法度外遣將帥伐辜弔民罔越厥志炎方歸命赦其後至武功告  
 成萬國來萃同軌同文重譯奉贄小大悉臣師旅以靈思與萬方

永保太平黎民定居蕃息生生為衣而蠶為食而耕士勸其賢工  
 勸其能關阨夜開商旅通行民雖克勤罔適天宜匡之翼之以煩  
 聖思乃立太史法遵黎義欽若天道敬授民時教其動作時種時  
 穫教其趨向是宜是吉五禮之舉選時為日代卜代筮不勞龜策  
 期措斯民康壽之域民祝聖皇眉壽萬年民祝聖皇五福駢臻民  
 祝聖皇億兆子孫七政順軌陰陽調均時雨時暘化育秋春蕩蕩  
 巍巍盛德何言天覆地載太平無垠

瓶城齋銘

為淮東憲司知事凌德庸作

閻復

利慾之兵或隳吾城躁厲之機或發吾瓶墨其守不若修仁義之  
 千櫓金其緘不若駕聖賢之說鈴若然則城何懼於脫局瓶何患  
 乎建瓴哉

王孝女旌門銘

劉因

女家容城西以母喪感念遂不嫁終身州上其行御史按實禮部  
 令旌表之內翰盧公署其門曰孝女王氏縣人劉因銘曰



孰不娶終身曰魯山之元道州之陽史名卓行何謂非平常二子  
且然女奚責望虛公表之何用以戒荒

訥齋銘

吳澂

君子之訥不盡其有餘小人之訥將言而囁嚅得善敏於行近仁  
者歟是為君子儒非小人儒

蘇氏藏書室銘

袁桷

六學鴻烈代天昭明精思纂微辭以立誠匪事於言不文奚宣析  
理日繁直致行傳謂默足以通絕其知聞敬焉孰持道焉孰存趙  
郡氏蘇崇其書楹剖決雲章經緯有程靈根湛虛服習粹精廣以  
觀萬約以守一迎之莫元倚兮不躡仰止元聖學海彌溢

虛室銘

虞集

天地萬物寓形太虛何有非實虛則俱無有室非虛何名虛室室  
有毀成而虛無成無受毀質室之在虛無不加廓有不加室善居  
室者反同於虛萬古一息

奎章閣銘

虞集

天曆二年三月吉日天子作奎章閣萬機之暇觀書怡神則恒御  
焉臣等奉勅刻銘曰

維皇穆清中正無為翼翼其欽聖性日熙迺闢延閣左圖右史匪  
資燕娛稽古之理經緯有文如日行天爰刻貞玉垂美萬年

知許州劉侯民愛銘

李朮魯翀

至大元年秋奉直大夫許守劉侯既終更矣郡縉紳先生田浦城  
劉興國及舊家望族郡人之父兄長者謀劉侯字民之政於石屬  
筆小子狃懇讓不獲敢蹟侯行事謨次之大德龍集乙巳夏六月  
侯下車家政斬然闐無雜謁其在猷為苟有利民無或不舉許北  
趾於汴南揖淮楚素號多事侯材識精敏百務叢劇聲容舒徐刃  
嬰而節解吏無稽牘獄無泥訟不尚苛猛而凜不可犯自公而優  
入則杜門端晏游泳典籍出則賓禮先覺隆獎學校三時既隙則  
帥郡屬即校官請益經史親為之倡繇是郡政翕然侯澤物仁而



有方耕鑿樹畜求底實效及終三年諸軍數收外丘陵原隰墾闢  
殆盡初郊農買穀市僧連郡豪徼糴外關擅輕重以售嫗弱胥困  
乃立斗斛市距州治重糴翔價之法趨者如歸糴雖升合以上  
無敢摧劬民農兩利之侯以事出法漸弛復襲舊至杖大馭數人  
法復立民頌歌之歲丙午河南諸郡饑流瘠日至春穀價勃湧首  
發私庾大縮價聽民糴募富民粟數萬鱗出糴市慮糴有不均也  
於諸社責其長日閱數賦與之夏雨戕麥得請出郡廩積年鼠耗  
鑿米薄價紓民春夏徂秋無涸瘵者明年荐饑羸孳狼戾請省出  
公緡賑之民爲蘇中統抵大德凡所立有司法程討閱簿書彙帙  
度實而據守不貽故勇於拯民而善禦其害省大核屯田臨潁鄧  
艾口民稻田三百頃人有說省曰此古屯也可復築之下侯按實  
之侯按至元中司農研水利拓民業隆平生息之道也業此皆三  
四十年暴取之民措何地省不躓以兵民恫疾之狀迭陳不可卒  
止宣徽歲遣使征羊馬法三十取一至則肆虐取人莫誰何度其

至令縣民大書其法於堊壁患遂止程約五縣繇賦齊均凡出錢  
縣官市物民閒曰和買民產所有猶未易供無之則估百倍賦官  
郡縣苦督責無敢拒貪肆者亦陰幸漁獵雖瘡痍其民不恤侯深  
患之士有均賦之苟無之抗簡覆陳不允不止鄆陵扶溝產紅藍  
粹不時買萬鉅時其地年歉而藍霧民大驚蹙省以侯敏幹略趣  
買之相其故力請罷之是不獨仁於許又有以仁其隣也省檄論  
囚荆而時荆楚大水民飢歸請撤禁山澤以活危墊省移中書如  
請民濟於阨是其澤不獨囿於近又有以及其遠也其聽訟明察  
而果哀矜惻怛未始不行其閒襄城南距湛河與葉交壤葉民之  
鹽取解池齊鹽止襄舊樹石河之南塹鑄以畫鹽之法葉令妄徙  
而北侵襄民近百家喉漕屬以其法酷寘之兩縣飛狀鬪辯葉引  
陝漕合攻襄中以危法時侯偕省使者會決之卒以理摧葉復石  
舊疆民底寧河南先民疎土曠田價至弱雖有質鬻而契券潤略  
鹵莽逮今民日生集叢藪灌莽盡化膏沃價倍十百鬪鬪滋熾豢



吏蠹法孔穴焚出至有綿曠歲時而莫之決者侯既清白復詳聽覽而洞情偽佑是懲非至未半歲決以百數訟爲哀民葛英女嫁而奔人英蹟之獲他婦憚嚴其舅姑而私竄外者寘家令妻教壻族事如其女返魂他屍者歸壻不納一男子果爭之訟不決侯行縣詰之情立出民有以計誣罣其同行者訟縣醉亡楮緡千獄逮人數十訊不白屢愬州至據地以慟覘色詐立屈之決囚南陽主婦告奴酖其夫三日死榜楚極憯毒獄久不立侯讞曰實有毒立死無少緩者簡孚獄供有寃立貰之其聽決多此類也舊水旱禱祠桑門羽流雜巫覡囂喧無益一不取齊祓精壹以走羣望靈貺昭答嘗春早禱八龍井明日雨大作民有擁香拜舞治所者人旣德侯侯善使人而知所務長社尉解僻遠爲創築近郡治使與庫傳狂相連峙檄循捍衛弭患無形三皇肇立民極令天下通祠而舊郡祠陋丕構新之崇葺廟學植檜柏六十四本築室藏書購塑工體先賢貌影自濂溪及紫陽朱子像而祠於學故實凡相交

承則帥案屬厚贖禮去者於侯又最豐終讓卻之始終銖髮無取及是人益信在政晷晷嶽牧風紀屢倚用之軋強鋤暴在人所不敢爲侯不憚也將退政之日其下讐伏如甫至談者偉異之名聲籍籍上游諸公多譽籍之交剡騰薦不一二數士論稱奉法恤民有古良二千石之風知言者是之侯名天孚字裕民家大名以國書生從事中書出判東平移漕司擢知冠州遂遷許風岸嶄立器度凝遠春秋方強摠用未旣加忠孝豈弟出天稟能以學濟之淵乎莫測也浦城名九疇興國名庭瑞皆仕焉而已者聲實素著郡人望所推先郡旣不忍弭忘侯德兩公倡率之人彌咨歎其公云紳旣叙其詳乃撮而詩之庸冀郡人寥邈之思辭曰  
郡侯繩繩三歲逆旅孰莫我矜侯吾父母我飢以寒煖我餽我鳴  
袖於家田墾在野繫我窘躓均恫其身膏以雨澤煦吾陽春惟古  
立學定民之命治有本末禮樂刑政誰蔑棄之謂能其官我侯至  
止德馨如蘭士蒙顛顛侯教載之縉紳煌煌侯勞來之孰匪人哉



而玩侯法將薙芟之我用是愨善達而施天下之兼寧獨吾私一  
邵是淹車聲麟麟民莫侯攬有堅其磻鑄配琬琰鼎鼎其來疇允  
侯蹟跂予望之其永無極

安氏尊經堂銘

李朮魯獅

明明尊經安氏堂之用有儆惕予其銘之於在古昔挺起神聖越  
紹上帝昭我明命暨蒼姬氏四術迺崇詩書禮樂順古範鎔文武  
道衰四教崩弛孰其拯之天縱夫子龍馬獻圖用著著策吉凶悔  
吝開我人則二禪三繼曰帝曰王典謨訓誥明我天常志欲有言  
刑於詠誦雅頌得所神人以和王綱失維列侯遞霸其敢僭踰筆  
討無赦是謂四府其用不窮大禮大樂升降汗隆宇宙有經終古  
莫忒民無能名功載人極鼎鼎儒者相與守之孰吾堯桀相與培  
之曾子思孟荀董王韓周程張朱以達聖元不息不泯皇衷民彝  
其有能奮立百世師安氏東垣世以儒名味道之醇服義之精百  
氏謏聞寧不有當處宜下陳經無二上至小無內至大無外晦不

加蹙顯不加泰風雨震凌併幪是屋六籍鳳峙疇匪雌伏安父之  
嗣伯仲叔季穉子韶孫繩繼繼豈徒藏之斯務明之豈徒尊之  
斯務勤之其徒之賢蘇伯修甫將以所聞往相告語多歧亡羊克  
敬克念無或怠墮請以銘鑑

儼思齋銘

楊剛中

理究斯明為殊為同學求斯詳疇初疇終匪心斯圖何彰弗蒙既  
端爾容既肅爾躬冥凝虛遊視遺聽空思而以斯無微不通跛倚  
踞歆必弛于中矯笑躁言必隳而功戒哉無忘惟道之融



元文類卷十七

Blank columns for text in the right page.

元文類卷十八

頌

賈侯修廟學頌

吳澂

世祖皇帝既一天下作京城於大興府之北其祖社朝市之位經緯塗軌之制宏規遠謀前代所未有也至元二十四年設國子監命立孔子廟暨順德忠獻王哈刺哈孫相成宗始克繼先志成其事而工部郎中賈侯董其役廟在東北緯塗之南北東經塗之東殿四阿崇十有七仞南北五尋東西十筵者三左右翼之廣亦如之衡達於兩廡兩廡自北而南七十步中門崇九仞有四尺脩半之廣十有一步門東門西之廡各廣五十有二步外門左右為齋宿之室以間計各十有五神厨神庫南直殿之左右翼以間計各七殿而廡廡而門外至於外門內至於厨庫凡四百七十有八楹肇設於大德三年之春訖功於大德十年之秋於時設官教國子已二十年矣寄寓官舍不正其名丞相以為未稱興崇文教之實



也乃營國學於廟之西中之堂為監前以公聚後以燕處旁有東西夾夾之東西各一堂以居博士東堂之東西堂之西有室東室之東西室之西有庫庫之前為六館東西嚮以居弟子員一館七室助教居中以莅之館南而東而西為兩塾以屬於門屋四周通百閒踰年而成不獨聖師之宮巍然為天下之極而首善之學亦偉然聳天下之望遠邇來觀靡不驚駭歎羨其高壯宏敞蓋微丞相其孰能贊承聖天子之德意而微賈侯亦孰能闡張賢宰相之盛心哉侯之董役也晨夕督視不避風雨寒暑措置分畫一一心計指授工師莫能違焉陞本部侍郎又陞本部尚書出領他處營造事身雖在外心未能忘廟學也至大二年還朝拜戶部尚書首詣廟學環匝顧瞻如其家然嗚呼世之居官者大率簿書期會刀筆筐篋是務知政治之有原名教之可宗者幾何人哉人咸以為迂而侯拳拳汲汲惟恐或後蓋其資識卓矣侯少時為憲府屬憲長誣其副柄國者仇正直欲置之死數十人皆將連坐證左迫於

拷掠悉附和以成其誣侯與在數中獨守正不阿徇淹繫三載卒不變移受誣著籍是得脫自戶部尚書而參議省事也會有羅織之獄侯議詳獻大忤時宰幾與同罪賴救解以免嗚呼侯之為人如此宜其於聖道儒術深有契也非資識之過人而能之乎侯每以范文正期國學諸生激聞而愧輒面赤汗下夫文正之為文正無他亦曰先天下之憂而憂後天下之樂而樂耳嗚呼安得人人不負侯之所期者哉侯名馴字致道濟南鄒平人將歸其鄉故著侯之所以有績於廟學者為頌至大四年三月朔國子監丞吳澂敘詩曰  
於赫皇元澤彌八埏翼翼京師風化攸先孔道曷明千古日月帝曰廟之以對光烈顯允龐臣欽輔神孫祖訓是承往聖是遵相謂而馴而職而職乃基乃構乃墁乃瑩侯祇相言弗懈以虔新宮巍巍有倬其騫宮墻之西學宮爰作我宏爾居爾懋爾學爾士來游四方具瞻爾則匪遙像貌聿嚴恂恂賈侯克敦克敏孰挫其廉孰



混其畛一正不阿百折不回族斯糾紛郭之恢恢廟學之崇天子  
之德丞相之功賈侯之力 右十章章四句

青宮受寶頌

虞集

天曆二年六月己酉皇太子受寶於行幄臣等拜手稽首而言曰  
臣聞古之所謂能以天下讓者審幾於先事謂之至德既勅而庸  
異謂之予賢是皆人道之常而未若今日之盛者也我皇太子以  
仁文之資知勇之德當撥亂反正以繼祖宗之統則躬當大難嬰  
犯霜露而不<sub>避</sub>及功成治定既膺歷服之歸則推奉聖兄謙居儲  
貳而不伐剛明之斷堅於金石而無變素定之誠質諸天地而無  
疑求仁得仁若處固有樂道忘勢訢然無爲此實帝王之所難能  
古昔之所未有而卓然特見於前後千萬世之內者也臣嘗讀周  
易而觀於乾龍之象自潛至躍時升位異九五天飛中正極矣益  
進而上庸知退夫而仲尼之贊上九曰唯聖人知進退之正言非  
聖人不能及此噫仲尼發此義於千五百年之前而昉見其事於

聖代宗社生靈萬世無疆之福也於乎盛哉臣等幸以文學得備  
延閣之顧問親逢盛禮爰敢作頌以獻頌曰  
於穆皇儲文武聖明於赫大帝受命輯成天運日行既明既健神  
交意孚曾是修遠帝載龍旗其行遲遲萬民俟來皇儲有思載思  
載瞻于廬于旅式好在原莫敢甯處風雨孔時道無游塵肅肅鑾  
車通宵及晨帝曰勞止毋趣行適會言近止交喜更慨灤陽之京  
世皇所營我毋即安次於郊垌垌有豐草雨露旣渥差垌於牧繁  
纓濯濯皇儲攸止百靈具扶羣臣受詔奉寶來趨維時范金龍光  
上燭匪舊以新景命攸屬寶來自南追琢有章卿雲隨之五色景  
芒有親有尊有友有愛以承武皇聖孝斯在古人有言兄弟家邦  
咨爾臣庶於乎勿忘史臣作頌不昭盛德旣壽以昌子孫千億

駐蹕頌

李昉

繼天體道敬文仁武大昭孝皇帝卽位修明世祖皇帝隆平故事  
以故東平忠憲王之孫司徒忠簡王之子拜任丞相中書至治元



年詔若曰忠憲弼我世皇功在社稷德在生民其勅詞臣卽王所  
有范陽采地朔南康莊碑之昭示悠久冬刻銘既完十有二月丞  
相承詔歲事凡犒工勞眾郡邑無所擾饋賀無所受天子遣使牲  
牢之饗秬鬯之禋數異禮隆不一而止父老聚觀或至感泣明年  
春正月帝幸涿州至碑所重瞳凝竚顧瞻有懷秋九月幸易州還  
丙午帳殿碑垣之南駐輦御殿上顧丞相若曰汝祖考之績之盛  
世載帝室維朕不忘亦惟汝之賢有以相朕益懋世德故也丞相  
頓首謝翌日既旦大官饌已上步自帳殿御金椅座碑右丞相稱  
觴獻萬歲壽從臣以次進觴天顏和怡甚久迺去丞相諭紳曰皇  
上眷我祖考至此不刻以志則未有以稱汝其銘之紳祇栗奉命  
用敢敘曰太祖皇帝開創大業忠宣王孔温窟哇太師魯國忠武  
王木華黎佐佑神謨拓定疆宇繼世國王皆著大功忠憲王繇國  
王世胄年十有八嶷然以鉅德大人相世廟統六合舉百度底雍  
熙仁覆天下以垂大猷以迪來哲皇上念垂統之艱難守成之不

易懷往烈慰股肱聖度淵深非一介臣能闕萬一敢卽所聞冕以  
獻頌曰

赫赫聖明嗣大寶位祖武斯繩昭我皇制慨想先正孰佐我家奄  
奠八紘帝業以華昔我太祖疆理萬國忠宣武功高輔翼雷雨  
方屯忠武汎掃華夏之民國王蔭葆巍巍世皇幅員既同弼成治  
隆忠憲之功奕奕忠憲虎變莫測年未及冠烜著明烈端冕正笏  
不動色聲雋傑在職儒碩在廷何昧不昭何墜不舉何紀不紹何  
遠不睹二十年間再秉鈞軸天極地蟠孰匪亭毒至元始終中外  
人心大耄韶童統慕至今天日清明終古莫晦柱石廟廊宗社永  
賴相國今誰忠憲盾嗣民之望之忠憲是繼克繼克庸滋益光大  
一以至公熙我天載帝謂侍臣丞相之賢家世所因其勅詞垣于  
忠憲勛大侈以文配永河山以竦見聞涿鹿范陽王有采食山川  
蒼蒼北拱帝極蛟螭盤拏大鼈負之德音不廟神訶護之六龍翱  
翔馭日霄漢再狩郊垌目此銘篆淵鑑昭回駐驛永懷廓清煙霧



以霽九垓從臣焜煌千乘萬騎能不激昂以勵忠義世世夔契生此德門君臣道合豈徒示恩忠憲來雲源源裔臣頌茲刊不告無既

馮侯去思頌

顧文琛

皇帝卽位之明年詔地官攷輿地圖舉天下縣邑民數之繁者陞爲州置賢守臣以幸百姓於是越之諸暨實得今馮侯翼越在漢爲會稽郡其民剽輕漢嘗以貴近臣爲之守猶或不振輒報聞罷自唐以來越爲雄藩諸暨爲劇縣尤號難治侯始至州訪民疾苦知姦猾爲民害由是嚴爲之禁里社長有藏匿者同其罪姦猾望風引避民賴以安鄉胥舞文虛增稅石民以抑納爲苦侯洞察其姦令民得自陳訴積年弊欺一旦盡去先是吏卒旁午田里無虛日侯至悉禁戢之亦無廢事有以私謁莫夜禱於侯者侯輒斥去之邦之士喑喑稱廉侯聞笑曰廉士大夫常分也廉恥道喪久矣吾豈詭眾哉吾求以不負吾所學耳凡豪強撓法者必痛加摧抑

無少假借既不逞則羣怨之侯不爲動郡政之暇輒引諸生講習經史州吏環聽之凜凜乎有富而教之之意會行省以浙西某路荒田失實及瀕海郡鹽法多弊檄侯往問州民數千人遮道請留不得請則相對涕泣如失慈父侯奉檄所至弊衣徒步以察微隱其所以誦姦豪而伸孱懦者甚於爲州嗚呼若馮侯者求之古循吏殆未見其比也或曰班固序漢循吏五人而龔黃爲之最如龔黃者獨不可爲侯比乎僕應之曰漢循吏易能也馮侯未易能也漢郡地方千里太守秩二千石考最者輒入爲九卿次不失爲三輔位尊而權任專故其道易行其化易成而其事可勉而至也今自州而上有會府有部刺史方伯連率而知州官五品秩不滿五百石制其權而撓其政者非一獨馮侯毅然不爲利疚不爲勢誦斷於必行其志然則龔黃爲馮侯之所易馮侯爲龔黃之所難烏可比哉眾皆譁然稱善則相率請爲文以頌侯德頌曰  
叢爾暨陽附庸於越生齒滋眾在今爲劇帝披輿圖命陟而州擇



賢守臣得今馮侯侯自西來羸馬弊衣邦人還觀且喜且疑侯始  
為政循循于干惟姦是屏惟弱是扶罔俾苞苴累我名節爾冰雖  
清我行惟潔堂堂乾坤如侯幾人天實遺侯惠我邦民邦民權呼  
更相告語始疑今信侯我父母昔侯未來骨肉流亡侯既來止爾  
農爾商帝憫下人病于荐飢水利田功乃懋乃同帝曰咨汝往貳  
其政侯拜稽首臣翼唯命我民有言侯毋疾驅天子有詔侯不敷  
徐世無陽秋孰祀侯德百世不穽視我茲刻

贊

魯齋先生畫像贊

王磐

氣和而志剛外圓而內方隨時屈伸與道翱翔或躬耕太行之麓  
或判事中書之堂布褐蓬茅不為荒涼珪組軒冕不為輝光虛舟  
江湖晴雲卷舒上友千古誰與為徒管幼安王彥方元魯山陽道  
州蓋異世而同符者也

書畫像自警

劉因

所以承先世之統者如其孤所以當眾人之望者如其虛嗚  
呼危乎不有以持之其何以居

王允中真贊

劉因

齒未老鬢胡為而白耶隱然含四海之憂鬢雖衰顏胡為而壯耶  
凜然橫干仞之秋竹石丹心砥柱中流百折而必東寸折而不柔  
其履危犯險幾禍一身然視循默苟容貽害當世者不優耶

質齋贊

蕭剡

國子助教祁君子京以質名齋自為記且銘之一時宗工秀人題  
詠盡其義矣齊人蕭剡掇其遺而為贊曰  
上古聖神仰觀俯察旁及鳥獸取象維八書契干戈登降控楬化  
成之具於焉以出窺乎煥乎重華位陟文命誕敷懋昭大德視民  
如傷于湯有光姬情孔思謨訓洋洋經緯三極時維至文世變風  
移覆其質云世之謂文古所無有游夏言行昭昭可考絺章繪句  
錦心繡口充棟汗牛世用曷取蔽天之明室人之靈繇政迄廣旤



斯以成卓哉祁君矜世之病質以自居求盡其性如彼流泉載浚厥源彼華彼實載殖厥根如黃尚白循循勿勿立德立言成已成物

晦庵先生畫像贊

吳澂

理義密微蠶絲牛毛心胃恢廓海闊天高豪傑之才聖賢之學景星慶雲泰山喬岳

臨川野老自贊

吳澂

身形瘦削春林獨鶴眼睛閃爍秋霄一鶚遠絕塵滓大同寥廓自鳴自和自歌自樂

李奉公畫像贊

程鉅夫

歷觀宰輔久無儒者潛龍羽翼公乃大雅帝曰舊學汝遂相子真儒之效此其權輿熙運方開明良起喜如龍如雲如魚如水任以天下可謂大臣勞謙得士清靜甯民想其風采金玉珪璧賜之畫圖式是百辟豈惟丹青盛德形容尙友凌煙黃閣清風

臨川吳先生畫像贊

虞集

業廣而精德周而尊釐析羣言以究斯文章甫玄端書冊左右豈弟君子天錫眉壽

西夏相幹公畫像贊

虞集

公姓幹氏其先靈武人從夏主遷興州世掌夏國史公諱道冲字宗聖八歲以尙書中童子舉長通五經爲蕃漢教授譯論語註別作解義廿卷曰論語小義又作周易卜筮斷以其國字書之行於國中至今存焉官至其國之中書宰相而歿夏人嘗尊孔子爲至聖文宣帝是以畫公象列諸從祀其國郡縣之學率是行之夏亡郡縣廢於兵廟學盡壞獨甘州僅存其迹興州有帝廟門榜及夏主靈芝歌石刻涼州有殿及廡至元間公之曾孫雲南廉訪使道明奉詔使過涼州見殿廡有公從祀遺象欷歔流涕不能去求工人摹而藏諸家延祐間荆王修廟學盡撤其舊而新之所象亡矣廉訪之孫奎章閣典籤玉倫都嘗以禮記舉進士從予成均於閣



下又爲僚馬閒來告曰昔故國崇尚文治先中書與有功焉國中  
從祀廟學之象僅存於兵火之餘而泯墜於今日不亦悲夫先世  
至元所摹象固無恙也願有述焉以貽我後之人乃爲錄其事而  
述贊曰  
西夏之盛禮事孔子極其尊親以帝廟祀乃有儒臣早究典謨通  
經同文教其國都遂相其君作聖施采顧詹學官遺象斯在國廢  
時遠人鮮克知壞宮改作不聞金絲不忘其親在賢孫子載圖丹  
青取徵良史

自贊畫像

虞集

邈乎千載之下而謂古今一時也眇乎五尺之軀而謂天地一體  
也廓乎不自知其所知也欲乎未能至其所至也俛乎若憂非有  
傷乎其內也泊乎若休無所待乎其外也服今人之服食今人之  
食同乎今之人聊以順吾際也讀古人之書頌古人之詩思夫古  
之人不知老之至也

大象圖贊

虞集

皇帝畫大象圖賜皇太子監察御史前典寶少監臣某承命裝演  
而寶藏之翰林直學士臣集再拜稽首而作贊曰  
有偉馴象貢自南域倬革鏤錫路車是服維皇在輿游目於式任  
重持安眠力知德燕閒以思寫之几格天章龍文臻妙造極嗟爾  
微勞尚軫宸臆師武臣能有不察識若稽包犧受圖布畫遠取不  
遺以咨神易擬茲形容克配古昔臣用述贊與世作則

橐佗圖贊

虞集

皇武肇迹宛宛龍漠不居其康輯乘爲郭有服維佗礪肉戴嶠毳  
旃帷房倬輓輦鞞軋軋千里載泉于橐黃頭羔裘騎引顧卻人習  
見聞聖獨有作深宮穆清思詔勒侑手著厥初伊勞匪樂公劉纘  
纘于邦式廓褭糧啟行致祚八百史臣作雅稽古允若

靜修劉先生畫像贊

歐陽玄

微點之狂而有沂上風雲之樂資由之勇而無北鄙鼓瑟之聲於



裕皇之仁而見不可留之四皓以世祖之略而遇不能致之兩生  
烏虜麒麟鳳皇固宇內之不常有也然而一見而六典作一出而  
春秋成則其志不欲遺世而獨往也明矣亦將從周公孔子之後  
為往聖繼絕學為來世開太平者耶

默庵安先生畫像贊

歐陽玄

寤寐乎明善誠身之書步趨乎格物致知之學關西三鱸未必榮  
於教授之四世荀陵八龍奚以過於伯仲之一壑豈非白茅重而  
忠信著玄酒醇而嗜慾薄者乎鍾期伯牙有同世而不相遇者吾  
故於默庵之神交而益以重容城之先覺也

威如蘇先生畫像贊

歐陽玄

英英紫芝皎皎素絲冥按遠討默識近思子雲精深季海孝友德  
人之容君子之守

郎中蘇公畫像贊

歐陽玄

維子寧父為名卿士其心塞淵如古君子既合於古詎諧於時職

是正直弗究厥施居家嗃嗃在國諤諤屹如長松矯如一鷲蚤以  
讜言屢忤權相晚著惠愛足食邊饒剛者必仁仁必有後宜爾有  
子簡自造秀遺像儼然不亡者存九原可作孰敢吏雲

潘雲谷墨贊

李洞

徂徠松雲貯玄谷道人居中抱其獨琅琅空山萬杵熟道人睡然  
開電目松雲化石石化玉崢嶸寶氣星漢燭頁之奎章月在檟龍  
光淋漓九宇福

李節婦馮靜君贊

王士熙

古之稱節婦人者不特織紵組紃而已良人不天未亡殆存出生  
氣於寒灰之中死者得安生者已傳其家嗃嗃馮氏百世猶夸







六十有五廣倍之深視崇之尺加十焉配享有位從祀有列重門  
修廊齋廬庖庫爲楹四百七十有八學在廟西地遜於廟者十之  
二中國子監東西六館自堂徂門環列鱗比通教養之區爲間百  
六十有七制加孔子大成之號祠以太牢贊釋奠雅樂江南復戶  
四十隸之春秋二祀先期必命大臣攝事皇帝御極陞先儒周敦  
頤程顥程頤司馬光張載邵雍朱熹張栻呂祖謙許衡從祀廣弟  
子員三百進庶民子弟之後秀相觀而善業精行成者歲舉從政  
又詔天下三歲一大比興賢能於是崇宇陞陞陳器服冕聖師巍  
然如在其上教有業息有居親師樂友諸生各安其學咸曰大哉  
天子之仁至哉相臣之賢工曹之勤其知政治之本原矣臣竊謂  
天地至神非風雨霜露罔成其功斯道至大非聖君賢相罔致其  
化人性至善非詩書禮樂罔就其器列聖相承謂天下可以武定  
不可以武治所以尊夫子建辟雍復科舉誠欲人人被服儒行爲  
天下國家用耳然則黎民於變時雍顧不在茲乎於戲隆哉臣鉅

夫謹拜手稽首而獻頌曰

皇元受命誕惟作京以撫萬邦既訖武功載修文教登其俊良於  
穆宣聖垂範罔極首尊而彰曰爾胄子弗典于學曷風四方學以  
聚之廩之餼之日就月將大德嗣服迺建孔廟迺經辟雍考制程  
財審時相宜適成厥功辟雍洋洋冕服皇皇羣士景從聖道既明  
渙號既加我皇御天執道之中軌物牖民翼翼乾乾帝學益弘庶  
政惟和我化用宣躋祀儒師賓興羣材丕紹厥先相古盛時訏謨  
遠猶罔不由賢天錫皇祖神聖文武以有萬國威何不加令何不  
行何求不獲惟學是務惟材是育下民允迪越厥左右咸有一德  
以匡乃辟維帝時憲惟臣克念濟濟茂碩禮明樂備永作神主播  
頌無斁

曲阜孔子廟碑

閻復

聖上嗣服之初述祗祖考之成訓興學養士嚴祀先聖自曲阜始  
制詔若曰孔子之道垂憲萬世有國家者所當崇奉中外聞之咸



曰大哉王言拭目太平文明之治粵明年元貞改元先聖五十三代孫密州尹治入朝璽書錫命中議大夫襲封衍聖公月俸百千秩視四品孔氏世爵弗傳者久至是乃復申命有司制考辟雍作廟於京師由是四方嚮風崇建廟學惟恐居後闕里祠宇燬于金季之亂閣號奎文若大中門闕存者無幾右轄嚴公忠濟保魯嘗假清臺頌厯錢佐營繕之費歲戊申始復鄆國後寢以寓先聖顏孟十哲像至元丁卯衍聖公治尹曲阜主祀事將圖起廢奎文杏壇齋廳黌舍卽其舊而新之禮殿則未遑也國初封建宗室畫濟兗單三州爲魯國大長公主附馬濟寧王分地置濟寧總管府屬縣十六曲阜其一也濟寧守臣按檀不華恭承詔旨會府尹僚佐鄉長者謀曰方今聖天子守成尙文此鄉風化之源禮義之所從出爲守臣者敢不對敷休命以廟役爲任首出泉幣萬緡眾翕然助之傭工顧力市木於河輦石於山掄材於野棠棟櫨楹礎之屬悉具又得泗水渠堰積石數百石堊稱是露階鈿砌咸足用焉

郡政之暇躬爲督視甄陶鍛冶丹雘髹漆以至工師廩積各有司存經始於大德二年之春屬歲禮中止歲事於五年之秋不期月而告成殿臺重簷亢以層基繚以脩廊大成有門七十二賢有廡泗沂二公有位黼坐旣遷更塑鄆國像於後寢締構堅貞規模壯麗大小以楹計者百二十有六費用以緡計者十萬有畸落成之日遠近助祭者衣冠輻湊眾瞻瞻于禩祖庭頓還舊觀於是衍聖公治遣其子曲阜令思誠奉表以聞且以廟碑爲請會選胄子入學擢思誠國子監丞特敕中書賜田五千畝以供粢盛復戶二十八以應洒掃仍下翰林書其事于石臣復承命跋蹠旣述興造始末竊惟聖人之道與天地並聖人之祀與天地無極堯舜湯文之君不作而道在洙泗立言垂教推明堯舜湯文致治之由模範百王仁及天下後世願治之主莫不宗之廟貌相望遠乎四海聖人之道固無係於祀禮之隆殺夫尊其道而愆其祀蓋治古之恒規王政之所先也洪惟聖元神武造邦天兵傳沐戎事方殷不忘



存敬先聖之祀詔求五十一代孫衍聖公元措歸魯哀集奉常禮  
樂於兵燼之餘燕翼之謀肇於此矣世祖聖德神功文武皇帝仁  
霑義洽九域混同文物渙然可觀內立國學外置郡邑學官而於  
先聖之後尤所注意遴選師儒訓迪作成需賢以嗣封爵慈志未  
究皇上繼而成之故自紹膺景命以敦化厲俗爲先務至於博施  
濟眾敷文來遠哀矜庶獄惠鮮鰥寡由天縱之聖見於設施皆堯  
舜湯文之舉揆諸聖經之言若合符契用能張皇教本光昭先業  
以致魯國臣民思樂泮水如附靈臺子來之眾至矣哉觀文化下  
必世後仁之效豈特震曜一時寔宗社無疆之福也銘曰  
道之大原寔出于天天何言哉乃以聖傳傳道維何唐虞三代儀  
範百王萬世永賴聖人之功與天比隆聖人之祀垂之無窮皇元  
肇基撥亂右武天兵趨汴周禮在魯烝哉世皇載整乾綱始定終  
綏遂臣萬方肅肅魯庭嗣封有典德音孔昭聖謨不顯王者之作  
必世後仁繼序不忘成於孝孫通觀厥成是訓是則思樂泮水作

廟翼翼如矢斯棘如翬斯飛籩豆靜嘉陟降有儀祀事孔嚴世爵  
以延汎掃有戶黍盛有田聖政聿新希蹤治古僉曰皇明登三咸  
五泰山巖巖聖化綿綿與國無疆於萬斯年

襄陽廟學碑

姚燧

聖元爲制凡士其名而儒其服不糝之民而殊其籍惟責田租商  
征自外身庸戶調皆復之無有所與者將百年於此矣世祖詔卽  
闕里聚孔顏孟三族置官而教之以俟其成德達才者垂三紀焉  
是皆無聞厯古而獨見之今者也陛下繼聖恢前皇之遠猷舉厥  
未脩之典封衍聖公屢下明詔還正貢莊學田俾完廟養老資廩  
師生其於世聖人之胄學聖人之徒覆毓漸濡德澤正矣府州縣  
邑爲之牧守令長者率以作新廟學爲政務先而恐風行聖化之  
後也襄陽宋之鄙城也金社旣墟嘗歸吾元由於忽棄不戍故宋  
竊築爲北門殆四十年世祖徵兵天下不忍徼利一旦以鬪吾民  
包峴漢而城之視猶圈虎待其自斃五年迺下則其受大兵也爲



最久城門闢矣廟學前大闢帥武臣因陋就簡而爲之不稱神居  
勢宜改爲田之在郊籍既失存民亦廢耕主吏去之無有知其  
所不敢視江南他州之有夙儲者其施力又若甚艱此前政所以  
苟於其事者惟總管陳衍經度之已而受更今總管陳義謀之吏  
民曰明詔如是吾方表田募民覲獲何時明日使是學媿德他州  
則二千石爲不職且受譴矣不眾爲之就緒無日吏此者割若俸  
戶此者捐若財應者謹然辭出若一帥守兵家亦勸赴功猶不足  
用取餘公帑治之二年聖哲中殿賢儒傍序門堂齋庖楹礎林立  
朔望春秋奠薦講肄籩豆鍾鼓有踐與節人之戾止新視易聽起  
所墮習而祇畏矣燧嘗過之拜其下庭猶有可憾焉者自唐開天  
配食顏子拔曾子於諸子以足十哲前宋則躋孟子與顏氏並雖  
金百年未之或改後宋則益次曾子子思進子張於曾子之舊故  
江之南位十哲上亞聖人者四焉宋平北方學者安顏孟而異曾  
思浙憲首請黜之當國之臣不然之也其後一侯爲憲河南是時

襄陽未入山南猶其所莅也不請而遂黜之由是是廟配止顏孟  
自今以觀顏曾之於夫子同見而知伯魚前死則子思亦見而知  
者惟孟子後百有餘歲爲聞而知子思學會子孟子學子思而得  
其道統之傳則曾思之功果不優於孟氏乎顏氏前死有聖人者  
存未嘗爲書質之於經事十九見贊夫子者纔一問仁與爲邦二  
焉一以修己一以治人他皆見稱於夫子與不待爲問而自謂之  
者也曾子述孝經大學子思作中庸孟子則自著七篇之書學者  
賴之至今爲書三子二子獨見黜是外其師而弟子是尊於聞而  
知者仍祀不變而顧後所見而知者焉或曰子記汴學已譏立顏  
路曾皙伯魚於序而坐三子堂上今何云然燧曰嚮所疑者以崇  
子而抑父弗安順於倫理非曰可併去之也今江南已配享者可  
不講而黜之則江之北有功曾思者可不請而配享乎燧故嘗曰  
人臣有見列而上之則可若以制度考文之事天子司之以幸國  
家違於稽古之事雖天下學禮之臣羣然議之必得所當義者而



後可也侯礪石求銘奉議大夫山南江北道肅政廉訪副使馬公  
駒實分刺是郡亦以侯嘗勲宜若可言燧曰嗚呼是豈可易爲哉  
孟子稱智足以知聖人者宰我子貢有若子貢有若則以爲自生  
民以來未有宰我則以爲賢堯舜遠猶未曉言聖人之所以然孔  
子語堯曰蕩蕩乎民無能名焉則夫堯舜者益難名矣然自孔子  
沒訖漢之世將八百年廟焉而不碑其見之金石者孝桓元嘉許  
魯相瑛置百石吏領禮器與孝靈元興魯相晨奏依社稷出穀王  
家供禋祀二詔魏曹植始碑之唐則作廟一州必碑最盛以眾就  
其善言者韓愈氏處州柳宗元柳州道州曰自天子至于郡邑通  
祀遍天下惟社稷與孔子又曰仲尼之道與王化遠邇二帝三王  
無以侔大不敢一言以贊其道無他蓋聖人之道天也善言者繪  
工也於山水鳥獸草木之爲物與人執事或可圖而肖之以語繪  
天設色而得其髣髴萬一者古今人無能爲者也故惟著其始媮  
而今完者以告夫後之人銘曰

維襄形勢始終一地視時屯亨而爲險易昔焉畫守負而江山動  
天下兵五稔悖頑時匪無學士日介胄以扞大刑違事俎豆皇輿  
旣邈壇南海涯顧爲土中襟帶安施猶爲名城于漢之城惟廟弊  
軋不稱瞻式帝奮文教誕誥優優于學須才如稷仰稷是邦承流  
其陳兩侯衍也經畫義逮成績桓桓新宮實教所基嗟襄土挑  
達何爲聖人遺言具在方冊口誦心惟奚異親炙朝趨斯庭夕休  
斯庭亦奚以間闕里卽居行見接武賓興成德作之君師實帝之  
力刻詩麗牲用示無極

大興府學孔子廟碑

馬祖常

昔我太祖皇帝受命造邦金人孫于汴太祖卽以全燕開太藩府  
制臨中夏維時已有定都之志矣故太宗皇帝首詔國子通華言  
乃俾貴臣子弟十八人先入就學城新刻于兵學官攝於老氏之  
徒迨世祖皇帝敕命下始正儒師復學官廟事孔子歸墻垣四侵  
地勒石具文作新士子至元二十四年旣城今都立國子學位於



國左又因故廟爲京學京師雜五方俗尹治日不給廟之墻屋弊壞將壓以毀講席之堂粗完泰定三年今大尹曹侯上視廟貌祠位皆不如制割稍入爲寮案倡然後大家富人合貲以聚財者有焉釋子方士分食以庀徒者有焉施施于于咸樂相成延兩廡五十有二楹締構塗飾工良物辦象從祀諸賢百有五人妥靈惟肖威儀有容又懇請于朝得廩餼弟子員百人受學于師復其身不勞以事於是天下首善之教興焉廟肇自唐咸通中至遼金燕爲都邑故嘗用天子學制選舉升造與南國角立亦一時之盛也太宗皇帝當雲雷經綸之世聖訓諄切以德賞喻父師以禮楚懲子弟飢焉粟肉湯焉酒醴力焉僕使恩義甚備其養賢勸善之誠固已高出於百王之上矣世祖皇帝立極作則人文昭明登用儒臣躬親講學故當時勳賢之裔以及宿衛之臣罔不以揖讓俎豆之爲懿顯蒙昏庸之爲恥也而三代國學黨序遂庠家塾之等秩然羅列於上下才學經術用世之士踵武而出暨仁宗皇帝賓興大

比四方舉進士凡登賢書策名禮部者京師屢倍於外郡非列聖仁涵義揉百年之禮樂文物推而致之歟燕自虞夏爲武衛之服召公之化尙矣昭王築臺以徠賢士鄒衍樂毅劇辛至有稱於世韓嬰以詩易爲一家師孔穎達博綜五經卓然庶幾醇儒今多士游歌在庭摳衣在廟將見魯鄒之美矣若嬰穎達宜所不道矧衍毅辛之徒哉夫儒者之學詩書六藝之文以至施天下之道無有二也後世教不明家異人殊各溺於所習以相詆訾由上之教無以一之嗟夫古者小學大學之師弟子之傳皆本於道德仁義之實著於詩書六藝之文非有教有授則不敢以傳也傳焉而尤雜不經則上有刑也是故風淳而氣同由上之教有以一之也而王國多士逢文明之會肄業有學學有師春秋祀其先聖先師者又有廟有位人有食以處出有貴於眾所以報稱列聖教化之德而應賢侯承宣之志者必冠而起矣提舉學事崔居中教授賈良弼正張禎祿司視以狀請曰廟之事成前尹馬思恕實能始之今尹



曹偉實能終之經歷王孝祖薛讓警巡監院兀都瞞使李權且能考工於下也余既爲言正充郟沂鄒四公配食東鄉位其來請遂爲銘詩不辭詩曰

皇元有赫奄受大國于月之嶠于日之域京邑翼翼莫不來極予誕敷文德新都有嗟辟雍峩峩瓌弁之瑳濟爾象犧銅爾弦歌新宮則那舊廟如之何皇帝在御百度咸若海輪維柙河浮厥柏是尋是斲虞庠嶽嶽式光我上國玄聖儀儀玄統龍衣衍我先師既右享之采芹于池薦此明犧用介我蕃釐蕃釐伊何彼美多士克明克類克諒厥事以登膺仕以媚于天子有鏗華鐘路鼓逢逢言燕于公有翼有翮多士既同天府是庸維曹侯之功曹侯閭閻迺承迺宣御劇迺專虞庠連連王士安安祇國維賢天子萬年

光州孔子新廟碑

馬祖常

光州既新作孔子廟乃以圖來徵文於州人馬祖常曰爾先子爲政於此州州有學以教人有田以養士有廟以事先聖先師矣今

久圯不治廟四出無垣登降無階肖象之設五采之服不彰妥靈之位不嚴配侑之序不飾室屋櫛櫺周廡重門及籩豆禮器之類一切弊舊取具假備歲春秋釋奠官及屬師及弟子致齋無次某等一二人辱守茲土割其稍入合民之錢粟箠木陶瓦木材陶良以錢庀工以粟傭力丹漆黝望塗錮施色之物皆集作於天曆二年七月九日成於至順元年八月十有八日凡廟位象設稱乎南面而爲王者之居昔之不治者今皆治矣昔之無有者今皆有矣爾先子爲政於此州爾又以文名于時爾宜爲文告來者庶謹之而毋毀也祖常三爲典禮之官習於先王之禮而學於聖人之徒陳跡往轍不敢煩州人之聽獨以我朝有道之世告吾州人始憲宗皇帝都和寧遣國子二十人就學今都之南城孔子廟旁旨意訓誨刻載廟中世祖皇帝潛王邸召學士王鶚因幄中設主陳俎豆觀祭孔子儀武宗皇帝詔天下若曰世嘗知尊孔子矣而皆未至也其進封至聖文宣王孔子爲大成至聖文宣王今皇帝正位



制若曰孔子大聖推本父母未極褒崇父叔梁紇可封啟聖王母顏氏可封啟聖王夫人命以璽書告闕里廟庭猗歟盛哉夫天下既富而教興焉興教必於學學必有所師師莫若聖聖莫若孔子則廟而事之者學者宜莫先焉且既富而教雖三王之治未有不富而能教者吾州介江淮之交生殖甚寡然少長安於朴俗衣服飲食給於田蠶弋釣之力工商給於粗完男女婚嫁養生送死質而有節其人已幾於淳厚故易富而易教弗如他州之人必待厚藏而後富近刑而後教也是以見其州大夫賢欲有所興起於善而又應之之速也如此評天下以難治者豈君子哉國家以文化成四海考郡縣之績當以吾州為首焉茲序其實而又繫之以詩俾州人誦新廟之成而不忘州大夫之德也詩曰

於穆聖師降我新廟凡筵維飾象設維肖四瞻周廟載基載築雅雅鱗鱗靈御之肅靈御之肅衣裳我人俾不為羣而即於倫埏埴萬類同仁於天匪言莫宣匪文莫傳六藝百家咸質於經我維受

之日化於成大帝在位翕以敷施考妣啟聖而追王之四海作則文明式昭我州易教作廟維喬榎枏梓柏弗雕而斲陶瓦髹漆施色丹渥麗牲在門春秋蠲吉官屬師徒端弁以入其容鏘鏘其神洋洋曠茲顛蒙闔而日章淮獻諸谷會流為潢南薄其鄂州名為光光在百城瘠土寡殖維人易教衣食耕織則既衣食又學為士學士有師先聖是祠州侯德勸我民豈忘之

真定路宣聖廟碑

李木魯翀

初鎮州置真定路以中山冀晉趙深蠡府一州五土地人民奉我睿宗仁聖景襄皇帝顯懿莊聖皇后湯沐首務立學養士當是時也世祖聖德神功文武皇帝淵潛朔庭聞鎮之學緩未即叙龍集丁未敕有司勿怠其事於是以金粟岡廟址崇殿庶闢黌舍太原元好問有記越十有四年庚申世皇即祚都燕統一八表置憲肅郡府鎮憲為諸道之冠庠序闕略必憲人府人胥議興治至元暨今雖屢加葺猶有未備至順辛未憲暨府議倡集楮幣三萬市物



傭工募役自殿之廡自廡之門新其屋楹三十有二棟宇軒楯拱挾環合左右翔峙作杏壇于殿之北神廚于廟之東自廟徂學門垣榘桓循序森立瓦墁締築堅麗於舊先是府尹馬思忽已基未構而去政人遷易者十餘年尹張猛台倅和則平治中和允升繼至憲使安歡提其綱賓佐韓復理其目始克有濟其年夏告成王申春府遣吏李明善介徵士贍思狀來請志其績紳嘗貳憲燕南義不容讓稽宋蔡京遷學陸佃記略曰真定雖塞北有江南之勝江南豪傑特起如臨川王公與孟軻相上下真定初未有聞噫是何言之怪也真定者冀州東垣堯舊封也昔帝堯以帝嚳子侯恒山之唐自唐侯即天子位徙山之西號陶唐氏太行東西境數千里皆帝之圻真定固神明之宅也孔子經法於易則遡伏羲以本無言書則始唐虞以道政事詩則采殷周以正性情春秋則黜五霸以嚴名分禮樂升降以鑑窪窳天人之道至矣迺曰惟天爲大惟堯則之唐韓愈謂堯以道傳舜禹湯文武周公孔子孟軻蓋孔

氏立教如帝典微言如三謨帝堯孔子位不同而同聖王安石背道迷經蒙君誤國京佃傾黨滋熾世益大壞河南程氏兄弟承元聖之緒揅之終賴其言道不墜地建安朱氏師則兩程哀輯遺言貫通折衷以悟百世先正許文正公見其書神感明會相我世皇同符堯舜世道人心翕然大正洙泗淵源日月昭朗今神聖繼興世日趨治鎮股肱郡也帝堯之思在焉朝廷之化先焉崇事先聖所以教也鎮士知所鄉往下學上達尊經慎藝何德不進何業不修何邪不鑑何古不及憲牧之輔治教縉紳之報君父於是乎在迺賦詩以慰鎮人士曰  
太行之山滹池之水孰古與美陶唐之里滹池之澣太行之所孰今與伍皇祖之土恒山嶙嶙滹水沄沄昊天生民思堯之仁滹水湯湯恒山蒼蒼帝堯相望於赫世皇始鎮之府時未忘武維士與女澤沐時雨龍德出潛萬方既瞻春熙秋嚴自北而南皇風斯角時雍於變視彼侯甸恒鎮之先大殿周廡先聖之宇久未今覩誰



敢子侮有廟有庭有戶有局肅肅其凝昭昭其靈新是鎮學式對  
恒嶽惟士也確順我先覺求門於牆求室於堂伊洛考亭使我不  
盲惟聖之立惟王之素園冠方履天地之度侃侃闡闡天天申申  
如目之眴如躬之親既儼既翼臨汝明德以寶皇國方州是則鎮  
人聚喜歸功憲紀憲人曰止其誰敢爾願望神京稽首奉揚配天  
無疆天子之光

元文類卷十九終

元文類卷二十

碑文

帝禹廟碑

鄧文原

至大辛亥紹興路重修帝禹廟成江浙行中書省平章政事臣某  
等遣使驛聞請紀其事鑱諸樂石而以命臣文原制曰可顧臣膚  
陋嘗待罪詞林今又職司儒校敢不對揚丕顯式昭祀垂憲來  
今謹按史載帝卽位會諸侯江南計功而崩因葬焉其事與記禮  
言虞帝南巡葬蒼梧者皆語相傳以久至於封泰山禪會稽則尤  
爲後世侈功好大者之論而非聖人崇德務本意也嘗以五服計  
其道里遐邇則會稽實在要荒之外先王省方肆覲政教是敷非  
若御八駿樂觀游除道周衛而勤民于遠然帝自肇功疏鑿告成  
錫圭躬膺歷數年逾百歲矣猶不肯一日自暇逸以居於萬民之  
上則夫子所謂有天下而不與者豈非萬世之大訓哉厥初巨浸  
稽天民用昏墊孰任已溺懋於奮庸天啟聖仁聲律身度勤躬朕



朕以宣地利以奠民極功施無窮考禮報本匪越人所私爰自少  
康之庶子無餘始封而命祀蓋少康距帝僅五世嬰時投艱復修  
墜緒一成一旅祀夏配天不失舊物繫帝之德足以繫屬天下而  
庶子無餘亦克胙于東土世席休光以及周之末季凡越之人羣  
居畊鑿服習聲教邇原而上曷可食息忘也矧覩其因山之制而  
遺衣服藏焉歷世推崇或者禎祥神茲顧享皇元受命義周仁洽  
綏定幅員稽諸版圖貢輸則在昔九州區域止及海內職方之大  
軼古無倫追惟有夏治格幽明山川鬼神壹是靈謐列聖繼承用  
弘茲道誕降璽書凡在祀典者命有司肅修時祭棟宇傾圮官爲  
繕完若江淞所理聖王之祀宜莫先會稽焉戊申歲土薦饑疾癘  
仍臻民多流殍臣某以季冬來領郡事慨然曰古者二千石期以  
其理當爲民省憂吾其敢怠忽明年春白于宰臣凡荒政若干事  
既得請還謁祠下周視梁燎風雨歆壓黻冕弗治丹雘漫漶先是  
宋政和間卽廟爲觀邇年更爲寺歲侵視蔭百廢莫興乃首議復

廟田之私質于民者以贍眾鳩工克具備役惟時鉏荒斧堅民士  
競勸礪石以楹陶甃以甃庭觀嚴敞殿廡翼衛若帝臨止川谷賁  
輝以帥府命給中統楮幣二百七十一定有奇是役之興庶幾乎  
知成民而後致力於神者矣竊惟帝之平水土也九賦旣均又曰  
六府三事以示天下萬世治道之本獨洪範九疇未嘗爲虞帝敷  
陳其說後千有餘年箕子始以爲武王告使箕子蒙難而不獲信  
其志又無武王者興則九疇將遂堙而無傳乎自夏歷商孰傳之  
而至箕子其事遠莫可考世知帝功與天地並而洪範九疇鮮有  
能研精理奧究諸力行者使其書徒以言語傳漢儒旁摭庶徵推  
致五行其言非不較著明甚而先王綜理天人之要亦已微矣八  
卦九疇道相經緯天所以昇聖人者豈偶然哉聖上續承大寶不  
建皇極中外大臣務肩忠蓋謨協贊襄蓋將絜斯世而躋之三王  
之盛神人具孚歲則順成慶浹華裔惟帝妥靈茲土嘉飫德馨亦  
永永億萬年無斁臣謹稽首再拜而詩之其詩曰



澗河之東有山鬱蒼鎮于南土夷視崇岡昔帝會同圭璧斯皇翮  
其颺馭若帝陟方若彼橋山弓劍是藏維是橫流潰潰懷襄燥川  
靜谷成賦定壇帝躬菲惡俾民樂康鑄鼎象列謨訓範防功加九  
有道尊百王世嚴秩祀登薦肅將牧臣有惕顧視榛荒乃堂乃構  
邃宇周墻吉蠲來享雲旒龍章繫帝贊育時厥雨暘物消疵癘歲  
詠茨梁永佑皇圖儲慶發祥卽山勒銘德遠彌光

漢番君廟碑

元明善

饒舊有番君廟范文正公爲守時改作於州治西北距今蓋三百  
年廟日以壞延祐四年三山王君都中爲守乃重作之廟旁又作  
芝山道院館道士以爲廟守番君廟者祀漢長沙吳文王芮也方  
秦毒虐天下秦吏亦乘而毒虐其民存者豈然咸思覆秦殺吏獨  
番陽令得江湖閒民心號曰番君及諸侯兵起遣梅將軍銷助漢  
入關得王長沙功著漢令然番人奚有王之功高哉徒知令之德  
我而已後雖去而他都世世不忘廟而祠之尸而祝之此民之心

也此文正公之所爲改作也王君忠信而說禮連治大郡皆著能  
聲今守饒又能跡前賢所爲以爲治安知今日所思者他日不以  
思王君哉廟成圖之以寄郡人立教嗣師吳真人曰此真人昔嘗  
勸我者今成矣廟當有記真人屬筆於明善遂作漢番君廟碑其  
頌曰

翼翼新廟有寢有堂薦我溪毛奠我酒漿靈舞靈歌冀其來享誰  
繫君駒芝山之岨誰維君舟番水之洲君不來遊增我百憂靈風  
清淒陰雲冥迷彷彿君旗導以兩螭君其假思使我心夷君旣醉  
止錫我繁祉庠有稻梁倉有絲枲飽暖而嬉疫癘不起太守作廟  
從民攸好春而有祈秋而有報猗千萬年君子是傲

侯府君夫人李氏祠堂碑

郭松年

夫人姓李氏北燕縉山人生有淑質旣長婉婉聽從不學而能父  
母鍾愛之擇其媿以歸邑人侯氏之子士温侯氏大姓世雄鄉里  
而士温亦賢子弟號衣冠族遼金以來蟬聯名宦不絕著稱雲朔



閒夫人始入門其家人上下目其容止閒雅皆悅以相賀自是閨  
門肅穆雍如也生二子曰進曰慶夫人年二十有四而士温卒居  
憂哀毀踰禮既免喪事長撫幼愈益恭勤不少怠親黨憐其年少  
榮獨勸改適則曰人之所以爲人以其有禮義也吾一婦人而事  
二夫豈禮義乎哉因以死自誓不失節志竟莫奪聞者歎美之貞  
祐初金政寢衰皇元太祖肇基王業義旗南指屢敗金兵金主畏  
偏徙都汴以避其鋒驅士民搶攘南渡夫人攜幼孤裹糧從之草  
行露宿未嘗污強暴虧婦節既渡河寓居宿州雖流離頓挫顛沛  
造次擇師友教養二子不輟二子亦穎悟絕人能動心忍性卓卓  
自樹立既而進以吏事明敏大爲宗室完顏公所知公時行樞密  
院事於宿審其可付重事表授下邳元帥府經歷官佩銀符凡府  
之謀畫教條與夫升黜守戰賞罰之用皆先事應機而辦以功累  
遷保靜軍節度副使癸巳之變總戎淮海沒王事一子曰珩慶驍  
勇善騎射由武選仕宰相以其才堪將帥起行閒擢萬夫長金季

朝廷以北兵方張慮宋人乘釁襲我腹背受敵命慶以本軍戍蜀  
漢遇敵戰死一子曰瑛甲午歲金亡宿境大饑人相食夫人與孤  
孫珩瑛處瀕死者數四嘆曰始吾南渡與二子俱今皆死國難惴  
惴殘喘亦何所惜但念侯氏一門不絕如綫重遭荼毒吾何敢不  
力適歲飢乏食宋人船米數萬石濟宿民且誘之完顏公以國破  
君亡外無蚍蜉螳子之援遂款附人賴以生范陽人張子良素居  
公麾下爲裨將公死子良雅不屬宋且念桑梓頗形於言色宋江  
淮大都督余玠覺其意陳兵脅宿民悉內徙泗州子良愈不自安  
皇元革命遂舉城來歸朝廷以爲京東行省仍領歸德府總管府  
事侯氏從而家焉某年月日夫人齋沐易服召珩瑛立床下戒之  
曰吾自歸汝家七十年矣遭世多虞備嘗艱苦汝所知也子死國  
難孫克樹立今年近期頤死無所恨修身齊家汝宜勉之語絕枕  
肱而臥遂卒享年九十以某年月日葬于睢陽大陳村之別墅夫  
人慈祥樂易接下以仁事上以禮再遭變故臨難不苟雖白刃在



前未嘗怖悼失度少變其節及二子貴顯分旄節握兵符光昭門楣無一毫驕泰色是皆烈丈夫之所難能而夫人處之裕如加以安樂壽考及見其孫琬瑛力學爲儒佐大府縻好爵聲光洋溢享甘旨之養不以疾終天之報施善人爲何如也今上初卽位方以孝治天下將一變衰俗以復乎古而貴近舉是以聞上嘉其貞節許其家立祠奉祀祠宜有碑勅臣松年爲之銘銘曰  
天地定位綱常以分女不再醮禮具成文猗嗟夫人有猷有守爰從弱齡喪其嘉耦煢然弔影將彼二雛啼寒號飢其志弗渝鷄鳴膠膠不替風雨柏舟搖搖載罹寒暑金德旣衰大駕南巡伯仲聯翩以登要津伯也剖符仲也秉鉞偕歿王事偕有休烈夫人之德夫人之教粵侯一門兩全忠孝神元撫運景命惟新亦有孝孫侍于夫人嗷嗷林鳥受哺于子售其功德孝孫之似天錫眉壽降福孔多原始要終其樂如何堂古之制享時之祭勒此銘章以訊來裔

光州固始縣南嶽廟碑

馬祖常

五嶽奠五方之地而各神於其人風雨日月之交有年穀之順成民物之疵癘焉南嶽祝融之墟距固始記里二千然皆古楚封域是其神必靈於一方無疑也神而靈能變化佐天地主宰象形流行蕩摩又豈閔於一隅哉傳有曰山澤通氣氣映北旁礪扶輿充兩間者大而不可以擬言眾人狹中而咸私其鄉神則罔不通也神而通則雖廟祀於他邦亦宜哉子嘗被命代祠衡嶽且辱宗伯之職矣知典禮咸秩無文嶽瀆上之所蠲吉有事者也僭有厲禁非民之所得禮也國家以仁治天下示民大同斥雕華而不用凡山林邱陵墳衍之神能福於人鄉人得祠之俾或禱而得年穀焉得無疵癘焉茲亦上之所願推施於下者不禁也地又匪天子歲時遣使之位禱又不大爽於禮禁廟無煩官司而民樂相之居民上者又忍不因其俗而順悅之乎是三者皆應記也廟事有成悉汝南民李聚之力鳩材庀徒百工並興富者入貲窶者奏技蓋聚



當病若有物憑之者自言爾作廟則愈今聚年七十矣衣結躡屨  
北走京師繪廟之圖介昭功萬戶總使府副使劉文秉御史臺管  
勾王珪拜馬祖常丐文歸而刻諸廟中載考廟屋爲閣者五間爲  
廡者二十間爲後殿者三間爲門者爲別室者大小凡若干間皆  
象神儀於其中外鑿二池瀦水植蓮客來游者憇息有亭東爲石  
甃周爲繚垣對樹嘉木合陰成列已蔚然而稱神棲矣固始吾州  
之屬邑也父老子弟吾之所敬愛者也既來請文夫何讓焉迺爲  
詩以侑邑人迎送神之詞云信民生太平之樂愷也詩曰  
南山濟兮興雲雨我田兮賴我神君神君降兮水渚幢駢羅兮夾  
以斧威不祥兮無疵癘順年穀兮吾食汝吾食汝兮何報鼓以牲  
兮蘋芣來連舞兮樂于廟翼翼兮子趨載擊鼓兮問年杭盈疇兮  
稊盈田富壽愷兮眾咸熙自今茲兮樂民時維茲邑兮孔休神福  
汝兮多來牟汜布濩兮需四海充無垠兮神咸在

漢濟南伏生祠堂碑

張起巖

暴秦焚滅經籍欲愚黔首黔首固未可愚祇白愚以速滅亡而經  
籍之在人心者如日月之揭乎天固不可得而滅也噫秦灰已冷  
漢策聿新孰謂禍難散亡之餘而有伏生巋然久存獨能壽遺經  
於胸臆以傳來學而新生民耳目哉是蓋天相斯人畀之以九十  
之年而其所以託之者有在也濟南鄒平縣治東北十餘里號伏  
生鄉伏生之墓在焉卽墓所有祠歲久敝漏縣尹大寧曹明叔視  
事之歲躬拜祠下顧瞻徘徊睠先賢之所藏仰遺像之有託慨然  
興懷營修完飾輪奐一新率邑人士與凡在官者具牲醴以祀復  
專其子憲來請曰願有述起巖緬惟先生之有功於斯文天下所  
共知後世論次其功贈乘氏伯號曰大儒從享孔廟天下通祀唯  
鄒平以其鄉獲私展其敬既別祠縣學又卽墓建祠其趨向可知  
也今曹尹復能崇墓葺祠俾邑人益知有以景行前哲而進于學  
于以化民成俗是真能舉其職矣起巖齊產也聞其請故不敢辭  
既書其事因附所見俾來者有攷仍繫以銘按漢儒林傳伏生名



勝爲秦博士壁藏書以避禁兵後亡數十篇獨以二十九篇教于齊魯文帝欲召時已年九十餘老不能行詔掌故晁錯往受之衛宏云伏生老不能正言言不可曉使其女傳言教錯孔安國書序但云失其本經口以傳授藝文志尙書二十九卷乃其所授者漢儒謂之今文隋經籍志乃云伏生口傳二十八篇作書傳四十一篇以授同郡張生張授干乘歐陽生生授兒寬寬授歐陽之子世傳至曾孫高謂之歐陽學又張生傳夏侯都尉有大小夏侯學宋葉夢得以書出伏生者二十三篇傳歐陽欵崇文總目尙書大傳三卷爲伏勝撰晁氏以爲勝終之後歐陽生張生各誦所聞特撰大義名之曰傳其說互有不同要之今文尙書出於伏生者則一也先生爲秦博士秦坑儒無所施其學其學至漢始傳然則先生之學旣施于漢而名以顯於後世故余不繫之秦而繫之漢題曰漢濟南伏先生祠碑云銘曰

法俟命天賜耄年庸待治平竟以所授列于學官其道大明書以人傳人以書顯垂萬世名稽古之力斯文與俱茲不曰榮從祀孔廟徧于寰區罔不敬承矧茲梁鄒鄉墓攸在礪世作程沈沈玄扃體魄所安祠以妥靈茂宰尙賢有壤必葺適觀厥成于鄉于學祀享相望閱千百齡穹碑有銘被之弦歌用侑爾牲



元文類卷二十一

Blank columns for text on the right page.

元文類卷二十一

碑文

中書左丞李公家廟碑

姚燧

燧嘗觀人臣私廟之祭易乎古而難於今三代不論也漢之時功臣侯者土地人民傳及子孫故嗣侯得以致隆數于其祖考世世無有所殺後封功臣皆虛邑無有土地人民子孫或官卑力微往往不能為廟與雖為廟以記曰父為大夫子為士葬以大夫祭以士祭既用生者之祿勢有必不能致隆者姑借先宋氏言之如文潞國作廟洛西其先未嘗將相也顧受祭將相潞國嘗將相者其及子甫惟得祭以大夫祿是於不為將相者致隆其真為將相者復加殺也如斯者幾何人哉惟呂正獻惠穆於文靖范忠宣恭獻於文正世其將相者史冊二百年間纔十三見事亦曠世而希有者也然自中元以來漢人父子將相者故丞相史忠武公與今資善大夫中書左丞贈銀青榮祿大夫平章政事諡武愍公二家重



元文類卷二十一  
輝襲芳震耀一時豈獨爲之子者信敬於昭昭厥考亦足以慰靈  
於冥冥矣惟李氏家隴西成紀者實秦將信諸孫漢至六朝門閥  
甚峻惟與崔盧鄭氏姻不連他族唐季王西夏甚盛強宋金嘗加  
兵終莫能服我太祖始平之其宗有守兀納城者獨戰死不下子  
惟忠尙少求從父死爲今分土淄州諸侯王所得於公爲考後以  
金符監淄州有子十三人公次居四王妃愛其穎異嘗子之在先  
朝故事凡諸侯王各以其府一官入參決尙書事公代其兄爲之  
李壇爲逆有迹淄州君獨從公馳聞壇繫闕門獄中壇誅得出上  
盡賜償所亡失授公淄萊路奧魯總管後改宣武將軍益都淄萊  
路新軍萬戶與城夾寨圍呂文煥襄陽四年始下之加明威將軍  
虎符丞相伯顏南征宋兵戍郢十萬城西郢鎖戰艦絕漢隘爲陣  
我舟不可越乃渠黃灣拖舟泛藤湖以出唐港棄郢去留公後拒  
敗其追兵行拔新城沙洋下復破夏貴陽邏口下鄂漢陽從故丞  
相阿里公時以左丞戰荊口禽高世傑下岳進阮沙市下荆南傳

檄歸峽辰沅靖澧常德諸州皆下之又徙鎮常德左丞徇地湖南  
丞相兵及澗西以地遠援疏詔公與宋都統張茂實呂師夔闕都  
元帥府江右公爲左副都元帥破劉槃軍下隆興禽熊飛建昌撫  
瑞吉贛與廣閩諸州皆下會宋幼主出降其將相張世傑陳宜中  
挾益王昞衛王昺浮海趨福立益王元以景炎閩廣諸州應者十  
五郡縣豪傑亦爭起兵公出定反地大破吳淦軍十萬南豐淦走  
如張文虎復合兵十萬又破之兜港伏屍三十里淦走合其相文  
天祥瑞金又大破之天祥走據汀別將孔遵窮追併破趙孟營軍  
復其州而還隆興守帥覬利巨室罪以陰與賊連已誅夷百三十  
家公還白其非辜出其未盡誅者獄中帥府改宣慰司加昭勇大  
將軍同知江西宣慰司事尋加鎮國上將軍福建宣慰使又改江  
西宣慰使天祥復陷汀行收兵出興國又擊走之追四百里及之  
空坑散降其眾二十餘萬禽趙時賞以下文武將吏數百人拜參  
知政事行中書省江西益王殂廟以端宗世傑復立衛王元以祥



興移柵海中崖山近去廣治四百里授蒙古漢軍都元帥經略廣東進復梅循英德與廣之清遠走王道夫擊凌震海上獲船三百艘禽將吏宋邁以下二百人又破其餘軍菱塘江淮省亦遣都元帥張弘範至自漳與其圍崖山勢計窮蹙度不能國資政陸秀夫抱衛王蹈海死獲其金璽其將吏死焚溺者十萬餘人翟國秀凌震皆降世傑遁去風壞舟死海凌港南海平朝京師上勞苦之其將佐與錫宴者二百功陞者十授資善大夫中書左丞移省荆湖月虜男女奴鬻之者皆罪而正之常德辰豐沅靖五州大荒民至易子以糴爲發廩賑之所活爲口亡慮十萬計征占城詔使給糧仗造舟海南取得其宜黎儋之民勸趨之疾還詔從皇子鎮南王征交趾敗其兵天長府其王遂舉國航海將舟師追之敗諸洋中獲海艦三百始公策城天長儲穀待賊斂眾議不果盛夏軍士疾作漲潦冒營遽議旋軍賊躡敗吾後拒王以公殿賊閉永平關傅藥弩矢射公貫膝負創奪關出境以毒發薨思明州年止五十最

其平生小大百戰下城邑百有五爲戶二百萬嗚呼其亦勤已後薨七年而贈官賜諡封公之命始下玉音仁煦恩重書棺人臣獲此哀榮極矣公雖不可作已安知其不肉骨九京邪公諱恆字德卿自號長白篤孝純至淄州君卒方擊兩王闔廣淄州君顧言我死必無訃吾兒使會喪縱敵南海平始克銜哀摧慟屢絕且死謂所從曰爲我語諸昆弟妻子吾不得以時喪先公旣抱恨終天今復棄養太夫人而身先朝露於是遐夷吾目不瞑泉下矣其謹事之夫人王氏視分土諸侯王之妃姑也訃至夫人祕不敢聞之姑惟發哀私室公則再見夢太夫人曰兒今死戰日南矣太夫人泣言吾再夢如是豈誠然耶夫人始情告曰婦無以安君姑氏心也覆是久矣始哭厥喪嗚呼死而精魂猶惓惓其親可哀也已可哀也已子二人世安以監廣州從朝京師授新軍萬戶同知江西宣慰司事再嗣公益都淄萊本軍萬戶後以正議大夫仍將本軍僉江西行中書省事再陞中奉大夫參知政事行尙書省江西尙書



省罷今以上官參知政事行尚書省仍江西嗚呼六官而三踐公  
武已可見其才之無羞乎職者自其既解亦解兵其弟世雄以宣  
武將軍將之乃作河洪之詩使歌以祀公其辭曰  
李氏之在與水細大河洪姑臧有夏而王越三百年傳歷既長極  
崇而隳亦天之道日月作矣眾星匿耀王孫始卑徂東自西溜水  
幽幽束楚之流曰位不豐猶監一州有螽吾民有梟吾土吾力不  
能天子肆汝從父奔告帝嘉爲心迺陟潛沈寢向用公泱泱漢水  
南紀所恃爲池襄陽金湯陸公將萬夫長圍四禩而竟下之岷  
江失藩沿流列城振落摧乾至莫難一文軌判裂萬里收功九重  
授策維是武庚狂志復殷爵人號年大蠡甌閩終兄弟及公膺奮  
擊與鬪四年崖山翦克血其鱣鯢南海無波廐馬笥衣其賚如何  
帝曰汝烈宜置左相授兵而子西護湖廣公拜稽首天子萬年帝  
德聖神臣何力焉湖廣聽命壤三千里陰翕陽施賞刑自己及兵  
占城轉粟黎儋歸佐皇子致討日南不測風洋冒履而三由溜而

漢由江而海其涉曰深蜚聲曰大葢爾南夷曰尺箠笞犷勝者眾  
輕於出危賊策我師不能炎暑敦弓綿力犀甲敗雨避來弗迎邀  
歸以爭旣犇先偏左廣亦傾孰作士氣公殿奮武斬輻短兵援枹  
鼓鼓格鬪比死冠纓不顛裹轉馬革踐迹文淵維昔禡時皂纛有  
翩迺今還歸粉篆丹旃兆夢悠悠魂魄遼遠致身移忠維孝其本  
黼辰思之錄其庸勞寵幽上公可謂曰遭公亡不亡公有良子亦  
秉國鈞寶其實似有嚴作廟籩簋維時神容與耶去此奚之維淄  
維漢維江維海其流或枯廟主斯毀何以麗性樂石峩峩太史詩  
之以侑以歌

元帥張獻武王廟碑

虞集

昔者汝南忠武王起義兵燕南統率豪傑略定郡縣聲震河朔及  
歸國朝遂以其兵攻河南旣滅金將移師取宋乃總諸軍以鎮亳  
疏積水立城戍開田護耕宋人不敢北犯其後淮陽獻武王復統  
亳州軍以成大功故亳有張氏之廟焉其中廟祠汝南忠武王西



廟祠王第八子蔡國忠毅公東廟祠王第九子淮陽獻武王忠武  
始封蔡國公而薨也賜諡武康又贈推忠宣力翊運功臣太尉儀  
同三司上柱國獻武之薨也贈銀青榮祿大夫平章政事諡武烈  
又贈推忠效節翊運功臣太師開府儀同三司上柱國齊國公改  
諡忠武皇慶元年獻武王之子珪以中書平章政事相仁宗皇帝  
於是忠武進太師進封汝南王改賜今諡獻武進封淮陽王加賜  
保大二字以益其功臣號又改賜今諡禮部以其事下郡縣之有  
王廟者至治二年珪復入中書歷相英宗皇帝今上皇帝於是泰  
定元年加賜忠武以開國二字益其功臣號是年天子肇開經筵  
珪首當勸講明年解機務封蔡國公仍知經筵以病告歸未幾三  
遣使趣召見上閱其病重煩以政事拜翰林學士承旨仍以蔡國  
侍經筵朝有大政則就焉有閒使來告集曰先王之廟在亳州者  
庭皆有麗牲之石我忠武及忠毅之勳德則既具刻而銘之矣惟  
獻武之廟我以忝與國事不暇私顧其家顧未有刻焉因以王之

墓誌神道碑家傳授集曰刻文敢以屬子集辭不獲則對曰昔嘗  
忝爲太史屬固嘗知公家世勳德及進講內殿又執經以從公後  
者三年矣雖不敏敢不第而書之謹按王諱弘範字仲疇年二十  
餘其兄順天府總管弘略上計行朝留攝其府事吏民服其明決  
時內附甫定蒙古軍所過輒爲暴王曰國朝自有法制我奉行之  
執暴者決以杖入其境無敢犯者順天者故保州以忠武故陞府  
名後有所避又改今名曰保定云世祖皇帝中統初置御用局以  
王爲總管三年李壇叛濟南親王哈必赤丞相史天澤帥諸軍討  
之以王爲行軍總管且行請氈帳於忠武忠武曰汝欲卽安耶不  
與乃命之曰壇違天必敗汝勉之雖然壇劇賊也圍城勿避險地  
險則已無懈心兵必致死主者慮其險苟有來犯必赴救可以立  
功汝必勉之及圍城王軍城西壇出軍突諸將獨不向王軍王曰  
吾固受教矣我易受攻而彼不至謂我弗悟也乃築長壘內伏甲  
而外爲壕開東門以待之夜浚其壕加廣壇不知也明日果擁飛



橋來攻橋不足踰壕軍陷其得陵壕者突入壘門遇伏皆死降雨賊將壇讐遂敗死論功王最多忠武聞之曰真吾子也或言於朝曰壇所以得爲亂者盡專兵民之權故也以此聞諸侯諸侯果不自安遂罷其子弟之在官者王亦例解總管至元元年弘略入宿衛上召見其兄弟可代守順天者因念王濟南之功遂佩之金虎符代爲守二年移守大名未上微服行民間察其所患苦見倉吏收民租視所當輸倍蓰怨言載道明日視事首取而治之民大悅是歲大水沒廬舍且盡租稅無從出王輒免之計相以專擅罪王王請入見上前曰臣以爲爲朝廷儲小倉不若儲之大倉非擅免也上曰何說也王曰歲以水不收而必責之民府倉雖實而民死亡盡明年租將安出活其民使均足於家歲取之有恆非陛下府庫乎此所謂大倉也上曰知體其勿問其監郡有愛魯者先在郡任計吏不當至使自經死僚吏不悅於愛魯發其事幸王不與之則愛魯無援必敗王曰同官也力爲之解不得而愛魯抵罪王亦

爲之免官歸鄉里退然閒居不以介意六年大括諸道兵益圍宋襄陽益都兵壇所教也號勇悍難制度諸帥無足統之者乃以王爲益都淄萊等路行軍萬戶丞相伯顏命王軍鹿門斷糧道絕郢復之援主者曰鹿門有張九漢水以東無慮矣於是王言於丞相曰今規取襄陽周於圍而緩於攻者計待其自斃乎然而夏貴乘江漲送衣糧入城我無禦之者而江陵歸峽行旅休卒道出襄陽南者相繼也寧有自斃之時乎若築城萬山以斷其西立柵灌子灘以絕其東則庶幾斃之道也奏用其言因移王軍萬山令嚴恆無懈意一日出東門與諸將較射大出敵兵猝薄城諸將曰彼眾我寡請嬰城自守王曰嘻我與諸軍在此何事敵至將不戰邪敢言退者死即被甲上馬橫戈立遣偏將李庭當其前他將將六百人攻其後親率二百騎爲長陣敵之步陣聞陳而待王下令曰聞鼓皆進擊未鼓勿動敵麾眾入陣我不爲動至再且卻王曰彼再進再卻氣衰矣鼓之前後奮擊宋師大敗得奔還者無幾年



築一字城進逼襄陽破樊城外郛九年命攻樊城流矢中王肘王東創見主帥曰襄在江南樊在江北我陸攻樊則襄出舟師來救終不可取若截江道斷救兵水陸夾攻之則樊必破而襄亦下矣從之明日復出率銳卒先登遂拔樊襄陽降以宋將呂文煥入覲上嘉之有錦衣白金寶鞍之賜將校行賞有差十一年丞相伯顏帥師伐宋命王率左部諸軍循漢江東略郢而南十二月攻武磯堡取之大兵渡江王爲先驅宋相賈似道以其師軍蕪湖其帥孫虎臣軍丁家洲王轉戰而前大兵繼之宋師潰王前行宣布威德所過降下師次建康上遣使諭丞相毋輕敵貪進其少進以待王進說曰聖恩待士卒誠厚甚今敵已奪氣亡在旦夕過自迂緩資敵得爲計非策也將軍治闕外急緩之宜難制以喻度乘破竹之勢取之無遺策矣丞相然之卽日馳驛至上前面論形勢得旨進師十二年師次瓜洲分兵立柵奪其要害守之揚州都統姜才者宋之名將也所統士有部落種人自爲一軍勁悍善戰至是以二

萬人出揚子橋都元帥阿朮與王當之兩軍夾水而陳王以十三騎絕渡衝之陣堅不動王引卻以誘之其驍將本回紇人鎧仗甚異躍馬出眾奮大刀直前趣王王還轡反迎刺之應手頓殪馬下立陣者同口驩呼震動天地而敵人亦不覺失聲遂潰走追殺轉至城南門斬首萬餘級其自相蹂踐與陷壕水溺死幾盡比得入城十無一矣王素善槩此戰眾尤服其奇雋焉於是宋將張世傑孫虎臣悉其國力率水軍陳於焦山南北將致死於我我師合擊之兵支王之一軍橫衝其旁宋師大敗宋自是不復能軍矣追奔於圖山之東王奪其戰艦八十俘馘以千數上功改亳州萬戶亭軍忠武王舊所統也王以爲請而遂還之忠武王之事憲宗皇帝嘗賜名曰拔突拔突者國語勇敢無敵之名也於是上又以賜王爲名云是年冬丞相伯顏次臨安之長安鎮中書左丞董公文炳左出京口由海道會之王亦將兵而左師次宋郊丞相遣使約降宋主宋主幼其大臣難於削號稱臣請以伯姪爲禮往返未決王



將命入城數其柄臣之罪而詰之遂屈服竟取降表來上宋亡其  
主既歸朝而十三年浙東又叛王力疾討之師次台州遣人持書  
往諭守將殺使焚書我師怒拔之眾請屠城王不許誅其首禍者  
而已台民至于今感之明年師還迎拜鎮國上將軍江東宣慰使  
其民新脫鋒鏑王撫之期月境內稱治十五年王入覲請於上曰  
宋主既降而其將張世傑奉其庶兄益王昞與弟廣王昺南奔既  
立昞於閩而卒又立昺於海上宜致討焉乃拜蒙古漢軍都元帥  
以行陛辭奏曰國朝之制無漢人典蒙古軍者臣漢人恐乖節度  
猝難成功願得親信蒙古大臣與俱上曰爾憶而父與察罕之事  
乎其破安豐也汝父留兵守之察罕不肯師既南而城復為宋有  
進退幾失據汝父至不勝其悔恨也由委任不專今豈可使汝復  
有汝父之悔乎尚能以汝父宣力國家之心為心則予汝嘉今付  
汝大事勗之哉面賜錦衣玉帶又辭曰遺燭未息延命海渚奉討  
遠征無所事於衣帶也苟以劍甲為賜則臣也得以仗國威靈率

不聽命者則臣得其職矣上壯之出上方寶劍名甲聽自擇其善  
者既拜賜日又諭之曰劍汝副也有不用命者以此處之且行薦  
李恆為己貳從之至揚州選將校發水陸之師二萬分道南征以  
弟弘正為先鋒戒之曰汝以驍勇見選非私汝也軍法重我不敢  
以私撓公汝慎之弘正所向克捷王進攻三江寨據隘乘高不  
可近乃連兵環之寨中懼人持滿以待王下令下馬治朝食若將  
持久者持滿者疑不敢動而他寨不虞也忽麾軍連拔數寨迴擣  
三江盡拔之至漳州親攻其東門命將佐攻南門西門敵應之乃  
乘虛入其北門破之鮑浦寨南瀕海王曰陸攻之必走海令弘正  
圍以騎他將攻其南門又拔之海瀕之郡若潮若惠皆圍結盤互  
王威聲所至恩信濟之無不內附十六年正月庚戌由潮陽港乘  
舟入海道至甲子門獲宋斥候將都統劉青顧凱乃知廣王所在  
辛酉至崖山而他將至外省調至者雖隸所部然儕視不相下有  
驕蹇意幾敢違其號令王以軍法斬其最甚者一人眾乃懾服聽



命時宋人僑居海中環列千餘艘碇之建樓櫓其上隱然堅壁也  
王引舟師當之然其地兩山東西對立其北淺舟膠不可進我西  
由山之東轉而南入大洋始得與之薄又出騎兵斷其汲路燒其  
宮室而宋益困蹙無所容矣世傑有甥韓在王軍中三使招世傑  
世傑不從甲戌恆自廣州至舟小更授以二海戰船守北面二月  
癸未我師將戰或請以礮攻之王曰火起則舟散不如戰也明日  
四分其軍分處其東南北三面王自將一軍相去里許下令曰宋  
舟西艤崖山潮至必亟遁急攻之勿令得去聞吾樂作乃戰違令  
者斬先麾北面一軍乘潮而戰不克李恆等順潮退樂作宋人以  
爲且宴少懈王舟犯其前南眾繼之王命高構戰樓於舟尾以布  
障之命軍士負盾而伏之令曰聞金聲起戰先金而妄動者死敵  
矢傳我舟如蝟伏盾者不動及舟將接鳴金撤障弧弩火石交作  
頃刻并破七舟宋師大潰宋臣以其主廣王赴水死獲其符璽印  
章張世傑北突吾軍而遁令李恆追至大洋不及世傑走未至交

趾風壞舟與將士盡溺死於是嶺海悉平宋無遺孽矣磨崖山之  
陽紀功而還十月入朝賜宴內殿慰勞良厚然王以瘴癘疾作矣  
上命尚醫護視日以狀聞遣近侍臨議用藥曰吾有國事待其謀  
畫必盡伎速愈之敕衛士坐其門曰九拔都病甚矣非必不可不  
見者宣詔止之可也疾革沐浴易衣冠俾左右扶至中庭面闕再  
拜返居室酌酒作樂與親戚賓客爲別遺言毋厚葬甲一襲刀一  
事足矣明器以陶爲之出南征時賜劍與甲以異嗣子珪曰汝父  
以是立功其佩服毋忘語竟遂端坐而薨十七年正月十日也得  
年四十三上聞之震悼詔京尹給喪事所過郡縣以禮迎送歸葬  
其鄉之定興縣河內里祔葬祖墓而嗣子佩金虎符襲其軍萬戶  
二十九年珪入覲上謂太師月兒魯那演曰此家父子相繼自太  
祖皇帝以來定中原取江南漢人有勞於國者是爲最張氏史氏  
俱稱拔都史徒以籌議不如張之百戰立功也所以爵其子孫者  
豈可與常人同哉遂拜樞密副使行院江淮自是敷厯臺省三十



餘年爲國大臣矣王素敏悟喜讀書過目輒識大義歌詩尤慷慨  
身長七尺修髯如畫機明氣銳言辨捷出勇略絕人輕財下士拔  
材於眾已不以爲惠尙氣節敦信義與人交久而益敬剛直自將  
不爲勢位所屈雖臨之以威而辭氣洒落理辨愈明初丞相伯顏  
至建康大會諸將出庫金行賞而王後至丞相曰祖宗之法凡以  
軍事會集罪加後雖貴近材勇無所貸爾何敢後眾錯愕王徐進  
曰臨戰未嘗後受賞恥居先何爲不可丞相爲之俛首其能片言  
解疑誤類如此簿錄宋內府金帛行省都事夾谷士常與焉旣而  
多所遺失或因以誣士常將就考驗王曰士常名士行義有素何  
可以此議之請以本身官爵及家帑保其必不然者其後誣果明  
南征時宋文丞相天祥之軍在潮之五坡嶺弘正掩擊獲之縛文  
丞相以至樁以戈使拜不屈王釋之待以客禮吏士或諫王曰敵  
人之相叵測不可近王曰忠義人也保無它求其族屬被俘者悉  
還之及囚京師聞王薨至爲之垂涕在海上得宋禮部侍郎鄧光

薦禮之於家塾以爲子師嘗戒其子曰居官律已廉慎則公明白  
生御眾賞罰信用則人致力不懷報怨之心怨亦自釋此三言者  
皆王素躬行者也凡行軍非對敵未嘗敢妄殺吏卒有病者必爲  
親視醫藥不幸死必轉送其家凡上賜與卽分頒士卒麾下有功  
賞或不時得則慨然曰人宣方如彼而受抑如彼後或解體將誰  
與其功乎甚者爲之涕泣陳說不得請不止故人樂爲之用及爲  
元帥雖有所刑戮亦必爲之懇惻申諭仁聞旣著薨之日天下莫  
不傷悼痛惜焉今蔡國公又嘗謂集曰先王棄世子尚幼不足盡  
知其奇謀偉績當時之交游與老校退卒于今略以漸盡雖欲廣  
聞不得及矣至其昭如日星不可泯滅者則有信史與李王二公  
之碑在可以參攷者故凡可知者備書之而不敢略子一人今蔡  
國公也孫六人某官某曾孫子一人某官某集嘗觀於蜀漢矣諸  
葛武侯旣沒所在求爲立廟後主不聽百姓私祭之道上或曰宜  
聽立廟成都又不從步兵校尉習隆中書郎向充等共言曰周懷



召伯甘棠不伐越思范蠡鑄金存像漢興以來圖形立廟者多矣  
亮之丞嘗止於私門廟像莫立非所以存德念功述追在昔者也  
宜聽立廟沔陽親屬以時致祭其故吏欲奉祠者皆限至廟君子  
以為禮亦宜之然則亳州張氏之廟豈徒以著勳臣之世業哉亦  
足以表朝廷之盛德凡於腹心股肱爪牙之臣無所不用其至矣  
故為作詩以備樂歌焉其辭曰

維昔世皇受命自天四征既庭遂開中原粵是南國歷禩三百德  
在炎燧運往行息百萬我師不亟不遲不殺而神赫其仁威江流  
湯湯談笑畢渡木顛草偃有仆無拒天子曰嘻士亦勞止時且徂  
暑其休以俟丞相文武受言敬其息銳養完牛酒旨豐王乃扣閣  
請具為奏若峻阪馳靈扼其後面上方略報不踰辰往臨厥都雷  
飈疾神丞相傳言天子明聖以順來歸請爾民命主幼臣迷勞我  
行人王曰勿庸罪在柄臣身涉其庭氣直辭決稱臣上表再拜門  
闕有保其遺奔於海涯延喘須臾自靖其私王曰不可不告天子

不極其征臣不敢止乃錫神劍名甲副之抉瘴排炎廓為清夷膠  
舟于壑存其餘幾王言二進永訖炎紀橫梁賦詩波濤不驚磨崖  
勒銘表于鯢鱣功名則有壽位弗逮榮隨衰興業以久大三錫彌  
尊以啟王封冕烏佩圭盛服在躬維茲毫人服德以世享嘗于廟  
從王孫子於赫世皇濯濯聖靈萬神景從翼之風霆我思淮陽陟  
降在側孰是不顧永懷來格言言新宮高明深宏中有王考右有  
王兄王之格思庶其在此君蒿浮游孰感而致維毫士女具曰不  
然我有井里王為陌阡我有溝洫王浚王畫王于作邑其城額額  
我藝黍稷亦有稻秔羊豕在牢以庖則盈笳簫鏡鐸享士乃作我  
迎我享是用不作昔我父祖荷戈與父從王南征百戰是俱春雨  
既濡秋降霜露王來享茲從我父祖維時君子顧瞻咏嗟咨毫庶  
士孰知其它王有嗣子相我仁廟正言于庭必抉其要遠深蔽虧  
羣讒切膚帝尚仁孝寧之厥家英宗赫赫如日斯烈搜奸率庸不  
假豪髮臨軒待之命適其驅託之股肱恩信渠渠天難諶斯難起



元文類卷二十一  
倉粹慮深謀遠罪人斯得聖明繼統車塵徐徐亦惟世臣謹度不  
渝既寧既好思極永保陳經啟心非法不道申申其居侃侃其容  
孚于帝衷以世師工王廟奕奕視此無斃匪辜是私國有恆秩

元文類卷二十一

元文類卷二十二

碑文

長春宮碑銘

姚燧

元貞之始年秋九月七日皇帝御香殿守司徒臣阿刺渾撒里集  
賢大學士臣孛蘭兮奏輔元履道玄逸真人臣張志僊言臣之曾  
師長春子邱處機爲全真學於寧海之崑崙山太祖聖武皇帝勗  
金之十年方事西域聞其有道自奈蠻俾近臣劉仲祿持詔求之  
又急其見而遲其來繼伴以返之抽兵以衛之與語雪山之陽帝  
之所問師之所對如敬天愛民以治國慈儉清靜以修身帝大然  
之曰天遣仙翁以寤朕命左史書其言又以訓諸皇子者世祖聖  
德神功文武皇帝已敕臣徐世隆載諸靈應之碑惟是太祖格天  
之年丁亥夏五月詔因其號易所居太極爲大長春宮由未有碑  
至是六十九年人已無知受名所自不及今焉陛下昭代曉之詞  
臣俾刻金石則益不白於將來也敢昧死請制曰可十月十日事



下翰林臣燧實以其日直筆故得兢惕以奉明詔臣聞老子曰取天下者常以無事用是究觀歷古受命之君規規務取止乎禹迹之舊其所後服固非兵不能讐故萃眾智驅羣雄謀而鬪之櫛沐風雨露處暴衣審彼己以效成敗或累歲踰紀耘鋤未平可謂紛紛事至殷也矧我太祖天戈所直無敢倭刃視徹四海之士疆墟萬國之社祧與臣妾億兆蒼蒼以生之黔首不啻疾風之振枯槁非囿夫祝禱蒙汜燭龍不照而馬足所及其勢猶不是止焉庸以較夫聲教不出禹迹者僅如耳之在面有不能居其十一可曰自有生民以來所無惟所有遠故后服益多惟為猷大故久焉而成功其事之殷有百十於古先者於是之時乃遑旁求方外之士從容暇豫猶功成治定束干戈無所於試之世不知垂統之艱苦不待長春之告顧於老子取天下者嘗以無事之言已陰契其說而冥會其機嗚呼聖哉然考仲祿之行其年己卯長春承命絕宋金使幣從其徒十八人者以行明年馳表謝之猶宿留山北辛己會

趣使再至始發軔撫州經數十國為地萬有餘里喋血於戰場避寇乎叛城絕糧於蓋閭之沙漠自崑崙四年而至雪山馬上舉策試之未及積雪之半觸寒凍裹鞞痲其身之不恤以憂軫斯世計是勞勩有不在開國諸勳之下故帝錫之虎符副以璽書不斥其名惟曰神仙凡為是學復其田租蠲其征商癸未至燕年七十六矣而河之北南已殘首鼠未平而鼎魚方急乃大闢玄門遣人招求俘殺於戰伐之際或一戴黃冠而持其署牒奴者必民死賴以生者無慮二三鉅萬人其推厚德植深仁致吾君於義軒者歷古外臣當受命之初能為是乎匹夫一言鄉人信之赴訟其門聽直其家為有司者猶罪以豪傑以武自斷而渙其羣以二三鉅萬之人散處九州統馭其手帝不疑之斯必有以豈屈子所謂名不可以虛作者耶有遇其時未必見隆于后世祖嘗語其嗣道者曰乃邱祖仙翁朕及識之加贈長春演道主教真人二祖之見而知者然已陛下以聞而知顧為碑以表所由則長春之名籍三聖以



久垂者毋惑也臣又思之宮之與碑宜一其時太定憲三宗日不暇給嗣教真人尹志平李志常不請則宜以世祖之聖在位之久其培樹擁衛斯學之力而張志敬王志坦祁志誠不一言焉及仙今請而輒報可豈天固存列聖未究以待陛下爲終之耶矧卽位踰月爲壇壽寧宮凡日月列星風雨雷電百神之親上山川社稷林藪走飛諸祇之親下莫不奏假赤章以禋致之十一月與改元端月財九閱月實三爲壇其後壇之延春閣天步一再親以戾止其爲國與民介社導和受釐請命者文亦極矣又虞自火經以還禁爲醮祠今雖開之京師而外未白也乃下詔萬方其旨若曰先皇帝令江之北南道流儒宿眾擇之凡金錄科範不涉釋言者在所聽爲若然先皇帝開醮祠者有成命也爲犯法臣所不愛竟柅而止自今其惟以先皇成命從事是世祖獨未究者陛下又終之也嗚呼事之開也有門而來也有途其就也有時而成也有候方是詔下四海之人感激奮言始吾以爲經厄之餘邱氏之學熄矣

陛下噓而然之俾屯者以亨塞者以通梗其道者除之取其業者還之叢是數美于僊之身又冠之以寶冠薦之以玉珪被之以錦服皆前嗣教者所亡嗚呼仙之求以報盛德圖以醕至恩其子若孫與雲仍其來亡極者爲陛下祈求永萬年當何如也臣燧敢拜手稽首而詩之曰

於赫我祖帝縱其武俾肅將之勦平下土旣奠南邦西陲未疆迺鼓迺桴龍旗載揚何水不亂亡山不越萬國弱草剛風斯拔踰十暑寒振凱未回六飛之騁確確其艱孰明帝心休其益閑繼夕以朝黃昊尙友方詔外臣道德資取崑崙載牽于于其來及之雪山年已徂摧瀝厥腎腸爲告惘惘莫匪至言身國之本維帝孚之曰天覺予飭無怠忘子訓史書虎符寵綬璽書誕告凡爲爾學其復亡撓又曰長春而所宿號卽名而宮歸主其教假以澤物宏帝之仁于死于俘必拯以全旋還其真子孫眾有一絕一繼孰世其守有感其道而否臧之人曰不然太祖皇之矧我世祖封植益力日



爾長春朕幼及識太祖皇之維朕將之增諡四言煥其唐之有嚴  
今皇乃聖乃哲身先孝治祖塗孫轍爰詔下臣伐石劇穹臣拜稽  
首二祖之功豈人不忘維帝欽崇驅馬飛廉屬車豐隆或從上帝  
陟降斯宮靡祥不臻奚社弗屆於皇我元萬禩攸賴

延釐寺碑

姚燧

大德八年蒼龍甲辰之秋制移江東憲使臣燧于江之西參行省  
政十月而至裁再閱月嘉平兌弦三相帖赤自軍中啟遣開成路  
總管府判官常謙數千里驛致安西王教于燧曰吾絲不忘世祖  
聖德神功文武皇帝順聖皇后深恩大惠嘗請于帝求卽六盤興  
慶池園爲寺用資兩聖冥福以永帝之億萬維年制可加賜黃金  
兩計者二百五十楮幣貫計者五萬米石計者千四百五十規制  
一以都城勅建諸寺爲師而小之又虞眾役顛俾有司緩則後功  
急將罷力命王相阿魯輝身綱維之而時其饗勞節其休作經始  
于元貞丙申省成于大德癸卯非託金石將無以白始此者吾之

心成此者帝之力也汝製寺名而文之碑其令集賢學士劉慈書  
徵士蕭欒篆額燧敬受而伏思之今焉詞垣之臣雲蒸林立教不  
是徵而燧之命實繇燧者嘗以文學及侍先王烏乎可辭敢上本  
所自而言曰在昔憲廟大封宗室以世祖母弟國之關中於後立  
極之十三年當至元九年詔立皇子爲安西王以淵龍所國國之  
明年至長安營于素滄之西轟殿中峙衛士環列車閒容車帳閒  
容帳包原絡野周四十里中爲牙門譏其入出故老望之眙目恍  
心齋咨嘖嘖以爲有國而來名王雄藩無有若是吾君之子威儀  
盛者其時犍河之外秦固內地教令之加于隴于涼于蜀于羌諸  
侯王郡牧蕃首星羅碁錯於是閒者靡不輿金筐帛效馬獻琛輻  
輳庭下勃磈竭蹙如恐于後其大如軍旅之振治爵賞之子奪威  
刑之寬猛承制行之自餘商賈之征農畝之賦山澤之產鹽鐵之  
利不入王府悉卽自有又明年詔益封秦王綰二金印易府在長  
安者爲安西六盤者爲開成皆聽爲宮邸用不足取之廟廷歲或



多至楮幣貫計者百三十萬裁七年而棄其國明年詔遣今王嗣國之四年當十九年益封江西吉州實食之戶六萬五千歲入楮幣貫計者十萬二千春秋之服紵縑爲疋各千嗚呼斯又歷古展親之未聞者於吉王未始至歲維關中夏則樂其高寒卽六盤居稽諸地志實漢北地郡之畧畔道道下於縣其吏長而不令後廢隋義寧中置樂蟠縣旣譌畧畔矣六盤又樂蟠之譌然以其地介乎涼隴羌渾之交時平則列置監牧攻駒而蕃息之有警則命將出禦無有常制四海無所爲而至者惟世祖淵龍之加兵大理也旣嘗禡牙於茲及平而歸又飲至焉最其駐蹕三易寒暑夫旣久此必遺澤餘波深浹他邦而王父子再世受之古稱河潤九里海潤百里信如斯言則發源天潢衍溢涵濡將不千里其藩輔天子寬西顧憂者又不百世而止也亦竊思之王之有國二十有六年克自卑抑恒遠之宮而弗遑處爲天子援枹鼓進退諸軍于外以捍侮西北其忠勤如何于此之地心焉悽悽求祈年今聖於昭昭

追福往聖於冥冥王考妣亦與薦焉爲宇事佛猶不率作得可而行其孝恭如何枚是數嫩善美孰與大書之言曰天道福善又曰作善降之百祥易又曰積善之家必有余慶燧學儒者未嘗知爲佛氏之言如佛亦視是忠勤而孝恭者爲善而福之則其教與儒可殊塗而同歸也禮諸侯祭其封內山川華之爲嶽寶王封內嶽祠之門揭爲宣釐則表寺之名莫延釐爲宜也銘曰  
於昭列聖事佛盡敬爰質之書古無有並土木之工雕楹繪墉朱塵綺疏匹帝之宮金莖一氣頡頏上下靜供之修乘輿必駕佛逝悠久其言斯存孰爲其言百世梵孫帝度其孫而教善治無間邇遠京師必致匪徒致之曰時子師坐而衽連出轡並馳有如今王於親則懿制地千里規爲時寺頤指其相展若易然矧錫金粟帝開其先面勢略畔八稔成績歸然都城勅建遺則帝師京師時寺門楣以長以雄匪弟子誰鼓鐘之音梵唄之力釐帝之餘必王見及帝億萬年壬年斯干爲磐石宗以固以綿燧作是詩刻時樂石



尚憑佛乘垂示無極

崇恩福元寺碑

姚燧

大德十有一年先帝立極親禱太室乃慨然曰予曾予祖世祖聖  
 德神功文武皇帝裕宗文惠明孝皇帝至元三十有一年成宗既  
 耐廟矣而惟皇考實誕眇躬未大尊顯肆類上帝誅行定諡曰順  
 宗昭聖衍孝皇帝琢玉寶冊納諸廟中尊皇太后以儀天興聖慈  
 仁昭懿壽元之號邇之為子遠之為孫其孝以慈可謂致極而於  
 宸心猶若未然明年至大之元詔羣臣曰昔朕萬里撫軍北荒險  
 阻踐踰躬擐甲胄北寇底平實艱實棘時有願言皇曾考妣皇祖  
 考妣之豐功茂德皇考太后之厚澤深仁圖以報塞必俟他日振  
 旅而南大建寶刹憑依佛乘上為往聖薦福冥冥慈闈祝釐昭昭  
 下而億兆臣民休祥蒙賴初匪有求年千世百專利一已卿曹其  
 灼是懷惟以其日鑿輅親巡胥地所宜于都城南不雜闐闐得是  
 吉卜勅行工曹贊其外垣為屋再重踰五百礎門其前而殿于後

左右為閣樓其四隅大殿孤峙為制正方四出翼室文石席之玉  
 石為臺黃金為趺塑三世佛後殿五佛皆範金為席臺及趺與前  
 殿一諸天之神列塑諸廡皆作梵像變相詭形怵心駭目使人勸  
 以趨善懲其為惡有不待緡誦其書已悠然而生者矣至其棖題  
 椀桷藻繪丹碧緣飾皆金不可貲算楯檻衡縱捍陞承宇一惟玉  
 石皆前名刹所未曾有榜其名曰大崇恩福元寺用實願言外為  
 僧居方丈之南延為行宇屬之後殿庫廡庖福井井有條所置隆  
 禧院比秩二品守以相臣割田外郡收其租入以給祝髮日廩月  
 餼坤維為殿乘輿時臨留必信宿久或旬浹其急其成為何如哉  
 功垂什八期以四年正月八日大慶贊將徧賚工官下及役夫何  
 意其日奄以奉諱羣臣進勸宜如故事即踐天位皇帝未忍宅恤  
 經時而始受朝稱天誅曰武宗仁惠孝宣皇帝恭抑之道亦云至  
 矣又哀先志之弗竟懼成功之將墜飭敦匠臣益虔乃職罷行工  
 曹入於留鑰曰凡修營石水陶繪百工眾技汝實司之與煩文移



人取汝所何若從汝自爲則易爲力而程蚤集矣且勅臣燧汝文  
之碑臣管以闕天子以四海爲家何適非鄉而獨不忘其生所者  
人情之同漢祖西都關中若忘沛矣及平英布歸過其鄉賦大風  
使子弟歌之曰朕千秋萬歲後魂魄猶思沛太祖奮跡龍庭斯固  
其鄉由世祖都燕宮室池籞百官府庫根柢乎此一歲乘輿留居  
者半以故武宗巡幸之還蒐田而歸必於是焉大饗飲至若鄉然  
矧建大剎位置行列基錯星羅出其睿畫爲往聖今聖薦福祝釐  
者尤所倦倦陟遐之日有未訖工在天之靈懷乎故都他日過之  
睹是翦然而完粲然而新必甚憚曰畢吾願者眞嗣皇爲賴哉臣  
燧載拜稽首爲之頌曰  
鈞之爲地匪福不異其異維何由建而寺且地之有於開闢初何  
千萬年混爲民廬何於其時曾不蒙福而至今也梵宮大築曰不  
難知警人之身正氣周流隨日而新嗟若梵宮相方視址授其成  
規維昔天子寫材於江伐石於山言出風行草靡庶頑又假相臣

汝往敦匠易衣寒暑飢俟汝餉于茲三年大立細捐垂欲落之而  
陟配天皇帝曰噫朕兄所志有銜未究其在傳次乃勅攸司無替  
爾程其用則取邦賦之經佛宇勅爲前古有是而其所無兩聖之  
治前聖往矣于佛焉依今聖萬年與日齊輝濡軌長江拳石喬嶽  
善頌之存梵唄攸託

普慶寺碑

姚燧

大承華普慶寺者皇帝爲皇祖妣徽仁裕聖太后報德作也裕聖  
以歲戊午來嬪越三年大帝建極當至元乙酉方廿有八年裕祖  
陟天在疚煢煢茹荼與蓼上以慰安大帝於倦勤中以惠鞠晉邸  
順考成廟之不天皆俾不大盡傷乃心下爲皇孫武宗聖上擇師  
取友督勸於學俾知先王禮樂刑政以爲治國平天下之具若曰  
乃裕祖獲心九有者正由乎斯外接宗親之會見內飭宮臣之率  
職致孝極慈敦睦示嚴如是而善韜智晦明以藏其用大帝才之  
關政于家則曰于婦是謀投大遺艱不言意喻廿九年順考陟方



又二年大帝登遐柱傾于天維絕于地急變秋也徐爲圖回未嘗  
大聲以色益示暇豫經時無君四表不聞枹鼓一鳴召至成廟於  
撫軍萬里之外授是神鼎易天下岌岌者爲泰山之安俾聖子神  
孫得以乘承今億萬年大德二年詔武宗復撫軍于北日侍慈闈  
者惟今皇上一人耳故情不分而愛彌篤怡言煦之摩手撫之食  
焉而羹息焉而膺又伺有無而增益之會太官答難監龍興還由  
老無子自簿減獲數千指牛羊馬駝蹄角亦數千田屋貨貨猶不  
與存盡獻之隆福宮裕聖則曰吾何庸斯其賜今皇上四年裕聖  
上僊撤是獻屋爲殿三楹事佛妥靈以盡孝思由前順考之國河  
內未至而還乃與今皇太后克成先志出居二年成廟登遐馳歸  
京師內難謀作兆緒滋章先事奪之殄殲大厯清宮以待武宗之  
至既踐天位惟以其月授皇太子寶中書令樞密使誕告萬方明  
年至大之元視昔所作圖報弗稱乃慨歎曰德一也時則二焉始  
之報也吾未出閣惟其身今也登茲元良可不爲天下報乃市民

居倍售之估跨有數坊直其門爲殿七楹後爲二堂行宇屬之中  
是殿堂東偏仍故殿少西疊壁爲塔又西再爲塔殿與之角峙自  
門徂堂廡以周之爲僧徒居中建二樓東廡通庖井西廡通海會  
市爲列肆月收儼贏寺須是資大抵樞擬大帝所爲聖壽萬安寺  
而加小其磐礎之安陛凡之崇題祭之騫藻繪之輝巧不劣焉亦  
大役也未嘗發民一夫皆傭工爲之其費一出宮帑旣其落止淨  
供之修薦福冥冥或者裕聖乘雲御風陟降自天歆茲崇報必反  
而酬陰隲於下降福穰穰者理則有之何難灼見焉惟今皇握黃  
圖以負丹宸其大則天其威則雷霆其不測則神明推是報德而  
上之將不裕聖一世而止其孝思遠及烈祖者何窮已哉崇祥院  
臣請礱石以頌功德勅命臣燧臣伏思之佛氏之言爲書數千卷  
博大闕肆學佛之徒猶有白首不能遍觀儒生未嘗夙一經目雖  
勦爲說終爾膚近不能深造其微故惟如勅所教惟詩報德其辭  
曰



有岑其宇有踐其廡有楹惟旅金鋪雕礎瞿瞿其瞻劇劇其廉秩秩其正於粲其嚴伊誰考斯帝宮亞匹則今皇帝覺皇氏卽其圖以進薦福于幽於我裕聖報德是求惟我裕聖爲烈無競大帝遐征儲席虛正時我成廟撫軍龍荒惟朝委裘三月皇皇萬里召赴天位昇據其神而明孰測爲度如是拱默宮居深安陋昔后母簾政僭干惟撫慈孫於學知勵又開太平大業今繼始爲之小其報猶私今焉一人以天下爲以天下爲誰專裕聖嘉與慈闈實普其慶往聖已矣慈闈萬年翼翼綿綿悠久如天皇上之心初豈以已覺皇貞之其錫繁祉

應昌府報恩寺碑

程鉅夫

城應昌之四十有一年上卽皇帝位制公主相哥刺吉封皇姊大長公主子阿神嘉世立嗣封魯王命下之日主謂王曰應昌有土肇自太祖皇帝成於世祖裕皇而順宗皇帝今儀天興聖慈仁昭懿壽元皇太后實已所自出上篤親睦之誼承成宗武宗惇敘之

志以有今日欲報之德惟佛焉依至大二年嘗規建佛寺于宮之東曰報恩蓋竭力成之旣成請文勒碑昭示無極上以命詞臣臣鉅夫謹按太祖初興魯國忠武王按赤那演以佐命元勳有分地約世婚而昭睿順聖皇后歸于我世祖太祖之孫薛赤干公主下嫁王子納陳至元八年始置應昌府以封其子帖木兒尙帝季女襄加眞公主未幾陞府爲路十四年帖木兒北征有大勳賜號按答兒圖那演元貞元年封濟寧王主爲皇姑魯國大長公主子孛不剌尙相哥刺吉公主乃今皇太后之中子也大德十一年武宗卽位封皇妹大長公主孛不剌魯王逮今嗣王祖孫凡五世國益大爵益貴恩數益異爲之傅以輔之爲之羣有司以治之於是弘吉刺氏維古塗山有城不足擬隆寺之建所以歸美報上昭忠孝也殿堂廡門庖寮庫庠庠經之室棲碑之亭金碧焜華芬橐宏密繚以周垣亘以修塗一木一石必出乎己一夫一役不煩乎民簡僧之有行業者曰智心主之日帥其徒請演祝讚梵唄洋溢諸佛



降監祖考來格帝室王家福祿攸同謂之報恩不亦宜乎洪惟聖祖神孫覆斯天載斯地廣大慈仁與佛一德皇姊嗣王克永孝思克廣德心以崇佛乘宜聖上親親之道彌至而臣子報稱之誠無數贊皇圖於億載保王國以亡休猗歎盛哉臣鉅夫謹拜手稽首而獻頌曰  
在昔太祖龍興朔方惟弘吉刺忠武洸洸佐定中原遂開大荒約締世婚申錫土疆寔生昭睿相我世皇光天之下德盛仁彊應昌既邦魯國是王貳館繼承奕葉重芳連城列邑沃野相望設官分職乃紀乃綱婉婉皇姊愛積厥躬帝弟帝兄承于祖宗洎我聖母澤濬恩隆何以報之佛法是崇迺集羣材迺徵六工于城之中于宮之東爰作爰謀爰蔽我衷以奠覺皇以展孝恭飛殿峨峨列屋周阿丹題藻悅電轉星羅彤雲承靈翠霧凝柯天花夕雨貝葉晨哦慧日曬光祥風扇和寒松沃色碧海澄波永底佛慈百祿是荷磐石其宗礪山帶河聖母萬年帝壽且多佛法廣運皇道無頗

上都華嚴寺碑

袁桷

太祖皇帝肇定區夏視居庸以北爲內地戶族散處皆安其簡易在憲宗皇帝時將有事西南底慎舊章建置靡遑時則世祖皇帝治軍和林相厥地利曰維灤陽展親會朝茲爲道里得中稽眾契龜僉告允吉因地而名之曰開平焉歲在庚申世祖承大厯服建國改元削僭靖亂宗王殊邦奉貢效牽咸會同於開平繇是定爲上都大興爲大都兩京之制協於古昔矣省方有常庶職攸敘商旅子來置而勿征首建學廟乾良二隅立二佛寺曰乾元曰龍光華嚴復立老子宮于東西相須以成化俗儆蒙繄二教是先具訓淵遠將垂憲永以爲民則仁宗皇帝在東宮如華嚴惕然永思粵惟皇祖置慮弘廓建都功業弗克崇闡紹開是我子孫不大彰顯爰命守臣相畫撤而廣之踰十年將成仁宗陟方今上皇帝北巡狩回上都首幸華嚴若曰列聖在天神化合一朕罔敢有替述修聖明將於是有人在廣植冥福神御周流宜得以屆止其以先帝所



構殿鎮于後維五方佛像在世祖時素有感異復廣大殿以居之  
梵相東西挾翼以從凡尊事棲息悉如其教以備又別賜吳田百  
頃安食其眾至治三年夏六月丁卯丞相入宿衛上都留守司臣  
某傳旨命翰林宜為碑紀其成績俾萬姓蒙祉庶得以昭朕奉思  
臣梅竊以為天地生物無心以成維聖人有憂則曰物有不齊皇  
極是訓西方聖人則曰性本至善遷以隨欲欲由妄生性日益昏  
故為物為變至於摩盪膠羈生死靡分於是有戡解之說焉有追  
崇之說焉彼生得以斷死得以離則本性湛空無有垢累道奚病  
矣華嚴設辭以富貴為喻終之以返真復初俾世之所景慕由境  
以入因境而悟入於無相其於喻也深有旨矣世祖命名亦將以  
警夫迷俗愍濟羣動與前聖相合者實在是聖聖繼承靡有銖異  
臣梅屢從屬車聞首主是山者曰至溫師以妙密縝緻為本行傳  
宗洞山與太保劉文貞公秉忠為方外友磊落有大計因得見世  
祖於潛邸陳對明朗遂大器之六傳曰惟壽今授司徒際遇隆赫

於法祖有光壽能文辭守其道專固則永以傳謹再拜稽首為之  
銘曰

於赫世祖武緯文經廣莫相攸堅墉斯城鑒觀羣生厥性有恆驕  
鷲忿鬪失常是行沈昵昏惑執妄是成維政與德具訓以儆善本  
性初為明為靜猗與覺皇功始戒定或喻以空或設以境空解境  
悟真慧永證巍煌華嚴窮珍極瑰龍伏藻井雲凝瑤臺積香浮浮  
側瓠枚枚耄穉畢觀心掉膽摧相既永離虛空如埃世祖稽古是  
則是效暨于仁皇益闡乘教維皇御極承志廣孝列聖在天鴻績  
靡報顧瞻咨嗟展飾殊妙錫福兆民列聖之心拯彼大迷覺皇具  
陳謨烈顯承如歲之春物無癘疵膏熙沐瀄億萬卜年刻銘貞珉

龍翔集慶寺碑

虞集

欽天統聖至德誠功大文孝皇帝自金陵入正大統建元天厯以  
金陵為集慶路遣使傳旨御史大夫阿思蘭海牙命以潛宮之舊  
作大龍翔集慶寺云明年召中天竺住持禪師大訢於杭州授太



中大夫主寺事設官隸之畫宮爲圖授工部尙書王士弘往董其役斥廣其地爲民居者悉出金購之土木瓦石丹堊金碧之需財自內出不涉經費工以備給役弗違農有司率職庀功景從響應御史中丞趙世安承稟於內行御史中丞易釋董阿忽都海牙相繼率其屬以莅之是以吏敏於事而民若不知材旣具期以又明年正月某甲子之吉迺建立焉其大殿曰大覺之殿後曰無量壽佛之殿居僧以致其道者曰禪宗海會居其師以尊其道者曰傳法正宗之堂師弟子之所警發辨證者曰雷音之堂法寶之儲曰龍藏治食之處曰香積鼓鍾之宣金穀之委各有其所繚以垣廡闢之三門而佛菩薩天人之象設纓蓋床座嚴飾之具華燈音樂之奉與凡所宜有者皆致精備以稱上意焉賜姑蘇腴田以飯其眾上在奎章閣親詔臣集製文刻石以誌之臣聞金陵之虛自秦時望氣者嘗言有天子氣至藏金土中以鎮之其後若吳晉宋齊梁陳南唐之君長據以爲都會然皆瓜裂之餘僅克自保要不足

以當王氣之盛夫孰知江山盤踞之固天地藏閔之久積千餘年而有待於我聖天子之興也不然何淵潛之來處遂飛躍之自茲見諸禎祥行事昭著之若此者乎夫太陽之升麗於天光耀熙赫高深廣袤之區生成動植之類孰不受其煦燠而其次舍之所經知天者必仰推而志之天子以四海爲家莫非聖明之所臨鑒惟帝運之所由起天人應合之機實在於此其可忽諸今天子建極于中撫制萬國顧懷昔居勢隆望重非我佛世尊無量之福孰足以處乎此也茲寺之成上以承祖宗之鴻庥下以廣民庶之嘉惠聖天子之至仁大慈垂示乎億萬斯年者於此可見矣於戲盛哉敢拜手稽首而述讚曰  
明明上天祚我皇國聖祖神宗立我民極於昭武皇懋建丕績憲章修明民用齊飭天下爲公仁廟受策治極而圯或斲彝則迺瞻明哲是保是翼俾久而安弗邇以逖祝融效靈海若率職更相吉土此惟與宅吉土惟何建業舊邑龍依崇邱虎在盤石昔有居者



元文類卷二十一  
不稱厥德惟我聖皇天命攸迪川寧於波田宜於稽民用孝敬神  
介景福帝命不遲師武臣力遂開明堂受天之厯廟而祖饗郊而  
帝格治功告成庶物蕃息江流湯湯經我南服中城有宮皇所肇  
迹惟時父老載慕疇昔雲來日臨庶我心懌皇帝曰嘻予豈汝釋  
維大覺尊寶相金色常以慧慈拯汝迷溺我卽我宮作祠奕奕照  
汝淨月沐汝甘澤汝見大雄如我來卽馬寶象寶珠貝金璧凡爲  
汝故我施無惜無留無害居佛之域民庶稽首我不知識我願天  
子聖壽萬億與佛同體住世有赫一誠報恩有永無斃

元文類卷二十一

元文類卷二十三

碑文

平雲南碑

程鉅夫

國家繼天立極日月所照罔有內外雲南秦漢郡縣也負險弗庭  
憲廟踐阼之二年歲在壬子我世祖聖德神功文武皇帝以介弟  
親王之重授鉞專征秋九月出師冬十二月濟河明年春歷鹽夏  
夏四月出蕭關駐六盤八月絕洮踰吐蕃分軍爲三道禁殺掠焚  
廬舍先遣使大理招之道阻而還十月過大渡河上率勁騎繇中  
道先進十一月渡瀘所過望風款附再使招之至其國遇害十二  
月傳其都城倚點蒼山西洱河爲固國主段興智及其柄臣高  
泰祥背城出戰大敗又使招之三返弗聽下令攻之東西道兵亦  
至乃登點蒼臨視城中城中宵潰興智奔善闡追及泰祥於姚州  
俘斬以徇分兵略地所向皆下惟善闡未附明年春留大將兀良  
合解經略之上振旅而還未幾拔善闡得興智以獻釋不殺進軍



平鳥蠻部落三十七攻交趾破其都收特磨谿洞三十六金齒白  
衣羅鬼緬中諸蠻相繼納款雲南平列爲郡縣凡總府三十七散  
府八州六十縣五十甸部寨六十一見戶百二十八萬七千七百  
五十三分隸諸道立行中書省於中慶以統之大德八年平章政  
事也速答兒建言所領雲南地居徼外歷世所不能臣先皇帝天  
戈一麾無思不服今其民衣被皇明同於方夏幼長少老怡怡熙  
熙皆自忘其往陋非神武不殺之恩不及此惟點蒼之山嘗駐蹕  
焉若紀聖功刻石其上使臣民永永瞻仰於事爲宜中書以聞制  
曰可以命詞臣文海再拜稽首而言曰世祖皇帝之德大矣辟  
如天地之無不持載無不覆燾而生生之意恆寓於雪霜風雨寒  
暑變化之中物之蒙之者薰然而溫灑然而濯翕然而同靡然而  
順有不自知其然而然者故其功烈之崇基業之廣貫三靈而軼  
千古夫以大理之昏迷旅拒虐我使人若奮其武怒俾無遺育可  
也而招徠綏緝終釋其主弗誅烏虜微天地之德孰能與於此乎

今陛下建中和之政凡以繩祖武厚民生無所不用其極中外欽  
承無遠弗届是以藩方大臣於錢穀甲兵之外惓惓以光昭令德  
爲請其知爲政之本也已漢世宗從事西南夷天下爲之騷動蜀  
民咨怨喻之諄諄鑿池蒞習再駕而後取之其視今也孰愈穆王  
周行寓縣必皆有車轍馬跡焉初非疆理天下也而世猶誦之至  
今其視跋履山川洒濯其民而納於禮義之域孰愈彼碧鷄金馬  
與夫點蒼皆其山之望者也漢使祭之唐季盟之夫各有所畏焉  
耳今也鐫未始磨之崖紀無能名之績桓桓燁燁與世無極豈惟  
足以震百蠻榮千古其餘光所被山川鬼神與嘉賴之嗚呼盛哉  
矣臣事先皇帝蚤受眷知今復待罪禁林發揚蹈厲職也不敢以  
荒落辭謹再拜稽首而系之詩曰  
於皇維元載地統天大噫小噓曰寒以暄粵西南陬水駛山蓄風  
霆流形氣交神州跂息蠕蠕勾萌鮮鮮谷飲巢居燕及跼鷺繫誰  
之恩聖祖神孫武烈文謨滿被生存既有典常被之服章我吏我



民我工我商萬國一家孰爲要荒點蒼蒼禹迹堯牆井鉞參旗  
終夜有光威不違顏作善降祥嗟爾耄倪視此勿忘

太師廣平貞憲王碑

閻復

三台平乾象以清五嶽奠坤載以寧三公得人鼎祚以隆蓋力莫  
競於柱天勳莫高於靖亂忠莫大於扶日惟我太師廣平貞憲王  
月呂魯公自乃祖乃父光輔聖元豐功盛業在天壤間猶星之有  
台山之有嶽歟公阿爾刺人小字玉昔迨至貴顯寵以不名賜號  
月呂魯那演譯云能官也始祖孛端察兒以才武雄朔方曾祖納  
忽阿兒闡所居與烈祖神元皇帝接境素敦仁禮之好祖博爾朮  
贈推忠協謀佐運功臣太師開府儀同三司諡武忠父孛斡贈  
推誠宣力保順功臣太師開府儀同三司諡忠定並追封廣平王  
廣平王家分地故以封之武忠志意沈雄善戰知兵太祖聖武皇  
帝在潛共履艱危義均同氣征伐四出無往弗從時諸部未寧每  
遇武忠警夜寢必安枕寓直於內與語或至達旦魚水之契殆若

天授初要兒斤部卒盜吾牧馬武忠其往追之時年十三知其眾  
寡不敵乃爲出奇從旁夾擊之寇捨所掠而去及戰太赤兀里鋒  
鏑既交約畢命勝敵無或退步武忠繫馬於腰蹠而引滿方寸不  
離故處太祖推其膽勇嘗潰圍於怯列太祖失馬武忠擁與累騎  
而馳頓止中野會天雨雪張毳裘以翳及旦雪深數尺龍顏弗霑  
武忠植立通夕足跡宛然不移顛沛造次脫主於難雖古烈士無  
以加蔑里期之戰風雪迷陣再入敵中求太祖不見急趨輜重則  
御勒已還臥憩車中聞武忠至曰此天贊我也及得天下君臣之  
分益密視夫人蔑里乞真不廢邱嫂禮皇子察哈解出鎮西域有  
旨從武忠受教武忠教以人生經涉險阻必獲善地所過無輕舍  
止謹白龍魚服之戒玉音謂皇子曰朕之教汝亦不踰是武忠既  
老以病薨太祖悼痛如喪所親初忠定之生方還自蔑里期戰所  
中途護視不啻如己子長率父兵襲爵萬夫長國初官制簡古置  
左右萬夫長位諸將之上首以武忠居右東平忠武王居左翊衛



辰極猶車之有輪身之有臂電掃荒屯熬奠九土柱天之力競矣  
貞憲王月呂魯公器量宏達襟度淵深莫測其際弱歲襲爵統按  
台部眾世祖皇帝聞其賢驛召赴闕見其風骨龐厚解御服銀貂  
以賜國朝重天官內膳之選特命領其事侍晏內殿公起行酒詔  
諸王妃皆執婦道未幾拜御史大夫江南既下裂土益封功臣後  
卽以泉州路爲分邑公長臺憲務振宏綱弗親細故興利之臣欲  
援亡宋舊制併憲司入漕府他日當政者又請以郡府之吏互照  
憲司檢底公言風憲所以戢姦若是有傷監臨之體其議乃格公  
事上遇下一本於誠事有廷辯當雷霆之下辭益鯁直天顏爲之  
霽威至元二十四年宗王乃顏叛東鄙世祖躬行天討命公總戎  
以先之大駕至半道則公已退敵僵尸覆野數旬之間三戰三捷  
獲乃顏以獻詔選乘輿馳畜百蹄勞公公謝曰天威所臨猶風偃  
草臣何力之有駕還留公勒絕餘黨執其首金家奴獻俘於朝同  
惡數人戮之軍前明年乃顏餘燼哈丹禿魯干復叛再命公出師

兩與敵遇皆敗之追及兩河威乘破竹敵眾大勦酋長遁去時已  
盛冬聲言駐兵俟春方進忽倍道兼行過黑龍江徑擣巢穴殺戮  
殆盡其酋莫知所終夷其城郭鎮撫遺黎而還國家承平日久而  
變生肘腋貽九重宵旰之憂公英猷載奮不期月而三叛悉平靖  
亂之勳偉矣詔憫其勞賜內府七寶冠帶以旌之加太傅開府儀  
同三司申命禦邊航海二十九年加錄軍國重事知樞密院事宗  
藩帥鉞一切稟命於公特賜步輦入內位望之崇廷臣無出其右  
三十年今上皇帝以皇孫撫軍北邊公爲輔行請授裕考所佩儲  
闈舊璽詔從之鼎湖上仙公奉鑾馭而南宗室諸王畢會上都定  
策之際公起謂皇兄晉王曰宮車遠駕已踰三月神器不可久虛  
宗祧不可乏主疇昔儲闈符璽旣有所歸王爲宗盟之長奚俟而  
弗言王遽曰皇帝踐阼願北面事之於是宗親大臣合辭勸進公  
復坐曰大事已定吾死且無憾惟公一言合臣民其戴之誠成先  
皇付託之意扶日之忠至矣上卽位之始進秩太師佩以尙方玉



帶寶服還鎮北邊元貞元年冬議邊事入朝兩宮錫晏酬酢盡歡如家人父子然先是夫人禿忽魯蒙賜侍晏之服曰只孫昭異數也命婦獲受此服由公家始自餘奇珍祕寶賞賚弗可殫紀還鎮有期不幸遘疾以十一月十八日薨於賜第之正寢兩木冰者連日春秋五十有四上聞之震悼不已敕有司給喪賻贈有加刻香木為棺銅以金銀北葬於怯土山之原大德五年春詔贈宣忠同德弼亮功臣依前太師開府儀同三司錄軍國重事御史大夫追封廣平王諡曰貞憲祖妣蔑里乞真妣完顏氏及夫人抄真夫人禿忽魯皆封廣平王夫人抄真先卒禿忽魯今主家事訓迪諸子克成奉先述繼之美子男三人曰木剌忽曰脫隣曰禿土哈女三人曰失鄰適太師興元忠憲王完澤之子中書右丞長壽曰不蘭兮適宣政使答失蠻之子泉府少卿不列禿曰班真在室木剌忽年未及冠詔選皇彌甥女八都馬妻之仍襲爵萬夫長復命公之介弟禿赤為御史大夫九年春有詔為公植碑通達載揚丕績事

下翰林為文臣復竊惟伊尹相湯伊陟復稱名臣呂望興周呂伋嗣封大國載在方冊以為美談公家歷事累朝奕世載德師垣萃於一門王爵加於異姓其視商周賢佐宜無少讓以之勒景鍾光信史其誰曰不然小臣作銘不獨表異渥於宗臣尚篤子孫忠孝之勸銘曰

皇元肇基天挺神武祝栗驤龍哮嘯虎猛將如雲謀臣如雨矯矯武忠攀鱗附羽草昧經綸疏附禦侮力竭股肱誠殫心膂忠定桓桓勳伐繼樹命佐商周德符伊呂鰲斷立極鷹揚啟土元祚如天忠力可柱顯允貞憲事予世祖綱振烏臺望崇紫府冠起東藩天戈奮舉公在前鋒氣盈一鼓敢以虜憂遺之君父駕至中途公已退虜一戰而勝還師帝所擎燼復然餘勇再賈威乘破竹敗之水滸三叛悉平遺黎按堵天語勞公賞錫繁庶公曰天威如拉朽腐還鎮朔方彈壓虎旅日贊重明龍飛九五乃冠台躔乃執圭珪公之庇民如室斯宇公之衛社如棟斯礎方倚長城遽停相杵當



寧盡傷行路悽楚褒德賞功恩洽施普績紀金石家聯簪組咨爾  
後人無替成矩泰山如礪黃河如縷爵以永傳焜燿千古

太師淇陽忠武王碑

元明善

粵若稽太祖法天啟運聖武皇帝誕膺景運龍奮朔方滅克烈主  
王可汗迺蠻主太陽可汗以至西夏西域金源次第平時則有佐  
命元勳曰博兒渾曰博兒朱曰木華里及卽寶位錫之券誓慶賞  
延于世世故朝廷議功選德必首三家焉臣謹按忠武王諱月赤  
察兒姓許慎氏曾大父卽博兒渾也自太祖蚤年已見聖神委心  
臣事大業肇基身餘百戰竟薨于敵是時官制簡古止爲第一千  
戶後封於淇州又食沅州六千戶贈推忠佐命著節功臣開府儀  
同三司太師上柱國追封淇陽王夫人鐵魁追封淇陽王夫人子  
脫歡王之大父也嗣父官佐憲宗皇帝四征不庭日闢土疆厥功  
爲懋薨贈推誠翊運佐理功臣開府儀同三司太師上柱國追封  
淇陽王夫人禿滅追封淇陽王夫人子失烈門王之父也恒鎮徽

外後征六詔懷服諸蠻邁疾薨于軍贈崇仁宣理保德功臣開府  
儀同三司太師上柱國追封淇陽王夫人石氏金宰相女也追封  
淇陽王夫人夫人生王六年王之父薨誓不他適王性仁厚儉勤  
事母備諸孝敬資貌英偉望之如神世祖皇帝雅聞其賢後閱其  
父之死事也年十六召見容止端重奏對詳明上驚喜曰失烈門  
有子矣卽命領四怯辭太官怯辭者國制分宿衛供奉之士爲四  
番番三晝夜凡上之起居飲食諸服御之政令怯辭之長皆總焉  
至元十七年長一怯辭明年詔曰月赤察兒秉心忠實執事敬慎  
知無不言言無不盡曉暢朝章用輒稱旨不可以其年小而遲其  
官可代線眞爲宣徽使制下階正議大夫兼領尙膳院光祿寺二  
十年加階中奉二十六年上討反者于航海皆陳王奏曰丞相安  
童伯顏御史大夫月兒魯皆嘗受命征戰三人者臣不可以後之  
今勅賊逆命敢禦天戈陛下憐臣賜臣一戰上曰乃祖博兒渾佐  
我太祖無征不在無戰不克其勳大矣卿以爲安童輩與爾家同



功一體各立戰多自恥不逮然親屬橐鞬恭衛朝夕俾子一人不  
逢不若爾功非小何必身編行伍手事斬馘乃始快心耶二十七  
年桑葛既立尙書省簧鼓上聽殺異己者籍天下口以刑爵爲貨  
而販之咸走其門入貴價以買所欲貴價入則當刑者脫求爵者  
得不四年綱紀大紊人心駭愕尙書平章政事也速荅兒王之太  
官屬也潛以其事告王王奮然奏劾桑葛伏誅上曰月赤察兒口  
伐大姦發其蒙蔽乃以沒入桑葛黃金四百兩白金三千五百兩  
及水田水磴別墅賞其清彊桑葛既敗上以湖廣行省西連番洞  
諸蠻南接交趾烏夷延袤數千里其間土沃而人夥畚丁溪子善  
驚好鬪非賢方伯不能撫安王舉合刺合孫荅刺罕以爲其省平  
章政事凡八年威德交孚飛聲海外入爲丞相天下稱賢二十八  
年都水使者請鑿渠西導白浮諸水經都城中東入潞河則江淮  
之舟旣達廣濟渠直泊於都城之匯上亟欲其成又不欲役及細  
民敕四怯薛人及諸府人與鑿所司高深之分賦之刻日使畢王

率其屬著役者服操畚鍤卽所賦以倡趨者如雲依刻而渠成賜  
渠名通惠河而河爲公私大利上語近臣曰是渠非月赤察兒身  
率眾手成不亟也賞以黃金五十兩白金五千兩寶鈔五千貫三  
十年上以王佐命元勳之後廉白而能加以摧姦薦賢遷金紫光  
祿大夫知樞密院事仍宣徽使明年成宗皇帝登極制曰月赤察  
兒盡其誠力深其謨謀抒忠於國流惠於人可加開府儀同三司  
太保錄軍國重事樞密宣徽兩使如故大德四年拜太師初金山  
南北叛王海都篤娃據之不奉正朔垂三十年時入爲寇恒命親  
王統左右部宗王諸帥屯列大軍備其衝突五年朝議北師少怠  
紀律或失命王亞晉王甘麻刺以督之是年海都篤娃入寇我爲  
五軍王將其一鋒交軍頗不利王視之怒被甲持矛身先陷陣一  
軍隨之出敵之背五軍合擊敵大崩潰海都篤娃遁去王亦罷兵  
歸鎮賞功誅臯恩威服於敵人厥後篤娃來請臣附時武宗皇帝  
亦在軍王遣使與武宗及諸王將帥議曰篤娃請降爲我大利固



當待命於上然往反再閱月必失事機事機一失爲國大患人民困於轉輸將士罷於討伐無有已時矣篤娃之妻我弟馬兀合刺之妹也宜遣報使許其臣附眾議爲允既遣始以事聞上曰公深識機宜旣而馬兀合刺復命由是叛人稍稍來歸十年冬叛王滅里鐵木兒等屯于金山武宗帥師出其不意先踰金山王以諸軍繼往壓之以威啖之以利滅里鐵木兒乃降其部人驚潰王遣秃滿鐵木兒察忽將萬眾深入其部人亦降察八兒者海都長子也海都死嗣領其眾至是我軍掩取妻子及其部人兩部凡十餘萬口十一年武宗入踐天位詔曰公弼亮三朝薦立武功朕嘉賴焉察八兒女燕鐵木兒帝室之胤今以妻公賜公以世祖晏幙成宗御輦及幙人樂工海東白鶻文豹至大元年王遣使奏曰諸王秃苦滅本懷攜貳而察八兒遊兵近境叛黨素無悛心儻合謀致死則垂成之功顧爲國患臣以爲昔者篤娃先眾請和雖死宜遣使安撫其子款徹使不我異又諸部旣已歸明我之牧地不足宜處

諸降人於金山之陽吾軍屯田金山之北軍食旣饒又成重成就彼有謀吾已擣其腹心矣奏入上曰是謀甚善公宜移軍阿答罕三撒海地王旣移軍察八兒秃苦滅欲奔款徹不敢納去留無所遂相率來降於是北邊以寧上詔王曰公之先佐我祖宗常爲大將攻城戰野勳烈甚著公國之元老宣忠底績清謐中外朕昔入繼大統公之謀猷又多今立和林等處行中書省以公爲右丞相依前開府儀同三司太師錄軍國重事特封淇陽王佩黃金印宗藩將領實瞻公麾進退其益懋乃德悉乃心力毋替所服四年王入朝今上皇帝燕之于大明殿眷禮優重九月六日疾病敕御醫數輩診療越三日薨于大都私第之正寢是夕大雨春秋六十有三皇太后賻鈔二萬五千貫上敕少府以香木爲棺給驛馬百送葬北地詔議飾終之典翰林臣請贈宣忠安遠佐運弼亮功臣太常臣請諡忠武宰相請其階官封如故制曰可夫人抹開公主宗王幹赤孫女也遜眞公主宗王塔察兒孫女魯王脫脫女兒也



燕鐵木兒公主既察八兒女也赤鄰別速氏千戶王龍鐵木兒女也完澤扎刺兒氏忽都台扎刺兒氏右臣相東平王女弟也並封淇陽王夫人子男七人曰塔刺海夫人赤隣所生端良剛毅有古大臣風至元三十年佩金虎符特授昭勇大將軍左都威衛使大德元年三月加階昭武七月遷榮祿大夫徽政使仍左都威衛使四年兼樞密副使六年遷同知樞密院事八年兼宣徽使十年閏正月加光祿大夫七月遷知樞密院事武宗即位之歲五月詔曰卿事裕宗皇帝裕聖皇后爲善則多不善則不聞也卿其相朕奏曰中書大政所出細而金穀銓選臣國人也素未嘗學樞密宣徽徽政三使所領已繁又長怯辭及春秋隨駕蒐獮誠不敢舍是以奸大政固辭制曰卿元勳賢嗣舍卿復孰相哉其勿辭拜銀青榮祿大夫中書左丞相仍領餘職他日詔曰成宗常賜卿江南田六千畝今加賜四千奏曰萬畝之田歲入萬石臣待罪宰相先規己利人謂臣何江南民力極矣請辭萬石之入入官以蘇民力上悅

而允六月拜太保錄軍國重事太子太師加階開府儀同三司依前左丞相七月拜右丞相監修國史師保領錄如故未幾上手授太尉印奏曰世祖未嘗以此官官人臣不宜受奏可至大改元加領中政使其年四月二十有四日從幸上都至懷來以疾薨贈智威懷忠昭德佐治功臣太師上柱國追封淇陽王諡輝武夫人朔思蠻公主宗王察帶孫女也里千公主宗王失脫兒女齊王八不沙女兒也木忽里宿敦官人孫女也並封淇陽王夫人曰馬刺夫人完澤所生由內供奉爲大宗正府也可扎魯忽赤武宗時奏曰臣家以武顯而臣方壯不効節於大敵臣羞此生上大悅授光祿大夫假左丞相行太宗正府也可扎魯忽赤于北軍夫人孛澤公主宗王月魯女也梭兒合公主宗王幹羅思女也宗隄丁宣徽使怯烈女也曰瓜頭抹開公主所生六歲時裕聖皇后命侍武宗武宗出撫北軍年十八今上淵潛時領府中四怯僻大官服奉御是年六月特授榮祿大夫宣徽使九月加儀同三司右丞相仍賜



江南良田萬畝奏曰臣首受此田指官求賜者多矣臣願還田縣官有敕依至大元年二月加階開府兼尙服使九月加中政使十月拜太師兼前衛親軍都指揮使阿速衛指揮使左都威衛使丞相宣徽尙服中政等使如故十一月上面諭曰公祖父宣力我家公之輔朕克謙克謹小心範物今旌德錄功爵公爲郡王已敕主者施行奏曰臣年德俱少所領事多恆懼獲非王爵至重臣不敢受上曰公辭之良是然誰如公乃賜海東白鶻白文豹二年兼知樞密院事三年二月加錄軍國重事五月左右部諸王宗戚大會于上都會歸例皆有賜而舊分忠武王黃金五十兩白金二千五百兩錦綺五段上曰特賜太師如其父分奏曰父所受已重醜賞何可滂沛臣家准奏十月上命爲尙書省大丞相奏曰尙書省銓選刑名非臣所諧乞請新命上悅其誠聽焉今上之初詔曰公輔先帝盡忠無隱廉介貞白今命公嗣父長怯辭皇慶改元正月佩父印嗣淇陽王制下階仍開府儀同三司夫人八藍荅里公主楚

王牙忽都女也曰送禿兒也不干抹開公主所生內供奉曰也先鐵木兒曰奴刺丁並也遜眞公主所生內供奉曰伯都庶出女七人曰也遜眞爲千戶怯辭夫人曰蒙哥爲魯王愛牙赤妃曰闊闊失爲宗王小辭妃曰梭台爲宗王罕差妃曰燕哥曰晏忽都朱適曰寶奴爲宗王徹徹禿妃孫兒五人曰鐵木兒也不干丞相子也昭勇大將軍嗣左都衛使遷中奉大夫通政使曰完者鐵木兒丞相子也曰按馬思不花曰阿荅火者並淇陽王子也曰合八沙輝武王子也孫女五人曰八迭兒爲宗王沙刺班妃曰奴只罕爲親王朔思班妃曰不魯合只罕爲越王阿刺荅失里妃曰卯兒罕曰班丹俱幼曾孫一人朶烈不花鐵木兒也不干子也王旣葬二年樞密副使野訥傳詔中書曰故淇陽忠武王其視故廣平十一月兒魯爲之建碑都城健德門外命翰林直學士明善撰碑文平章政事珪書丹翰林學士貫篆額臣旣受命懼不克奉明詔乃從其家得其世次行實則斂衽而論曰惟天朝一家九州四海遐邇畏



威懷德者蓋許慎氏與有力焉惟許慎氏五世六王六太師始終  
恩數赫奕者實天朝有大造焉然忠武王之為父輝武王丞相洪  
陽王之為子以慈以孝移仁移忠宜乎男婚帝族女媿王家入垂  
子則出垂臣範巖巖焉嗒嗒焉世有休仁蓋將與天朝胥慶于億  
萬年臣不敏敢稽首而為之銘銘曰

維天有命聖人膺之維聖創業賢乃興之維家開國孝子承之嗚  
呼休哉孰足徵之赫赫太祖實啟帝圖桓桓洪王為帝前驅洪王  
子孫四世惟肖猗忠武王克忠克孝爰稽忠武始事世祖夙夜左  
右無怠寒暑親猶股肱親猶腹心我聞古人斯焉在今朝有柄臣  
肆其欺姦廷爭面指羣罪不瞞舉賢於側才足經國試諸方伯竟  
為良弼帝曰上賢可保可師爾卿大夫及予倚毗北有金山世扞  
反者朝用旰食邊將汗馬詔往督師衣食予士毋使寒飢招徠迷  
子凡十一年反者破膽投戈自縛執迷孰敢敵人有言昔也狂醒  
使我盜兵蒙與天爭天子神聖公甚英明賴公之英得為天氓帝

曰公功進爵為王旅力尙強永清我疆驅馬來朝告我今皇一疾  
不起兩宮震傷飾終既備登嗣之良忠武之子三相兩師婦皆王  
女女皆王妃古亦有君莫我君仁古亦有臣莫忠武純烈烈大勳  
與日同曜淇陽真封子孫世紹忠武神靈從帝遊天勒詩貞石垂  
美萬年

駙馬高唐忠獻王碑

閻復

大德九年秋七月詔諡故駙馬高唐王闊里吉思為高唐忠獻王  
會祖阿剌兀思剔吉忽里追封高唐忠武王曾祖妣阿里黑為高  
唐王妃祖駙馬字要合為高唐武毅王祖妣皇會祖姑阿刺海別  
吉為齊國大長公主父駙馬愛不花為高唐武襄王妣皇姑月烈  
為齊國大長公主忠獻王前尚皇姊忽荅的美實追封齊國大長  
公主繼尚皇女愛失里追封齊國公主從介弟高唐王木忽難請  
也恭承卹典命府屬王元舉狀先世勳德謁銘麗牲之碑謹按家  
傳系出沙陀鴈門節度之後始祖卜國汪古部人世為部長亡金



塹山為界以限南北忠武王一軍阨其衝太祖聖武皇帝起朔方併吞諸部有國西北曰帶陽罕者遣使卓忽難來謂忠武曰天無二日土無二王汝能為吾右臂朔方不難定也忠武素料太祖智勇終成大事決意歸之部眾或有異議忠武不從即遣麾下將禿里必答思賚酒六榼送卓忽難於太祖告以帶陽之謀時朔方未有酒醴太祖祭而後飲舉爵者三曰是物少則發性多則亂性使還酬以馬二千蹄羊二千角上詔忠武異日吾有天下奚汝之報天實監之且約同征帶陽會於某地忠武先期而至既收帶陽天兵下中原忠武為嚮導南出界垣留居鎮守為哇昔異議所害長子不顏昔班死焉武毅尚幼王妃阿里黑罕之借猶子鎮國夜遯至界垣門已閉訴於守者繩垣以登逃難雲中太祖聞忠武死悼痛不已戎事方殷未暇治也雲中既下詔求王妃二子得獲賜卹孤殘甚渥鎮國至封北平王握金印武毅自齟亂太祖攜征西域還年十七鎮國已卒繼封北平王尚齊國大長公主仍約世婚敦

友之好號按達忽答鎮國之子聶古解亦封北平王尚睿宗皇帝女獨木干公主略地江淮歿於戎事詔以興州戶民千計給葬其戶至今隸王府齊國大長公主明慧有智略祖宗征伐出嘗攝留務軍國大政率諸稟而後行師出無內顧之憂公主之力居多初武毅未有子公主為進姬侍以廣嗣續鞠育之恩不啻己出子男三人長君不花仲武襄王季拙里不花君不花尚定宗皇帝長女葉里迷失公主從憲宗皇帝伐宋至釣魚山宋人堅壁不下我師環攻宋卒乘壁而訴傍有坐而張蓋者以謂弧矢莫我及也君不花素善鞭箭射之以顛遂拔其壘三子曰囊加解曰邱隣察曰安童邱隣察尚宗王阿直吉女回鶻公主國朝之制凡宗室之女皆稱公主武襄雖貴為帝婿總戎日多家居日少中統初費起闕牆敗叛將闊不花於按擅火爾歡獲其屬鎮海濟南之役環城當南面寇數出南門禦以勁兵輒復內竄以至授首還率所部從大軍伐叛西北敗叛王之黨撒里蠻於孔吉烈數日之間會戰凡七



俘獲甚眾撒里蠻尋復來歸拙里不花鎮雲南而卒子火思丹尙  
宗王卜羅出女竹忽眞公主武襄所尙齊國大長公主世祖皇帝  
季女也生四子長忠獻王次也先海迷失早世次阿里八剌耽嗜  
儒術尙宗王完澤女奴倫公主今高唐王尙宗王兀魯解女葉縣  
千貞公主早卒再尙宗王柰刺不花女阿實禿忽魯公主女三人  
必扎匣爲皇兄晉王妃葉里彎爲宗王按攤不花奴忽都魯爲河  
間王也木千妃忠獻王生長北方金革之用固其所長而崇儒重  
道出於天性興建廟學稟集經史築萬卷堂於私第講明義理陰  
陽術數靡不經意宗王也不干叛率精騎千餘併行旬日追及之  
時天盛暑將戰北風大起眾請勿戰王曰盛暑得風天贊我也策  
馬以先大敗敵軍殺掠殆盡叛王以十餘騎竄是役也王身中三  
矢一矛斷其髮凱旋詔賞黃金二鎰白金十鎰聖上御極之初特  
頒金印封高唐王駙馬封王蓋自王家始王以西北未庭請往征  
之詔初不允請至再三方許之將行誓曰邊塵不清義不旋轡大

德改元夏四月與敵遇於伯牙思或謂俟大軍畢至戰未晚也王  
曰丈夫爲國死敵奚以眾爲於是鼓噪而進大破敵軍殺傷甚眾  
擒將卒百餘人以獻詔嘉其勇果賜以先皇所御貂裘寶鞍繒錦  
七百介冑兵器有差二年秋諸王將帥會于邊其籌邊事咸謂往  
歲敵無冬至之警宜各休兵境上王曰今秋候騎至者甚寡所謂  
鷲鳥將擊必匿其形兵備不可弛也眾不以爲然王獨嚴兵以待  
是冬敵果大至彼眾我寡三戰三卻之王乘勝追奔逐北深入險  
地後騎莫繼不虞馬傷而仆至陷敵域敵初待以塔禮數欲誘降  
應對之際皆效忠保節之語又欲妻之以女曰吾不覩皇太后慈  
顏非聖上面命不敢爲壻卒不能奪其志上憫王陷敵欲遣使理  
索未得其人王府蓋臣曰阿昔思往在戎陣嘗濟王於險眾推其  
可用乃遣使敵一見王於稠人中首問兩宮萬安次問嗣子安否  
語未竟輒爲左右所蔽翌日遣還王竟以不屈而終嗚呼昔忠武  
以一旅之眾經綸草昧去僞歸眞繼以北平父子武襄昆仲被堅



執銳畢命邊陲以死勤事至王凡四世矣蓋王平生潛心聖學綱常之分了然於胸中知義重於生故臨難無苟免可謂無忝爾祖矣至於世締國姻奕葉封王河山帶礪子孫世爵聖朝所以崇德報功斯亦至矣初王之北也世子主安甫脫襁褓詔以其弟朮忽難才識英偉授以金印玉帶海東白鶻封高唐王襲爵之後恪守父祖成業撫民御眾境內乂安時齊國公主卒已久凡王之珍服祕玩悉令謹厚者掌之以需世子成立又慨兄死節及先德闔而弗彰俾元舉走京師列其事以聞光荷封諡之號其孝友敦睦雖儒素承家有不迨焉嗚呼賢哉銘曰

太祖聖武握乾綱風飛雷厲起朔方忠武華胄踵後唐疆介南北司壕隍有國西北名帶陽射日之弧期其張告以僞謀吞厥疆孤忠竟爲寇所戕帝聞其死久盡傷世姻汝締寵渥彰鎮國金鉏何燁煌武毅繼踵服王章子復尙主歿戎行一門三將迨武襄東殄海寇斧其吭北禦邊費不闕將偉哉高唐忠獻王外孫衍慶疏天

漢帝姬再降惠澤滂尊師重道興郡庠俗衽金革北方強禮義一變齊魯鄉英風勁氣直以剛捐軀報國分所當千載烈日橫秋霜  
河山誓爵奕葉昌



元文類卷二十三

Blank columns for text in the right-hand page.

元文類卷二十四

碑文

丞相東平忠憲王碑

元明善

皇帝嗣寶歷御宸極拜大司徒柏柱為中書左丞相明年制贈乃  
祖孔温兀答推忠効節保大佐運功臣太師開府儀同三司上柱  
國追封魯國王諡忠宣木華黎體仁開國輔世佐命功臣太師開  
府儀同三司上柱國追封魯國王諡忠武賜碑額曰元勳世德廟  
食東平別賜故中書右丞相贈推忠同德翊運功臣太師開府儀  
同三司東平忠憲王開國元勳命世大臣之碑碑建大都良鄉之  
通遼猗歟盛哉是舉也其思烈祖創業之艱念功臣宣忠之亟勉  
丞相奮庸之恭歟臣承詔猥當執筆謹按東平王世家忠憲王諱  
安同姓扎剌爾氏五世祖是為忠宣王親連天家世不婚姻太祖  
皇帝起兵與乃蠻人戰我師敗績七騎走利追兵尾及困乏絕食  
忠宣多力走水次縛致二歲橐駝炙其肉啖太祖太祖馬僊六人

元文類卷二十四

一



相顧忠宣遂以己馬濟太祖步射賊而死子五人第三子曰忠武  
王是為忠憲王高祖忠武與博爾朮博爾忽赤老温佐太祖定天  
下號為四傑太祖戰失利單走澤中天大雪忠武與博爾朮張馬  
韉蔽太祖臥旦起視跡二人之足不移太祖從三十騎行礮谷間  
遇羣盜突射忠武三發三殪徐撤馬韉障太祖叱騎戰賊賊問知  
忠武名乃解去克烈主王可罕忌太祖嚴兵襲我我得其謀太祖  
與忠武等悉精銳迎擊王可罕敗走死諸部以次服太祖即大位  
官制簡止置萬戶二乃以忠武為左萬戶從破金師二十萬于野  
狐嶺北師由紫荆口入忠武專征遼東西諸郡悉平詔授太  
師國王都行省承制行事賜券傳國永世太行迤南盡委經略金  
主奔汴忠武建牙雲燕南平趙魏東定齊魯西擊晉秦中原之地  
盡為國守四十年間無役不從無戰不在破國覆邑惜殺禁剽風  
降景附懷仁歸義癸未三月薨于聞喜遺命以未滅金肩為恨子  
曰孛魯忠憲王曾祖也嗣國王奉詔討夏攻銀肅二州斬甲首數

萬禽大將塔海詔分諸功臣邑門功第一食東平郡李全盜據益  
都帥帥圍全全窮出降山東安戊子三月薨于雁山子七人塔思  
嗣國王忠憲王祖考也夙以忠孝自許奮曰大丈夫受恩明主要  
須決機兩陣之間取功名以報國家庶不墮我先烈太宗皇帝攻  
鳳翔將兵成潼關從攻河中追斬守將從戰金師于三峯山破四  
十萬人斬行省完顏合達樞密移刺蒲兀朝行在所上顧之曰先  
帝肆天功建鴻業諸國悉皆臣妾獨爾東南鳴張一隅朕欲援桴  
鼓眾親繫虜王爾意何居起對曰臣不逮先臣武然奉天子威靈  
汛埽淮浙取彼山川歸我版籍臣敢不以死自力政爾不煩大駕  
蹂卑溼之地上喜曰塔思終能成我大志從皇子曲出南征拔宋  
棗陽侵郢陷光州略安慶己亥三月薨第二子曰霸都魯忠憲王  
父也憲宗皇帝命佐世祖軍由蔡伐宋馳檄諭江淮人帥師與世  
祖會鄂渚憲宗崩內難方訖世祖以武靖總師留戍而還及踐大  
寶嘗曰朕居此以臨天下霸都魯之力也蓋昔者與論形勢之地



武靖曰帝者必居中撫八極朝覲會同道里惟均中都南俯吳越北接朔漠左控燕齊右挾韓晉大王必欲佐天子一大統非此不可至是定都于燕故有此旨未幾薨于軍大德八年制贈推誠宣力翊衛功臣太師開府儀同三司追封東平王諡武靖夫人弘吉烈氏昭睿順聖皇后之兄也追封東平王夫人子男四人長卽忠憲王次定同次霸虎帶次和同嗣國王女二人長適國戚木蘇次適太傅淮安忠武王伯顏恭惟忠憲王自中統初年世祖皇帝命掌環衛之政令位百僚上太夫人入朝皇后一日上適叩及忠憲太夫人起奏曰妾不敢自薦妾子以欺罔聖聽安同年少公輔器也上曰以何期之太夫人曰朝回必求魁公論天下事未嘗目一輕淺謂然也是上默四年反者平執叛黨千餘人論之如法上問曰朕欲悉死此黨時年十六對曰兩主爭國彼安知有陛下且甫定神器不推曠蕩之恩顧奮私憾殺無罪人何以安反側上驚曰少年何以得老成語卿言誠開朕懷千人皆生至元二年拜光

祿大夫中書右丞相別食四千戶辭曰蕞爾宋竊號江南方宏聖略奮神武以臣謬膺宰相獻笑三方宋虜生侮上改容有問曰熟思無以踰卿其勿辭奏請燕王省可中書大政奏召大儒許衡衡至詔議中書事衡辭以疾忠憲親候於邸語移時甚契及還籌思累日不釋上時召衡諭之曰安同練事未熟善左右之卿所練語使達朕衡對曰丞相資識聰敏雅有定操稽古獻議卽解要領臣敢不竭愚馨有四年奏曰碩德如姚樞輩三二人可議中書省事上曰此輩固宜優禮五年阿合馬議立尙書省乃先奏忠憲三公詔諸儒議樞密商挺倡言曰安同國之柱石一日不可出中書進三公是崇以虛名奪其實權也眾起和之事挫不行六年大兵伐宋先規襄樊廟謨也七年奏曰臣近言尙書省宣奏如制其大政令大章程聽與臣議然後得聞今尙書臣違詔徑行上曰阿合馬恃朕信用敢爾自專勅尙書如前詔八年陝西行省臣言歲饑盜熾若不顯戮無以威眾奏曰盜犯強竊當罪重輕一切處死法何



以立罪入死者待報從之十年奏以玉冊玉寶上皇后弘吉烈氏  
以玉冊金寶立燕王爲皇太子兼中書令判樞密院十一年劾奏  
阿合馬欺國害民有徵數事又奏各部及大都路官阿合馬奏擬  
非人乞加黜汰十二年詔行中書省樞密院事從皇子北平王出  
鎮北圍遂留極邊十年不與朝廷通二十一年三月從北平王歸  
上召入勞之留語臥內四鼓而出冬十一月復拜中書右丞相進  
金紫光祿大夫詔天下監察御史陳天祥劾奏右丞盧世榮略曰  
人思至元初治不能忘也去春丞相安同還自北邊天下聞之室  
家相慶咸望復膺柄用治期可立而得果承恩命再領中書貴賤  
老幼喜動京師時政之治與不治民心之安與不安繫丞相之用  
與不用爾又如大夫玉速鐵木兒丞相伯顏朝廷專任三相事事  
咨而後行無使纖人從旁沮撓能者進能善者行善誠厚天下之  
大本理天下之大策又安用培克在位倚以爲治哉其年世榮敗  
中書條上世榮所爲培克諸事詔皆罷之奏漕司諸官上曰平章

右丞固取朕裁餘皆卿事願欲一一相煩有失寄託初意因奏曰  
比覺聖意欲倚近習爲耳目者臣猥列台司所行非道從其彈射  
罪從上賜奈何近習伺間抵隙援引姦黨曰某人與某官以所署  
事曰付中書曰準勅施行臣謂銓選自有成憲若此廢格不行必  
有短臣於上者幸陛下察之上曰卿言甚是妄奏者入上其名二  
十四年上決意立尙書省奏曰臣力不能回天乞不用桑葛別相  
賢者猶或不至虐民誤國不聽二十五年見天下大務一入尙書  
省屢上中書印不許明年宰相止掌環衛又十年正月十九日以  
疾薨于京師樂安里第春秋四十有九上悼惜久之曰人言丞相  
病朕謂不然果喪良輔詔重臣監護喪事家老一無所受素車樸  
馬歸葬只闕禿之先塋忠憲王疑然若山莫捫其高湛然若淵莫  
測其深其粹如玉其精如金其嚴如秋其溫如春夷險安危死生  
榮辱確乎中處一皆不動年十八入相薦引端良責成職任漢士  
如史丞相天澤姚左丞樞許左丞衡商參政挺寶學士默尤傑者



也立御史臺以正紀綱立太常寺以崇禮樂剷除苛虐開布寬平抑奢尚儉薄征厚施由是朝廷清明海內寧壹倉庫滿盈年穀屢豐天子嘉之曰安同爲相朕寢乃熟時向承平方與諸儒經畫典制贊理樞機以宗社尊安爲己任以民物阜豐爲己責一政失平一物失所慘然不樂改而後已公退府南開一閣延進賢士大夫講論古今治道評品人物得失臚應接不俗而請謁絕跡於清門居第一堂一廚或請創兩廡粗備燕息者乃曰身足於庇完矣餘室何用神觀端嚴望而尊敬每旦暮出入過者拱立目送曰是吾安相也及薨木介三日天下聞之識與不識無不驚哀至有失聲者曰賢相死矣吾復何望薨後十年御史臺及集賢諸儒請加贈諡以昭明德制下乃有今爵封諡以及父武靖王夫人怯烈氏封東平王夫人子兀都台嗣掌環衛成宗皇帝拜銀青榮祿大夫大司徒領太常寺事大德六年正月十一日薨年三十有一武宗皇帝制贈輸誠保德翊衛功臣太師開府儀同三司上柱國追封

東平王諡忠簡婦篤思刺氏封東平王夫人男孫一人卽今丞相女孫一人適淮安忠武王之孫樞密副使囊家帶之子同僉樞密院事相嘉碩利丞相幼從太夫人鞠育稍長兼事華學凝然端大已兆偉度年十二事武宗嗣掌環衛仁宗皇帝拜資善大夫太常禮儀使俄遷榮祿大夫大司徒太常如故又進階金紫光祿大夫加開府儀同三司延祐七年拜中書平章政事六月陟百揆自初仕介特不阿剛廉有制眾已有忠憲王之望及作相上輔聖主下率羣僚恪司彝憲壹徇至公明嚴峻潔苞苴自絕方爾謀叶八座道卽天工其成聖元無大之業臣稽首論曰忠憲王襲累葉之勳抱絕倫之德膺世祖紹統之初際聖代建極之盛天度夙成英猷大肆遠徵近禮廣詢博采鴻儒獻其所蘊智士竭其所至治化油然而以隆風俗淡焉以厚至元之初何減漢文之世俾得展能專理期之致寧收效所書蓋不止此然房喬杜晦顯烈寡傳第功絜德爲唐宗臣若忠憲王者有立于前或承于後論相歸賢固當稱首



古所謂社稷之臣也嗟乎其始出鎮也誰歟其再罷相也誰歟議者不能不歸罪阿合馬桑葛也之二罪魁孰與並立良相之去朝也宜矣世之公道正如青天白日雲煙有時蒙蔽真風元氣盪滌幹旋廓乎清明可跂而睹忠憲王之表表在天下是已若夫紀竹帛銘鍾鼎光在邦家不得騰實同里而垂休華夏播烈蠻夷未必不在斯文其辭曰

正統天靳不永以昇猗維帝元眷命無已烈烈太祖眾始一旅四傑起輔如龍如虎敵師陸梁走捷之楚諸部大人崩角啟處侃侃忠武秉鉞專征薄伐遼裔至于海城戮頑植愿百邑告寧乃趙乃魏自燕南兵齊魯歸明血戰晉并斬關入秦咸鳳莫京取厥鯢鯨耄倪不驚金人扼河踟躕偷生有據上游帝建九旂有開輿圖帝撫八州於穆世皇噉出東方爰相忠憲抒誠進良兩相廿年萬彙皆昌徵車四馳元老奏康更褒迭進無材不揚文物其章化道之祥而圖也大而見也定而行也公而守也正巍然山立賞淑罰慝

風行萬國定知誰力忠憲之職世皇之德繫今丞相相明天子天子倚毗臣無有比何以熙載第思盡已地紀天經日月重明民安物阜海寓晏清布寫公方持守盈成維祖規模維孫儀刑在履之貞在繼之靈文武三相聖輔三帝光輝接日勳庸蓋世維元世萬維帝葉千維無窮年尚徵相賢尋河可源凌岱可巔苟稽高遠靡趾方邊景行其全不在斯鐫不在斯鐫奚永夫傳質之自天風雲與宣文鼉負石炳耀山川

丞相淮安忠武王碑

元明善

天以正統命帝元太祖皇帝奮起朔方博爾朮木華黎博兒忽赤老溫四傑輔之滅克烈滅乃蠻滅夏滅金乃有天下三分之二宋承中華之運西距蜀楚東際吳越盡有荆揚益三州之野世祖皇帝紹運撫圖肆弘大略發兵二十萬授丞相伯顏不三年而滅宋聖文神武固勞造化偉烈實由折衝四傑開之於其前一相擴之於其後國家接五帝三王之緒保無疆歷服至于億萬維年



而功臣生分爵國死配廟廷有以也夫謹按太傅淮安忠武王諱伯顏姓八隣氏蒙古部人曾祖考朮律哥圖以其兵從太祖討定諸部嘗爲千夫長贈推忠贊治功臣太尉開府儀同三司柱國追封淮安郡王諡武定祖考阿剌嗣官平忽禪有功得食其地從憲宗皇帝征蜀卒于軍贈推誠佐理翊運功臣太傅開府儀同三司上柱國追封淮安王諡武康考曉古台佐宗王旭烈開西域執國事以沒贈崇仁迪慶翊戴功臣太師開府儀同三司上柱國追封淮安王諡武靖至元初年王奉使天子世祖見其貌偉聽其言厲曰非諸侯王臣也其留事朕遣介還報建謀發令才恆出廷臣上由是上愈益賢之勅中書右丞相安同女弟昭睿順聖皇后女姊之女王若曰爲伯顏婦不慚爾氏矣拜光祿大夫中書左丞相一時君相慶明朝野晏清號爲極治七年改同知樞密院事十年持節奉玉冊立燕王爲皇太子十一年復拜左丞相總襄陽兵伐宋上曰曹彬不嗜殺人一舉而定江南汝其今體朕心古法彬事毋

使吾赤子橫罹鋒刃王受命馳至襄陽諸軍纂嚴禡師啟行薄郢州洪水溢塗人病於涉王曰吾且飛渡大江而憚此潢潦耶度使一騎前導諸軍畢濟郢城恃江爲固而兵精食足耀兵不攻潛出平江堰盪舟而過郢將將二千人追我王以百騎殿郢人不敢逼平章阿朮公適至郢人走王手斬其帥趙文義以徇戰禽沙洋守將壓新城而軍列沙洋俘馘城下不應城陷佩沙洋降將黃順金符上爲招討使炫其榮於宋人以故江陵諸郡相繼送款遣別帥受之降阿朮公使右丞阿里海牙來期渡江不答明日又來又不答阿朮公自來王曰此大事也主上委吾二人餘可知吾實乎潛刻期而去將自沙蕪口入江宋制置使夏貴將精兵守之乃陽言明日圍漢陽夏貴來援我遣奇兵襲奪沙蕪口大兵咸會江北岸宋戰艦屬江中餘三十里我以白鷁千艘爭陽邏堡夏貴分兵拒戰命阿朮公挽舟逆上載死士三千夜渡是年十二月也明旦王戰夏貴江上兵奪陽邏堡逸夏貴諸將請曰貴大將而逸之可乎



王曰陽邏之捷吾將遣使前告宋人而貴走代吾使也貴今來矣未幾果以廬州歸我師既渡江將佐咸賀王曰天子威靈阿朮武勇將校用命吾何力焉王陳師鄂城下鄂恃漢陽將戰焚其蒙衝火照城中明日鄂人及漢陽人皆下留阿里海牙守之規取荆湖王與阿朮公等東兵興國斬黃南康江州望旗輒靡殿帥范文虎以安慶張都統以池州來二月都督賈似道舟師十萬陳丁家洲我士賈勇索戰軍甚盛似道聞鼓聲先遁其師遂潰獲都督府符印斬虜無算太平寧國建康無爲鎮巢皆送筦籥請城主行省駐建康時江東大疫居民乏食乃開倉振飢發醫起病人大歡喜曰此王者之師也有詔時方暑熾不利行師候秋再舉王上奏曰百年逋寇已扼其吭風馳電擊取之恐後少爾遲回奔播江海遺患留悔矣上語使者曰詔爾丞相朕不從中制也十二年七月詔王入朝進右丞相辭曰阿朮功多臣宜居後以阿朮爲左丞相賜從戰功臣爵賞有差躬受廟謨會諸將於淮安同左丞相圍揚州

未下十月王馳至鎮江分軍三 參政阿剌罕以右軍出建康道參政董文炳以左軍出海道王以中軍出常州道咸會臨安攻常州守將劉師勇遁諸將請追之王曰勿追師勇所過城守者膽落矣蘇湖秀州先師果降阿剌罕文炳皆來駐臨安北宰臣陳宜中發使來請降日及期宜中逃海軍進皋亭山宋主遣其臣齎國璽奉表納土命董文炳入宋宮取宋主居之別室封府庫歸之有司宋滅十三年三月也放散兵衛罷易官府錢塘沙上三日海潮不至宋人以為天助宋主求見王曰未入朝禮無相見也留左丞董文炳鎮臨安經略閩越四月獻宋主趙彞謝后全后于上都上御大安殿降封彞爲瀛國公遣大臣告成功於太廟上勞王玉再拜謝曰奉陛下成算阿朮效力臣具員而已何有功能詔以陵州藤州增食戶爲六千同知樞密院事十四年宗王失烈吉畔詔王將兵討之與賊夾水而陣久之不戰令牧馬具食賊疑而怠俄引兵渡水擊賊失烈吉走死十八年詔從皇太子撫軍北鎮諭太子曰



伯顏才兼將相行全忠孝故命汝從皇太子次舍必與論天下事待有加禮別吉里迷失者嘗誣王以死是年得誅罪勅王臨視王與之酒愴然不顧而回上問其故對曰彼罪自致臣若臨刑人將不知天誅之公也上賞其量二十二年宗王阿只吉失律詔王代總北軍遠斥候謹隄防足兵食明賞罰不肯要功生事將校大和敵人遠避二十四年宗王乃顏將反報者還至詔王覘之多載衣裘以往至其境輒賜驛人乃顏讎王王以大義語乃顏乃顏陽應而陰欲執王酒闌趨出與其從者潛分三道以逸驛人以得衣裘故爭獻馬以遞遂脫追騎以其實聞佐上親征奏李庭董士選帥漢軍得以漢法戰金剛奴塔不帶進逼乘輿漢軍力戰賊不能陣而走及禽乃顏王之謀畫居多二十六年加金紫光祿大夫知樞密院事總北軍討叛王明里鐵木兒大戰敗之明日搜其伏兵追斬二千餘級馳書開諭明里鐵木兒其人奉書以泣有譖王于上者詔以御史大夫月兒魯那演代之居王大同以俟後命未至軍

三驛王遣使語大夫曰所至姑止待我翦此寇卿來不後時海都帥大兵以入寇進我退如是而南七日眾帥怒曰寇至則走何不武若是果懼戰胡不授軍大夫而誤國事也王曰海都入吾境持重而殿邀之則遁誘使深入一戰可禽諸軍必欲速戰戰非吾憚果失海都誰任其咎眾曰請任之王麾軍邀擊敵兵大敗殺虜幾絕惟海都脫走乃召大夫至軍授印而去三十年十二月驛召至大同上不豫明年正月宮車晏駕遣使召成宗于撫軍王總百官以定國論兵馬使請日在鳴暮鍾日出鳴晨鍾問其故對曰防變起也王曰汝將爲賊耶其如平日宰臣請誅盜內府銀者曰幸赦而盜不可長也王曰盜何時無今以誰命誅人其守正體太多類此四月成宗卽皇帝位于上都大安殿時親王有違言王按劍陳祖宗寶訓述所以立成宗之意辭色俱厲諸王股栗趨殿下拜五月加閱府儀同三司太傅錄軍國重事依前知樞密院事上意欲王入中書時相忌之王呼相語曰幸送兩罌美酒我與諸王飲於



宮前餘非所知也江南行三樞密院行省臣累陳非便樞密臣庇  
之有詔問王王已病張目對曰罷行樞密兵柄一歸行省於國事  
爲完三院遂罷是歲十二月薨于京師甘棠里第春秋五十有九  
遣重臣來賜勅百官送葬送者盡哀葬于白只刺山之先塋夫人  
別宿眞卽扎刺爾氏封淮安王夫人再娶斗奴氏生三男子買的  
正議大夫僉樞密院事囊加台通奉大夫樞密副使朶眞普未仕  
俱卒副樞娶丞相興元王孫中政使買苟之女生一男子一女子  
男相嘉碩利正議大夫同僉樞密院事女適資德大夫大都留守  
晃兀兒不華王薨成宗贈宣忠佐命開濟功臣太師開府儀同三  
司追封淮安王諡忠武仁宗皇帝賜鈔十萬貫昇江浙省臣廟祀  
臨安皇上勅建碑于都城之郊賜額曰開國元勳佐命大臣之碑  
命臣明善製其刻文臣聞忠武王天質高厚風神清明英偉端大  
剛介莊廉當大任而不恐遇大論而善斷言笑有時喜愠莫測恆  
負天下之重以神器莫安爲務仁視羣品無間親疏義使英材無

比適莫故四海公論翕然歸之其平宋也將二十萬猶將一人賞  
罰信紀律彰大將稟命仰之若神明降人投誠依之猶父母未嘗  
妄戮一卒未嘗妄殘一物貨財不足移其心聲色不足惑其志師  
入臨安禮賢黜罪市肆不易雞犬無驚歸馬蕭然囊惟衣被畢事  
還朝口不言功連出總師無役不最嗚呼碩德元才生由間氣良  
相名將見諸行事乃知宇宙之間功名之表自有大人也彌成正  
統騰耀始日力扶實運播烈終年請卽是而作頌頌曰  
世祖聖神地翕天開陽施陰闕鼓盪風雷駕馭羣才鞭笞九垓冀  
掃凶菑祥慶有來糾糾雄豪英英俊髦樂世之遭陋時之逃或秉  
樞機或建旗旄纓冠自獻文奮武招維忠武王胥會明良雄圖遠  
韻聖度恢張制曰伊賢當吏天子左官諸侯奚爾器使乃命之相  
乃命之將爰資弼亮爰資開盪嗟茲中土鼎峙三主旣殄其二一  
也無武天生聖人賚之良臣頸組厥君稽顙軍門東涉扶桑西跡  
虞淵北盡窮髮南極玄蠻咸受正朔襲我衣冠委勳不居歸衛帝



盧出總北師馬騰士娛輿目睢盱望入中書鉅材乃儲翊運是須  
 肅將天威劔而登殿揚命羣王羣王自懷策帝御天下拜登謙是  
 日微王慶會幾變始知世祖神幾先見故抑王庸留垂後憲稽其  
 一德始終交盡抒誠兩朝力殫無靳進官三公心不增隆追爵一  
 王道不加崇維王達節高抱孤忠維王獻能茂建元功紀勩竹帛  
 鑄銘鼎鍾並日不滅與國無窮勅臣作頌勒之貞石昭示萬國永  
 著臣則

元文類卷二十四

元文類卷二十五

碑文

丞相順德忠獻王碑

劉敏中

故太傅右丞相贈推誠履正佐運功臣太師開府儀同三司上柱  
 國順德忠獻王答刺罕既薨之五年皇慶改元之秋上詔中書故  
 丞相答刺罕弼亮三朝功多不可以不顯其相地盧溝通達旁勒  
 碑焉且詔臣敏中撰文臣竊惟有國致治難得賢為尤難是以古  
 之聖王得一賢則信任之尊顯之使得以盡其能又必褒崇之表  
 異之示不可忘其勞若太常之紀盟府之藏鼎彝之勒麟閣雲臺  
 之像不一而足重得賢之難也我元聖聖相承天佑生賢相臣將  
 臣炳烈相望人才之得於斯為盛若夫懷遠圖而略近功先大綱  
 而後小數蘊江海之量負山嶽之重不威而令行不言而人服處  
 難而無所惑履變而不可專端委雍容而朝廷奠安天下受其賜  
 則忠獻王其人乎上之所以眷眷焉不忘而王之所以荷此表異



之渥也宜矣嗚呼聖人言君使臣以禮臣事君以忠于茲焉見之  
臣謹按王諱哈刺孫朔方人其族爲幹羅那氏襲號答刺罕曾  
祖考諱啟昔禮贈推忠佐命宣力功臣太師開府儀同三司上柱  
國追封順德王諡忠武祖考諱博理察贈協忠翊亮定遠功臣太  
師開府儀同三司上柱國追封順德王諡忠毅考諱囊加台贈宣  
忠效節保大功臣太師開府儀同三司上柱國追封順德王諡忠  
愍曾祖妣哈刺真氏祖妣完者氏妣脫魯哈納氏並封順德王夫  
人忠武重厚有英才遇太祖皇帝於飛龍見躍之際知可汗將襲  
之趣告帝爲備果至我兵縱擊大破之尋并其眾以功擢千戶錫  
號答刺罕時官制惟左右萬戶次千戶非勳戚不與答刺罕譯言  
一國之長帝謂侍臣彼家不識天意故來相害是人告我殆天所  
使我許爲自在答刺罕矣因賜御帳什器及宴飲樂節如宗王儀  
是後所下郡國由奉聖大同至陝西西域土番雲南遼東未嘗不  
從摧堅蹂強以死力自效壬辰太宗皇帝略地河南忠武間出太

行反擊燕有功會病薨子十二人其三忠毅也以勇銳服眾從睿  
宗皇帝取汴蔡滅金丙申錫分邑順德病薨二子次爲忠愍果毅  
有謀以近侍從憲宗皇帝伐蜀多勞績戊午薨于軍於是王甫及  
歲而識悟異凡兒目不視戲稍長善騎射尤習國書聞儒者談輒  
喜至元壬申世祖皇帝錄勳臣後一見異之命襲號答刺罕長宿  
衛百人夙夜其職惟謹嘗從獵馬躓傷面上直如常帝命醫視眷  
益重明年秋九月帝御萬壽山王侍賜金段諭曰汝先世勳大朕  
且大用汝又明年春丁母夫人憂哀毀踰禮是冬十月帝獵三不  
刺歸語皇太子曰答刺罕非常人比可善遇之乙亥江左平賜廉  
欽二州益其邑乙酉拜大宗正賜珠衣一襲時郡縣囚盜詐者上  
宗正決屬當遣使決死囚諸道王重按獄詞小不具悉令覆勘奏  
決者僅六十人耳尋赦下所活數百人大同民羣鬪毆鷹房三人  
死近臣以變聞帝怒亟遣王治止坐其首鬪者京師有以偽造楮  
幣連富民百餘家王盡釋之保定諸郡旱民當輸米京師多以輕



資就糴有司撫爲姦欲沒其產賞告者王得其情皆縱去曰舍貴  
就賤民便事集又何罪爲柄臣擅威福益橫知王惡已忌之數曲  
爲邀致竟不一往其家僮冒禁殺牛有司莫敢詰王致以法益忌  
謀撓王以多事奏請江南囚亦隸大宗正莅決王曰彼間民教令  
未孚若一切繩之恐生亂帝是之而止辛卯帝念湖廣失治欲遣  
近臣往莫宜王臺臣奏答刺罕在宗正決獄平卽去恐難其人帝  
曰彼地朕嘗駐蹕治非斯人不可王遂行隨賜以玉帶授榮祿大  
夫湖廣省平章政事湖廣南瞰交趾占城西掖蜀西南接南詔東  
連吳會境壤且萬里而八番兩江蠻獠布溪峒間虺蛇起伏跳跟  
小戾則相讎殺攻剽無時故治視他省劇甚王至審利病度先後  
簡僚佐撫兵民威行德流善遂頑革錢粟刑獄井井有條自宋時  
有巨盜嘯黨出沒湖湘殆二十年不可制王選士付以方略悉擒  
誅之江州隸江西省有猾民領官府恣虐凡剽船江中羣盜皆與  
爲根穴交通王知狀徑縛以來百救莫施卒寘於死遠近震悚俄

置行樞密院兵民政分勢不相營姦寇伺發溪峒以闕壬辰王入  
覲列其不便罷之帝問王人言廉訪官反撓吏治朕已令視之卿  
謂若何王曰憲司職糾姦弊貪吏所疾矣爲謗耳帝以爲然及還  
邊將征交趾出其境王戒曰無擾吾民有奪民魚菜者杖其千夫  
長一軍肅然乃上奏曰往年遠征無功民瘡痍未蘇乃復有事非  
國善謀也又發湖湘富民屯田廣西爲圖交趾計王以徙民瘴鄉  
事固難成必且怨叛遣使密奏吏抱券請署不答俄使還報罷民  
大悅已而廣西元帥府請募南丹戶五千屯田襟要謂士不死瘴  
癘餽餉有餘蓄實空荒之地爲邕管之蔽制諸蠻控交趾其利有  
六王喜與之牛種農器置長統焉聞諸朝到于今便之湖廣舊無  
夏稅柄臣援唐宋末世爲徵王曰衰弊之政聖朝可行耶竟奏罷  
常豐辰等州大水漂民廬多死者王亟發廩爲之賑慰凡災皆如  
之甲午春正月世皇登遐王謹斥候戒不虞境內寧肅大德戊戌  
九月朝成宗皇帝于上都帝嘉其績授光祿大夫左丞相行省江



浙視政凡七日綱舉七十餘事民風吏習翕然爲變入爲中書左  
丞相加銀青榮祿大夫杭之耆庶伏地攀泣馬不得前王旣當鈞  
軸益以天下自任每退食延見四方賓使訪以物情得失吏治否  
臧人材顯晦年穀豐歉采可行行之凡論議先以國典參以古制  
揆以時宜必當而後已其可否事猶元化之運順無留滯惟不言  
利不喜變更一以節用愛民重名爵爲務京師先未有孔子廟而  
國學寓他署王喟曰首善之地風化攸出不可怠乃奏營廟學嘗  
躬爲臨視旣成朝野瞻聳選名儒爲學官奏遣近臣子弟入學而  
四方來學者益眾又郊禮久未違王總羣議奏行之辛丑同列以  
或者議倡言世祖皇帝以神武開一統功蓋萬世陛下未有伐國  
拓地之舉以彰休烈西南夷八百婦國弗率可命將往征王謂山  
嶠小夷去中國遼絕第可善諭向化苟將非其人未見所利弗聽  
竟奏發湖廣兵二萬人丁壯役餽輓數十萬將失紀律果無功而  
還諸蠻要擊飢疫相仍比至將士存者纔十一二會赦有司議釋

將罪王曰微名首釁陷失士馬非常罪比不誅無以謝天下奏誅  
之癸卯秋拜中書右丞相加金紫光祿大夫王常言治道先守令  
至是選掄益詳時號得人定官吏贓罪十二章及丁憂婚娣盜賊  
等制禁獻戶及山澤之利每歲春大駕幸上都王必留守其重可  
知己時帝疾連歲權移中閤羣邪交扇勢焰翕忽王以身維之姦  
不得逞事以無撓丙午加開府儀同三司監修國史直僚屬奏修  
三朝皇后及宗室功臣傳冬十有一月帝弗豫王入侍醫藥出總  
宿衛且理幾務諸藩王欲入侍疾王拒之丁未春正月宸御晚駕  
時武宗皇帝撫兵居北王封府庫稱疾臥闕下理幾務如故中閤  
以姦臣謀絕北道驛欲行耐廟禮王格其事密記授使間走踰兩  
驛始得傳馳報武宗諸懷詐者數欲害王王不爲動內外懷懍視  
王以安會今上皇帝皇太后至自懷姦臣希中旨謀爲不軌三月  
王贊今上皇太后擒滅其黨發使迎武宗四月今上皇太后如上  
都王繼往五月武宗卽大位加太保開府儀同三司錄軍國重事



中書右丞相監修國史賜以憲廟所御白貂裘寶帶未幾加太傅  
賜第見其子脫歡近侍和林控北邊始置宣慰時諸部落降者百  
餘萬口乃罷宣慰詔王以太傅爲左丞相行省事賜楮幣十五萬  
緡黃金贏十二鎰白金二千五百兩帛四百端乳馬六十疋皇太  
后賜楮幣五萬緡帛二百端至和林獲盜米商衣者卽斬以徇攘  
竊屏息行旅爲便分遣使發廩賑降口復奏請錢七千三百萬緡  
帛稱是易牛羊給之又給網數千令取魚食遠者厄大雪金山命  
諸部置傳車相去各三百里凡十傳餽米數萬石牛羊稱之又度  
地立兩倉積米以待來者全活不可勝紀有飢乏不能達和林往  
往以其男女弟姪易米以活皆贖歸之和林歲糴軍餉恆數十萬  
主吏視利繆出納囊橐滋弊久矣立法以遏其源稱海屯田廢弛  
重爲經理歲得米二十餘萬斛益購工治器擇軍中曉耕稼者雜  
教部落又浚古渠溉田數千頃穀以恆賤邊政大治至大改元戊  
申帝賜大帳如親王制諸藩稟命戎事則以宴之仍賜酒米百斛

皇太后今上咸有賜焉天下傾耳以俟復召是冬十一月邁疾召  
其屬曰吾不起矣不得報國矣汝曹各自勉此間金穀勿貽朝廷  
慮其屬以聞帝驚愕命醫偕其子脫歡行以閏月某日薨于和林  
所居之正寢春秋五十又二天雨木冰連日帝大傷悼遣近臣慰  
諭其子賜賻錢五萬緡今上賻錢二萬五千緡勅大興尹買葬地  
昌平陽山南之原曰使天下後世知吾賢相耳乃胥議爲石塚柩  
至以是月二十有九日葬焉近而朝著遠而士民以及四方慟哭  
流涕嗟悼懷慕及奠于冢者無有己也明年己酉八月有封諡之  
命先配孫都氏繼室扎刺兒氏昭列氏扎刺兒氏怯列氏並追封  
順德王夫人一子卽脫歡由近侍爲太子賓客今上御極遷御史  
中丞進大夫官榮祿大夫襲號答刺罕博貫經史特立正言得風  
憲體皇慶改元壬子制加王曾祖考而下三世爵諡大夫之母完  
者氏封順德太夫人王爲人神宇靖偉簡重寡言不見喜愠望之  
儼然知其爲公輔器其在宗正也從世皇北巡平宗王亂初入叛



境王率三百騎猝與敵遇徐整騎突出敵背連發矢殪數人敵披靡遁帝壯之其在中書也引儒生討論墳典至堯舜禹湯文武之爲君舉夔稷契伊傅周召之爲臣歎曰人生不知書可乎乃館士教其子學由是而觀王之文武志略本乎天性奮身逢時發於至誠故其事業之見于世剛明正大巋巍焯焯如此嗚呼古所謂大臣者王爲無愧矣臣旣述其事乃繫之以詩曰  
漢有文成難制將變元有忠武患去未見掖聖承天偉績其貫忠武有孫維王忠獻維嶽降靈維王以生雲風類從近列以升穆穆世皇羣材權衡孰大予任王子是稱利器所施宗正焉始挺然鶚立獄平政理朝有巨姦王不以齒有媚不答姦氣爲禡帝念湖廣控馭匪宜陟之鼎司曰汝往釐霜肅露濡化行若馳烏蠻海夷悅服熙熙移杭未旬入總大政民有怙恃事有魃鏡惡者自懲善者相慶百度壘壘咸統于正成宗上仙回邪譎張勢挾中閹構謀非常王翊潛龍寘彼斧斨伊霍之重賴其胥匡武皇嘉之康錫三接

朔方往撫有聞赫赫一夕隕星山圯棟折遊歸之望竟莫爾愜天子曰嘻斯何人斯何紆予思其碑而辭大書深刻九達是向尙千萬年監此良相

駙馬昌王世德碑

張士觀

至治元年十二月癸亥制贈駙馬昌王阿失高祖字禿爲推忠宣力佐命開國功臣太師開府儀同三司駙馬都尉上柱國追封昌王諡忠武高祖妣公主帖木倫公主吳真並追封昌國大長公主曾祖鑽兒哈宣忠保大翊運開國功臣太師開府儀同三司駙馬都尉上柱國追封昌王諡忠定曾祖妣公主不海罕追封昌國大長公主祖扎忽兒陳推誠靖遠佐運贊治功臣太師開府儀同三司駙馬都尉上柱國追封昌王諡忠靖祖妣公主也孫真追封昌國大長公主父忽隣効忠保德輔運佐理功臣太師開府儀同三司駙馬都尉上柱國追封昌王諡忠宣妣公主伯牙倫公主卜蘭奚並追封昌國大長公主公主益里海涯追封皇姑昌國大長公



主旣頒卹典又詔翰林文諸石臣士觀祇奉明詔按世系王族爲  
亦啟列氏以小字阿失行忠武蚤逢興運從太祖皇帝起朔方同  
諸豪傑飲水于黑河要結盟誓經啟疆宇初太祖遣使四方詢訪  
人情至忠武所時忠武止畜一牝羊烹其羔迎勞使者又以使者  
馬瘠易以己之良馬使回併烹牝羊餞之使者復命具以忠武誠  
款對上嘉之遂以皇妹帖木倫公主下嫁實生忠定帖木倫公主  
歿繼尙皇女果眞公主嘗從征乃蠻翊衛左右未始少離上閱其  
勞以所獲戶民多賜其部我師旣破長城右遣國王木華黎經略  
北京左遣忠武規取阿八合亦馬合等城所得漢民卽賜忠武且  
諭旨曰諸部各遣子弟入侍時火魯刺帶哈兒八台違旨命忠武  
捉兵千人誅之以令眾復以所隸百姓賜之迨上征河西扈蹕戎  
行備著勤勞師未旋鼎湖上仙甫旬日忠武亦卒太宗震悼不已  
曰孛忝事我皇考宣力良多今已云亡送還本土遂葬於乞只兒  
仍禁其地三年如國家制忠定繼起擢爲萬戶尙宗女不海罕公

主總戎南征攻嘉州破之師還卒于道忠靖從定宗皇帝討平萬  
奴有功尙宗女也孫眞公主忠宣先尙憲宗女伯牙倫公主以失  
列吉飯屢著戰功繼尙宗女卜蘭奚公主征乃顏扈從乘輿忠勤  
備至世祖憐之賜名霸突霸突譯云驍勇也維亦啟列氏世篤忠  
貞積慶流祉至王益大王生資英果年十五已能從征乃顏躬履  
行陣至今不懈御敵奏功者屢矣是以尙宗女撒兒塔陳公主歲  
辛丑與都瓦戰射中其足敗之成宗錄其功以皇女益里海涯公  
主下嫁是生今上皇后及晉王妃亦隣眞八刺繼尙憲宗女孫買  
的公主武宗卽位襲爲萬戶賞賚優渥頒金印封昌王仍置王府  
迨仁宗朝賜文豹及海東靑白鶻歲以爲常今上卽位賜楮幣二  
萬定西馬及七寶帶各一太皇太后繼賜楮幣萬定子七人曰失  
刺渾台尙宗王木南子東亦勒眞公主撒兒塔陳公主出也曰監  
藏八刺曰阿刺納失里買的公主出也曰塔海曰汝奴朶兒只監  
臧朶兒只臣竊惟由漢以來言世家者必曰袁氏之四世五公高



密之重侯累將載在方策以為美談王家由高曾以來載德象賢忠事我朝至於奕世封王一門尚主國家所以崇德報功斯亦至矣其寵貴視袁氏鄧氏宜無少讓而隆名偉績則又過之以之銘鍾鼎書竹帛其誰曰不然臣士觀謹再拜稽首而獻銘曰

於皇聖元受命于天羣雄入彀載造坤乾忠武崛起儷景同翬翼佐王烈執銳被堅矯矯忠定奮其才賁光依日月躬屬橐鞬四征弗庭所向無前在定宗世擊豎擾邊乃命忠靖扈蹕周旋與謀帷幄奏捷戎軒忠宣繼之不懈益虔卻敵伐叛智勇兼全篤生昌王于蕃于宣靖氛沙漠忠力益殫惟帝念勞追卹其先何以寵之國姻世聯何以貴之王爵世延詔紀金石誓肩河山特以表忠千載永傳

曹南王世德碑

虞集

中書右丞相臣某等言陛下入正大統道汴其命山東河北蒙古軍都萬戶府都萬戶也速迭兒以其兵從至京師以功拜河南等

處行中書平章政事於法官一品當贈三代官封也速迭兒曾大父撥徹大父也柳干父阿刺罕嘗為大將戰功多又多死王事軍中宜追封以第一等爵制曰可有司以詔書議贈所當得官按地定封於是故贈定威佐運功臣榮祿大夫司徒上柱國曹國公諡忠定撥徹加贈定威佐運功臣光祿大夫司徒上柱國追封曹南王諡如故故蒙古漢軍都元帥贈宣忠靖遠功臣光祿大夫中書右丞相上柱國曹國公也柳干加贈宣忠靖遠佐運功臣金紫光祿大夫中書右丞相上柱國追封曹南王仍諡桓毅故光祿大夫中書左丞相贈協謀佐理功臣太師開府儀同三司上柱國曹國公諡武定阿刺罕加贈竭誠宣力定遠佐運功臣太師開府儀同三司上柱國追封曹南王改諡忠宣曾祖母塔拜祖母滅列母脫端闊闊倫皆先封曹國夫人改封曹南王夫人制下有勅國史臣集其以曹南王世家行事歲月著文于碑臣受詔謹按撥徹蒙古扎刺兒台氏太祖皇帝初起朔方豪傑之士雲起響應而從之為



之腹心爪牙者必皆有深智遠識有勇而善謀是以東征西伐無不如志以成萬世之業者天爲之生才而聖神善用之故也撥徹自其幼年已在宿衛爲火而赤火而赤者服御弓矢常侍左右者又爲博而赤博而赤者親烹飪以奉上飲食者也蓋非篤慎強敏見知而親信任使者不得預是以屬車所向無不在行數以徇戰掠地著功受賞太宗皇帝卽位仍以其職從征行隴北陝西之役攻城壁取郡縣率先戰士竟死之也柳干繼爲火而赤博而赤膺其父之職也以太宗之命事岳里吉太子爲番衛之長歲乙未闕出忽都禿太子出師伐金遂侵宋有旨出從戰戰有功拜萬戶方是時察罕以太祖所拔重臣爲大將位望崇甚而也柳干以天下馬步禁軍都元帥爲察罕之副總領諸翼蒙古漢軍馬統領屯戌大軍南面之征最爲重兵矣於是取陝西掠河東踐河南歲乙卯擣光壽大帥察罕歿憲宗皇帝命也柳干代之拜諸翼軍馬都元帥統大軍攻淮東西諸城歲戊午帥師至揚州數出戰遂以戰死

阿刺罕以諸翼蒙古軍馬都元帥統其父之軍從世祖皇帝南伐宋憲宗崩世祖北還卽皇帝位從至末黎伯顏孛剌之地阿里不哥阿藍斛兒渾都海興兵爲亂不受詔命討之阿刺罕以其所部蒙古軍擊之北至西門禿之地遂追之至河西功成而還中統建元之歲賞功賜黃金五十兩二年濟南帥李壇以山東反大發兵討之阿刺罕總其眾次老倉口以進戰明年濟南破壇誅山東平師還又明年賞功賜黃金虎符一銀印一以舊官將其軍至元初大軍伐宋五年師圍襄樊力戰數有功十一年取宋大軍渡江阿刺罕以其師取鄂州泝江陵下至京口所至郡縣降其軍慰撫其民人明年拜昭毅大將軍統其師發建康道溧水溧陽指獨松關抵杭州上方道與宋將吳某等戰斬之斬首七千級又與宋將祝亮戰擒亮并其裨校七十二人斬首三千餘級又與宋兵戰斬首七千餘級又斬逐其援兵退走數十里宋將奉使吳某都統丁某總制趙某來迎戰敗之斬首三千級擒總制谷某又擒宋將張公



及其裨校斬首二千級六月卽軍中拜中奉大夫行中書省參知政事是年宋亾明年丞相伯顏以宋主入覲九月阿剌罕帥東渡渡浙取越明台溫衢婺處及閩中諸郡追宋宗室秀王某道數戰皆敗之降其運使趙某提刑趙某五百餘人至福州與宋軍轉戰四十餘里斬步帥觀察使李世達等於陣殲其軍獲秀王及其家屬將吏百八十餘人降其部曲淮卒三千人於是江南悉平十二月有詔以中奉大夫中書參知政事授金虎符行江東宣慰使郡縣新附民心未安威信所孚莫不悅服十四年入覲上嘉其功進拜資善大夫中書左丞仍留宣慰江東十八年入覲方是時海內悉已平定舟車所至莫不服從而日本巖爾海島之間彌固自保有司以致討爲言天子從之迺賜玉帶弓矢命爲中書左丞相行省事統蒙古諸翼軍馬四十餘萬往征之師次明州且渡海矣歿焉旣歿而子也速迭兒幼拜降也速迭兒之兄也襲世職爲萬戶總其軍後以功僉書江淮行樞密院事進拜江浙行省右丞福建行

省右丞河南行省平章政事仍領其先世萬戶軍馬旣歿也速迭兒以元貞元年世其職受昭勇大將軍左手蒙古軍萬戶延祐三年覃恩特加昭毅大將軍泰定三年進昭武大將軍皆以萬戶總其軍如故後二年今上皇帝南還京師慨然懷撥亂之志將有大正於天下道過汴梁今太保伯顏公方鎮汴省八月庚子召也速迭兒帥其兵以行乙巳兵大集士卒感激赴義車馬器械精備勇氣自倍丁未命爲本省參知政事師行庚戌進平章政事仍兼山東河北蒙古軍都萬戶府都萬戶九月庚申同知樞密院事仍兼都萬戶壬申皇帝卽位大明殿建元天曆明日拜知樞密院事授以樞密院印仍領其萬戶事甲戌禿滿達兒自遼東引兵寇通州令也速迭兒帥諸翼軍馬出禦之丙子王禪等之兵軍於北皇后店也速迭兒移兵合擊敗之己卯哈刺赤渾都帖木兒阿剌帖木兒之兵軍昌平縣東白浮村帥師合擊敗之壬午昔寶赤大都之兵軍於昌平縣東北又帥師合擊敗之凡來寇之兵悉已敗劔總



兵者或執或敗走北面悉平癸未太師右丞相會諸將於龍虎臺  
下奏凱於朝有勅命也速迭兒守居庸之北關壘石以爲固十月  
己亥拜榮祿大夫知樞密院事依前兼管都府事統領諸翼蒙古  
軍馬使出師禦寇兵之西入者師次廣平磁州之武安縣敗獲總  
兵者也先帖木兒等而西南諸郡以次告平庚子召還十一月丁  
亥樞密院奉勅散諸軍行院官還京師明年二月以舊官復拜山  
東河北蒙古軍都萬戶府都萬戶五月上之上都也速迭兒仍帥  
其所統兵從十月癸卯皇帝若曰也速迭兒屬橐鞬以備干城恪  
恭職事朕用嘉之其以爲河南行中書省平章政事十一月丙寅  
以所統兵置大都督府命兼山東河北蒙古軍大都督秩從二品  
刻銀印賜之己巳有封贈之命嗚呼上之所以待功臣將帥寵錫  
榮耀不亦盛乎臣嘗聞之自昔國家所貴有勳舊之臣者以其君  
臣之契深宗社之事諭逆順向背之道素定於見聞而愛敬之誠  
自有不能己者故其得備戎行氣決志憤以能成功也世祖皇帝

既定海內以蒙古一軍留鎮河上與民雜耕橫亘中原故將委忠  
君於國人備非常於他日其所以爲子孫計者深且遠矣今上皇  
帝以天縱之資歷造昧之久奮名義以致討夙逆應天人而歸履  
大位固歷數之所在也若曹南王家自開基以來已入備禁衛出  
死行陣者三世矣今平章以其世守之舊兵奉中興之大業以致  
眞王之封食所居之邑聲振大藩受軍民之寄福祿方未艾也嗚  
呼偉哉敢再拜稽首而爲之銘詩曰  
昔在太祖受命自天聖子神孫師武用宣世祖赫赫一是萬國虎  
臣孔多貴有世績忠定之興承國肇基迺執干戈迺奉鼎彝不寧  
方來先後奔奏盡瘁殞身以昌厥後有竭桓毅益信以崇帝討王  
誅無往不從金氣旣衰宋亦就滅兼弱攻昧我帥我督截彼淮浦  
其流湯湯蹀血以終厲我國殤克繼父祖忠宣之武天錫之功世  
皇是輔肅肅南征絕江擣城左纛振旅馳追不庭世皇御天於鑠  
如日式圍不遺聲教迺訖于時出師有專有分江漢之間忠宣所



元文類卷二十五  
軍蒙衝載兵遡江薄海列郡風靡有順無悔旋指江東進師合攻  
關柵兒嬉孰當吾鋒斬將連營覆卒盈野迺會元戎于城之下變  
變孱孱解璽入朝掠其餘疆曾不崇朝既定甌越成功來告命以  
相臣持節東道治以歲成位以序升入覲天子龍光是承天子曰  
嘻蠢彼海裔爾相予左帥士以濟臨涯揚舲海若弭靈天不憖遺  
亟賈將星忠宣所統國人之勇留戍羅絡齊魯梁宋鼓旗開闢武  
帳在中既世其官又世其功今我聖皇中興以正錫鑾在塗萬騎  
前乘誰其將之不二之臣彼壘于郊摧之爲塵聖皇賞功寶玉鷹  
馬還長其鎮爲國召虎頌頌爾軍何以表之爾建大府都督之旗  
爾家于曹有桑有土昔公今王三世之祐豐碑列功備書三王咨  
爾多士勸忠勿忘



